


WANTOK



NIUSPEPA BILONG YUMI OL PAPUA NIUGINI STRET! 27 YIA NAU

32 pes

Namba 1,281

Wik i stat long Fonde Januəri 14, 1999

60t

INSAIT

• Ol Bogenvil pablik sevans nogat pe - pes 2

• Ol plis mas senis olgeta 3 yias - pes 3

• BSP beng toktok long Waghi Mek kopi - pes 7

• Lukim Sauten rijon nius - pes 8

• Tok pilai wantaim kanage - pes 25 na 26

Oposisen kotim Gavman long Bogenvil



Lukim na aigris!

• Ol sampela ovasis turis bilong Australia raun long Boroko ples na aigris long ol bilas na ol purpur ol manmeri i salim long las wiken. *Poto: Joe Ivaharia*

1999 baset bai katim ol wok na pe

LUKLUK bilong Nesenel Gavman insait long 1999 nesenel baset i sut long wok developmen insait long ol rurel eria. Na dispela i mekim planti gavman woka na ol bikman i komplek egensim Gavman, Sir Rabbie Namaliu i tokaut.

Sir Rabbie Namaliu i tok planti lain i komplek bikos baset nau i sut long ol wok developmen insait long ol distrik na asples na i sotim baset bilong ol wok insait long ol gavman opis long taun. Olsem na dispela bai givim hevi long potnait pe bilong planti wokmanmeri insait long siti we sampela wok na ol posisen bai pinis.

Minista bilong Petroleum na Ges na olpela Prait Minista bipo, Sir Rabbie Namaliu i tok dispela em namba wan taim tru dispela Gavman i sanap strong long bringim developmen i go long ol asples we planti taim ol asples i save komplek long en.

Sir Rabbie i tok disisen bilong Gavman long katim baset long ol potnait pe na ol posisen bilong pablik sevans-i mas kamap. Bikos olgeta provins i mas rausim sampela posisen na wok we i no wok gut moa. Na tu kamapim sampela posisen long dis-

trik level we i mas kamap long karimaut wok bilong gavman i go long ol ples na distrik, em i tok.

Insait long tupela bikpela eria bilong nesenel baset, mipela i apim developmen baset long K400 milien i go moa long K831 milien. Na mipela i daunim rikaren ekspendisa long K19 milien i go daun moa long K17 milien, em i tok.

Sir Rabbie Namaliu i tok olgeta provins bai skelim K120 milien na tu olgeta 89 distrik insait long kantri bai kisim K1 milien insait long K89 milien bilong ol.

"Longpela taim i lus pinis we ol pipel bilong mipela i wok long sindaun na lukim ol bikpela developmen na senis i wok long kamap tasol long ol taun olsem Mosbi na Lae. Na ol i save askim bai ol tu i kisim wankain senis na developmen olsem o nogat. Olsem na insait long dispela senis na lukluk, Gavman i laik kamapim developmen insait long ol rurel eria, asples na rurel komyuniti. Na ol distrik level bai kisim bikpela helpim na sapot long kamapim ol dispela senis long ol asples", Sir Rabbie i tok.

VERONICA HATUTASI i raitim

OPOSISEN i kisim Nesenel Gavman na Nesenel Eksekutiv Kaunsel i go long kot tude bihain long disisen bilong ol (NEC) long rausim nupela Provinsal rifom long Bogenvil long biknait bilong Desemba 31.

Long Desemba 31, taim bilong Bogenvil Trensisenal Gavman i bin pinis. Bihainim dispela, Bogenvil i bin kamap aninit long nupela Provinsal Gavman rifom. Aninit long nupela rifom, John Momis rijinal memba i kamap Gavana long Bogenvil. Tasol kwiktait gen long Desemba 31, Kabinet i rausim nupela rifom long Bogenvil.

Mista Momis i tokim Wantok olsem Oposisen i laikim Kot long skelim na glasim disisen bilong NEC na wanem as tru em i rausim Bogenvil Gavman i kam aninit long nupela rifom. Kot tasol bai i mekim disisen sapos Gavman i mekim stretpela disisen o em i rong. Tasol dispela em salens we Oposisen i putim long Gavman.

Mista Momis i tok aninit long ogenik lo bilong kantri na Seksen 227/228 bilong Mama Lo, Gavman i ken rausim Provinsal Gavman sapos i gat pait (wo) na hevi, imejensi na korapsen o bagarapim wok mani o wokim paul pasin insait long Provinsal Gavman.

Mista Momis i tok Oposisen i no lukim wanpela gutpela as watpo, tru na Nesenel Gavman i rausim nupela rifom i karamapim Bogenvil. Em i tok Oposisen i lukim olsem Gavman i pilai politiks na wokim dispela samting long Bogenvil.

Mista Momis i tok nau Bogenvil i nogat gavman na NEC i lukautim Bogenvil. Em i tok bihainim saspensen bilong BTG, em olsem lida we ol pipel i bin givim vot long en i gat rait long makim ol tasol dispela i no kamap bikos NEC i saspensim gen nupela rifoms.

Em i tok em yet i no laik kamap olsem Gavana tasol dispela i wanpela

stretpela rot i stap bihain Gavman i rausim BTG.

Long nupela bel isi gavman we Bogenvil i laik kirapim, Bogenvil Rikonsiliesen Gavman (BRG), Mista Momis i tok Palamen i no tok oraitim yet na long dispela taim em i gat nem tasol olsem wanpela asosiesen. Em i no kamap aninit long lo yet na ebai stap olsem inap long Julai taim Palamen i bung gen.

Em i tok long nau, NEC na Waigani i lukautim Bogenvil na long dispela rot, ailan i go bek gen long ol koloniel rul we Konedobu i bin stap olsem bos na mekim ol long ol pipel long bihainim.

Mista Momis i bin tok tu olsem i luk olsem Gavman i laik abrusim em (Momis) na Saut Bogenvil memba long Palamen, Michael Laimo long ol bikpela toktok we i karamapim Bogenvil.

Bogenvil Afeas Minista Sam Akoitai i tok Oposisen i gat rait long karim samting ya i go long kot, olsem tasol ol arapela pipel long kantri

Tasol long wankain taim, Mista Akoitai i tok nau i no gutpela taim long subim ol samting we i sut long Bogenvil long kot bikos dispela i ken bagarapim ol wok long gutpela sindaun we i stap nau long ailan.

"I no gutpela long pilai politiks i go insait long pulim ol poin, pretim ol arapela long autim tingting bilong ol long pasin bilong kisim kot eksen. Bikpela samting em wok bung wantaim nau long stretim Bogenvil i mas kamap," Mista Akoitai i tok.

Em i tok long 10-pela krismas, stap na sindaun bilong ol Bogenvil pipel i bin bagarap na long dispela taim, taim sindaun i wok long kamap orait, gutpela wok, luksave na tingting i mas stap long olgeta sait.

Mista Akoitai i tok moabeta Oposisen Mista Momis i sapotim Gavman long wok bung wantaim long strongim ol wok long kamapim gutpela sindaun long Bogenvil long gutpela rot.

PLIS RIPOT

Goroka, Isten Hailans:

Plis long Goroka long dispela wik Mande i holim tupela kalabus man husat i bin ronawe long plis sel long las mun, plis ripot i tok. Ekting Provinsal Plis Komanda Edward Kinamon i tok wanpela spesel plis operesen grup i bin holim pasim tupela ronawe kalabus man bihain long tupela i wokim stilpasin long Happa Tredstoa long dispela wik. Mista Kinamon i tok dispela tupela na narapela poroman bilong ol i karim tripela gan ol i wokim long ples na hensapim ol wok manmeri bilong stoa na ol sekyuriti gad na stilim mani na ol arapela samting bipo ol i ronawe.

Em i tok ol plis i bin ronim ol na holim ol. Plis i autim nem bilong ol olsem Stanley Wei bilong ples Vapend long Pangia insait long Sauten Hailans na Goie Abel bilong ples Anganene insait long Gembogl distrik, Simbu provins. Tupela man i hap long 31 kalabus lain husat i bin ronawe long Goroka plis sel long las Desemba. Namba wan grup i bin ronawe long Disemba 22. Narapela em long Desemba 23 na namba tri long en em Desemba 28. Plis i holim pasim bek 11-pela bilong ol. Mista Kinamon i askim pablik long helpim plis long kisim bek 20 husat i ronawe hait yet.

Kainantu, Isten Hailans:

Wanpela manki wantaim 11-pela krismas i bin dai long dispela wik Mande bihain long narapela manki i wokim mistek na holim gan we i gat katres na ol i redi long yusim. Ekting Provinsal Plis Komanda Edward Kinamon i tok dai manki na narapela tupela poroman bilong en i bin laik bruk i go insait long Besengka, Simbu blok long Kainantu taim wanpela long ol manki i holim gan na em i go of na kilim pren bilong ol. Plis i wok long painim yet tupela manki husat i bin ronawe bihainim dispela birua.

Mosbi, Nesenel Kapitel:

Plis long Mosbi long dispela wik i holim bek wanpela ronawe kalabus man bilong ples Barakau insait long Sentrel provins. Komanda bilong plis long NCD na Sentrel provins John Wakon i tokaut long nem bilong man olsem Maraki Noho Pati husat i bin kisim laip sentens long stap kalabus inap em i dai bilong kilim dai wanpela meri, Theresa Mitchell Luthcini. Pati i bin ronawe long Bomana haus kalabus long Septemba 1996. Plis i bin kisim toktok long sampela man na ol plis i bin holim pasim bek em. Mista Wakon i tok Pati i bin sevim wanpela yia na eitpela mun taim em i ronawe long 1996. Dispela em taim em i kisim marasin long Mosbi Jenerel haus sik bihain em bin sik.

Mosbi, Nesenel Kapitel:

Ol stilman i bin karimaut stil pasin long Supa Velu stoa long Taurama insait long siti long las Sande. Plis i ripotim olsem sikspela man i holim tupela gan we ol i wokim long fektri na tupela ol i wokim long ples i bin hensapim ol sekyuriti gad na ol woklain bipo ol i stilim mani inap long K3,500 na ronawe. Mista wakon i tok ol stilman i bin ronawe long wanpela ka tasol ol bin lusim ka long Pruth Strit long Tu Mail na ronawe long lek. Long wankain taim tu, sampela stilman i bin stilim K3200 long Ailenda Sevis stesen long las Sande. Mista Wakon i tok faipela saspek i bin katim banis na stilim ol mani long opis na ronawe wantaimol.

Maramuni ples balus long Enga i pas ...na ol pipel i kisim taim

PETER MAIME i raitim

MARAMUNI ples balus long Enga Provins i pas pinis na ol pipel long hap i kisim hat taim.

Sivil Aviesen Atoriti i pasim ples balus bikos Maramuni Lokol Gavman Kaunsel i no lukautim gut. Kaunsel i papa bilong ples balus. Ples balus i pas long mun Oktoba, 1998.

Maramuni em wanpela sab-distrik bilong Wabag. I gat

klostu 7000 pipel i stap long dispela distrik. I gat 4-pela komyuniti skul, 5-pela ed pos na wanpela helt senta.

Ol pipel i save kisim ol sevis long ron bilong balus tasol. I nogat rot bilong ka i go long Maramuni. Ples ya i stap namel long Wabag na boda bilong Is Sepik. Em bai kisim klostu tripela de long wok-about long lek i kam long Wabag taun.

Gavana Peter Ipatas i wari long dispela samting na i bin

raitim pinis wanpela pas i go long bos bilong Sivil Aviesen Atoriti long opim gen ples balus. Mista Ipatas i tok, em i no kisim wanpela bekim long dispela pas.

Em i tok, em i no save wanem samting i rong long ples balus bikos ples balus i wankain olsem bipo yet.

Gavana Ipatas i tok pinis olsem gavman bilong em bai putim mani long stretim dispela ples balus. Provinsal Gavman i wetim ol bikman

long SAA long tokim ol long wanem samting long ples balus ol i ken stretim.

Em i tok tu olsem wok long nupela opis bilong Maramuni sab-distrik tu i stap. Timber Line Kampani long Hagen i kisim kontrak long wokim dispela opis tasol nau ol i no inap bikos ples balus i pas. Olgeta samting bilong wokim opis em bai ol i karim long balus.

Ol kain balus olsem Tuwin Ota o tu enjin na Sesna i save pundaun long Maramuni.



Wokim bilum - Dispela lapun mama bilong Kerema, Galp provins i gat namba long bilum em i kilim skin long wokim bilum long banis bilong em. Em i lainim planti bubu bilong em long wokim bilumtu ya.

Poto: IAN KAKARERE

K12,000 kompensesen long man dai long paia

FIRMIN NANOL i raitim

ENEP wanpela liklik ples insait long Apa Mendi distrik long Sauten Hailens provins i bin peim moa long K12,000 na sampela 24 pik igo long narapela klen, Karel olsem kompensesen long wanpela man husat paia i bin kukim long 1997 long taim bilong dispela drai sisen.

Dispela man em Peraka Wan paia bin kukim em taim em i bin go long bus na taim em i laik kam bek long haus traipela bus paia i bin bungim em long hap rot yet na kukim em i dai. Bus paia ya i bin stat taim wanpela man i bin wokim liklik paia arere long gaden bilong em long taim bilong hangre na drai sisen long 1997. Man ya bilong Enep. Man ya bin ting olsem paia bai nonap long go bikpela tasol dispela taim em i taim bilong san na win i mekim na paia i go bikpela na kisim ol kunai na pitpit klostu long gaden na kukim olgeta bus. Paia ya igo bikpela na dispela man husat paia i bin kukim i bin stap long bus na i laik kam bek tasol paia i bin kukim pinis hap rot we bilong bihainim.

Tarangu man ya i bin wok long painim rot bikos simuk bilong paia i pasim ai bilong em. Taim em i wok long painim rot i stap paia i kukim em na em i sotwin na idai. Dispela kompensesen i bin kamap long Enep long las wik Sarere. Dispela sem paia i bin kukim tripela haus kaunsel long Karel Kaunsel semba long Apa Mendi yet. Dispela sem paia tu i bin kukim ol yar diwai, ol bus na tu ol karuka diwai.

WANTOK

All departments. Phone: 325 2500 - Fax: 325 2579
P. O. Box 1982. Boroko. NCD. Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief:
Anna Solomon.

Advertising Manager:
Mike Kanin.

Editor of Wantok:

Papers distributed by air throughout PNG. Available by air mail subscription within Papua New Guinea and overseas. Email address: word@global.net.pg

Advertising deadlines, Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

Bogenvil pablik sevans i no kisim pe

TAIM ol tok pait i kamap long wanem kain atoriti bai lukautim Bogenvil i wok long go het, provins na ol pipel i no kisim gutpela developmen na sevis. Nau yet, planti pablik sevans long Bogenvil i no kisim pei bilong ol long tupela potnait.

Dispela em ol wok manmeri husat i kam aninit long Provinsal peirol. Ol wokman long Bogenvil i stap aninit long tupela peirol sistem, hap long provinsal na narapela hap em long nesenel peirol sistem.

Ripot i tok ol dispela i kam aninit long Program 718, Provinsal peirol sistem em ol dispela husat i no kisim tupela potnait pe bilong ol. Dispela i kamap bikos mani i sot. Ripot ya tu i tok planti woklain long provins i no kisim pei long tupela potnait, stat long Desemba las yia. Ripot i tok moa long 2,000 pablik sevans i no kisim yet "Hatsip alawens" bilong ol yet. Long mun Oktoba las yia,

Pablik Employis Asosiesen long Bogenvil i bin stretim ol toktok wantaim ol Nesenel Gavman atoriti na Pablik Sevis Minista Ian Ling-Stuckey i givim tok orait long rilisim namba wan hap mani long peim ol Bogenvil pablik sevans long mun Novemba yet las yia. Tasol i kam inap nau, ol no kisim wanpela peimen yet bikos i nogat mani long peim ol.

Ol pablik sevans long Bogenvi husat inap long kisim dispela alawens em ol dispela we i bin wok long bringim sevis i go long ol pipel na tu wok aninit long gavman restoresen program taim Bogenvil i stap yet long hevi na taim nogut. Ripot i tok long dispela taim, sindaun long olgeta hap bilong Bogenvil i kwait na nogat bikpela meknais i kamap.

Tasol long Buin, i gat hevi i stap namel long grup husat i bin kilim dai olpela Sauten BRA komanda, Paul

Bobby long mun Septemba las yia long ples bilong em long Kararu. Ol lain bilong Thomas Tari i bin kilim Bobby na long las wik, ol lain bilong Bobby i bin kilim dai dispela man husat i kilim dai em long peibek pasin.

Singaut i go long ol nesenel na provinsal lida na moa yet memba bilong Saut Bogenvil Michael Laimo na Rijinol MP John Momis long mekim samting bilong stapim dispela bel kros i stap nemel long tupela grup long Buin.

Long Siwai, ol liklik tred stua i stap pas bikos ol raskol lain i hensapim tumas ol bisnis man na brukim na stilim ol samting. Olsem na ol pipel i kisim taim tru.

Askim i go pinis long ol lain i go pas long ol BRA na ol arapela grup long tok-tok long ol lain bilong ol long daunim ol raskol pasin na ol bisnis man i ken opim bek ol stua bilong ol na ol pipel i kisim sevis.

Koimanrea skelim 1999 em hat yia bilong provins

WALTER DARIUS i raitim

IS Nu Briten Provinsal Gavman i pasim K60 milien baset bilong em long Desemba 13 we K2 milien i sot long dispela yia. Baset bilong 1998 i bin K62 milien.

Gavana bilong Is Nu Briten provins Francis Koimanrea i tok dispela yia 1999 bai i wanpela hatpela yia tru winim 1998 na 1997 bikos em i skelim olsem ol wok bisnis na ekonomi bilong provins bai i bungim hat taim.

Mista Koimanrea i tok mipela i no ken lukluk i go longwe long painimaut as bilong hevi bai i kamap long we. Bikos ol i ken stat long skelim nau long mak bilong dispela baset ol i brukim bilong provins.

Gavana Koimanrea i tok gavman bilong em bai lukluk nau long tripela bikpela wok bilong mekim insait long dispela baset. Ol dispela tripela eria em Mentenens, Disentrelaisesen na Rikonstraksen. Dispela tripela eria i olsem kona bilong sanapim baset bihainim.

Mista Koimanrea i tok

bikpela wok ol i mas mekim em long stretim gut ol asets o ol eria bilong wokim mani na tu stretim gen ol samting we i bin bagarap bikos long birua bilong volkanu.

Em i tok lukluk bilong gavman nau em mekim baset bilong provins i wok bihainim ol mein eria bilong developmen we i ken kamapim developmen plen na strongim wok bilong ol long menesim liklik mani na risos provins i gat long kamapim gut wok. Na dispela i ken sut stret hevi na laikim bilong ol pipel, em i tok.

Ol rot, bris, wof, ples balus, bildings, pawa sistem, komyunikesen sistem na wara saplai em bikpela samting bilong kamapim gut gutpela sosel sevis olsem edukesen, helt na kirapim tu wok bisnis na ekonomi long provins, em i tok.

Mista Koimanrea i tok mipela i no inap toktok nating na ting mipela i save long wanem samting ol pipel i laikim. Bikos ol laikim na hevi bilong pipel i bikpela moa winim ol risos na strong bilong mipela. Olsem na mipela i mas mekim gut plen long stretim ol dispela hevi na wok bihainim, em i tok.

Ol plisman i mas trensfea olgeta 3 yias, Wenge i tok

YAKAM KELO i raitim


OLGETA plisman insait long kantri i mas muv o trensfea i go long nara-pela provins bihain long ol i stap tripela krismas long wanpela hap, Morobe Gavana Luther Wenge i tok.

Ol plisman i stap longpela taim long wanpela distrik o taun i save kamap pren wantaim ol lain long komyuniti na wokim praivet bisnis na planti wok bilong ol i no save kamap gut, Mista Wenge i tok.

Gavana Wenge i tok as bilong dispela tingting em long strongim wok bilong lo na oda insait long kantri.

Em i laikim olsem plis Minista i mas lukluk long dispela na skelim gut bikos planti plisman i save kamapim ol bisnis bilong ol na mekim pren wantaim ol kain kain lain long komyuniti. Dispela pasin i save kamap na planti trabel i no save go orait bikos ol plisman i pren tumas wantaim ol lain long komyuniti na i save stretim ol hevi antap tasol na planti trabel lain i save stap fri.

Gavana Wenge i tok dispela toktok bilong em i no sut long wanpela o tupela plisman tasol bikos em i nogat



Luther Wenge.

tingting egensim wanpela plisman. Tasol em i tromoi tingting long stretim gut wok bilong strongim lo na oda insait long kantri.

Em i tok olsem dispela toktok i no politiks na ol plisman i no ken ting krangi long dispela. Tasol politiks em makim pipel long komyuniti na politiks i bilong kamapim senis bilong helpim pipel.

Em i tok wanem kain gutpela wok ol plisman tude long wanwan provins na distrik i mekim insait long kantri i no ken bagarap long dispela tingting bilong muvum ol plisman i go i kam bihain long olgeta tripela krismas.

Morobe Gavana i mekim dispela toktok bihain long ol PNG Plis Asosiesen i bin toktok long las mun egensim ol plen bilong Plis Minista Thomas Pelika long senisim ol sira plis opisa long wok bilong ol.

Ol plis asosiesen i tok sampela plisman i mekim gutpela wok tru na ol i no laik bai politiks i go insait na bagarapim gutpela wok ol plisman i wok long mekim tude.

Gavana Wenge i tok ol gutpela wok ol plisman i mekim tude i no ken bagarap insait long wanem kain senis bilong muvum o transferim ol plisman i go i kam long provins na arapela stesin.

Em i tok tu olsem ol politikol disisen long mekim senis long wok bilong ol plisman i no ken tru karim ol hait tingting na paulim gutpela wok bilong ol plisman. Wanem disisen long mekim ol senis i mas klin na gutpela tasol.

Sik sua na taifoid go bikpela long Nu Ailan

Ian Kakarere i raitim

SIK BILONG bikpela sua (yaws) na pekpek wara wantaim blut (taifoid) i go bikpela nau long Nu Ailan provins.

Foapela pipel i dai pinis long Kavieng haus sik long sik taifoid na samting olsem 700 manmeri na pikinini i kisim sik yaws, ol ripot i kam long Kavieng haus sik i tok.

Provinsal disis kontrol opisa long Kavieng haus sik Peter bale i tok 400 pipel bilong Djaul Ailan na 300 long Niu Hanova i bin kisim sik long bikpela sua long las mun. Sik yaws i save kamap olsem ol retpela bukuk long skin na bodi. Bihain ol i save bruk na kamap olsem ol sua we i hat long stapim. Ol bin stapim dispela sik insait long kantri namel long 1950 na 1960.

Mista Bale i tok sik ya i no save kamap olsem long Nu Ailan provins na ol helt atariti i kirap nogut long en.

Wanpela medikol grup i go pinis long Djaul Ailan na givim marasin pinis long ol pipel bilong stapim sik ya i kalap i go long ol arapela we i no kisim sik ya yet.

Em i tok ol helt patrol i raun nau long Lihir na Tanga Ailan, Manga eria long Namatanai Distrik, ol ples long Buluminski haiwe long kavieng i go long lemakot, Tigak na Kaut eria long Kavieng distrik na kavieng taun yet. Grup ya long patrol bilong em i givim skul i go long ol pipel long wanem rot ol mas bihainim long abrusim kain sik ya.

Mista Bale i tok ol no klia watpo tru sik yaws i kamap na go bikpela gen long Nu Ailan long dispela taim. Wanpela eria we ol i lukluk long en em hamas pipel i bin kisim dispela sik bipo helt dipatmen i lusim prosilin, wanpela antibalotik marasin we ol i save yusim long stapim dispela sik long namel bilong 1960's. Na mak bilong sik ya

taim ol i yusim ol arapela marasin long stapim em.

Mista Bale i tok Kavieng haus sik long las mun i bin lukim 500 pipel wantaim sik taifoid. Wanpela man i bin dai las wik na tripela long las mun long sik taifoid, Mista Bale i tok.

Em i tok samting olsem 200 pipel i bin kisim marasin long Kavieng haus sik long dispela sik las wik.

Em i tok bikos em i kostim bikpela man tru, haus sik i no gat kemikol marasin bilong skelim na glasim ol sikman long sik taifoid. Tasol ol i save givim ol marasin bilong sik malaria na sapos ol i no kamap orait ol i givim ol taifoid marasin.

Ol i kirapim wanpela komiti long glasim sik taifoid na long wankain taim tu, Kavieng Taun Komisnin i stapim ol man i salim ol kuk kaikai long maket, ol sait maket long rot na long ol praivet haus long traun daunim sik ya.

Nominesen op long Simbu na Kagua Erave bai-ileksen

PETER MAIME i raitim

NOMINESEN bilong bai-ileksen long Simbu na Kagua Erave i op pinis asde long 4 kilok apiniun.

Ol tok orait pepa bilong ronim bai-ileksen em Ekting Gavana Jenerel na Sief Jastis Sir Arnold Amet i bin sainim pinis long Tunde.

Ol lain husat bai sanap long bai-ileksen i ken givim nem long ilektorel Komisnin wantaim K1000 nominesen fi. Nominesen bai pas long neks wik Trinde.

Ol kendidet bai kisim klostu tu mun long mekim kempein bilong ol. Tot bai sat long Sarere Mas 13 na pinis long Sarere Mas 27, 1999.

Tupela ilektret ya bai i gat bai-ileksen bikos memba bilong ol bipo, Pater Louis Ambane bilong Simbu na David Basua bilong Kagua Erave i bin lusim sia bilong ol kot. Pater Ambane na Mista Basua i ken resis gen sapos ol i laik.

Planti lain bai putim nem bilong ol long resis long ileksen long winim dispela tupela sia long nesene palamen.

Sief Iektorel Komisina, Ruben Kaiulo i givim ol strongpela toktok i go long ol pipel bilong Simbu na Kagua Erave long wok bung wantaim ol ilektorel opisel long ronim gut ileksen. Em i tok, ol ples we ol pipel i kirapim pait, bai ol i no inap vot.

Em tu i askim ol kendidet long kontrolim ol sapatas bilong ol na mekim wok isi long ol wok manmeri bilong ileksen. Sapos bihain kot i panim aut olsem ol i bin win wantaim sampea paul pasin, ol tu i ken lusim sia bilong ol.

Tupela bikman bilong Iektorel Komisnin bai go pas long dispela ol bai-ileksen. Eria Menesa bilong Madang, Abraham Wari bai lukautim ileksen long Simbu na Eria Menesa bilong Hagen, Alphonse Yapen bai go pas long ileksen bilong Kagua/Erave.

Ol pipel bilong Wabag long Enga Provins, Isten Hailans na Yangoru Saussi long Is Sepik bai wet yet. Ol dispela ilektret tu i bin lusim memba bilong ol long kot, tasol ol memba husat i lus i apil gen. Iektorel Komisnin i no inap long mekim wanpela samting nau, inap kot i stretim olgeta samting.

TORO

TORO GO PAINIM PIS LONG SEA... KLOSTU LONG MANUBADA AILAND...

OHHO! BIKPELA WIN! KAM! MI MAS GO!

BIKPELA WIN I KAM NA TORO I LUS LONGI SOLWARA INAP TUPELA DE... EMI TING EM STAP LONG TAHITI O TONGA PES...

AIYOO! TUPELA DE MI LUS... ATING MI KAM KAMAP LONG TAHITI...

TING TING BILONG EMI MEKIM NA ANAMAS TRU.

NAU EM LUKIM WANPELA AILAN NA EM TINGIM TOKPLES BILONG TAHITI NA EM SINGAUT...

ALOHA!!

LONG AILAN WANPELA MAN I BEKIM LONGI TOK MOTU...

OI DANU HEMARAI LASI!!

EM TOK MOTU YAU!

EM I NO SAVE OLSEM EM I RAUNIM MANUBADA LONGI TUPELA DE OLGETA..

MOMASE RIPOT WANTAIM WENCESLAUS MAGUN



• Ol komyuniti bilong Yembi Yembi i welkamim ol komunio minista. Bilip bilong Katolik Sios i kamap bikpela long Is Sepik bikos long hat wok bilong ol kain misinari olsem Pater Blasig. God i ken pogivim ol rong bilong em na givim em pe bilong olgeta hat wok em i mekim long taim em i stap laip. Foto: Pater Paul Kanda SVD.

Is Sepik lusim Pater Blasig SVD bihain long 49 yia

OL KATOLIK bilong Is Sepik i lusim wanpela longtaim pater bilong daiosis bilong ol, Pater Paul Blasig SVD bihain long ka bilong em i bam wantaim narapela ka klostu long Pasam Nesenel Hai Skul, long Sande 10, taim em i lusim peris Negrie na i laik go long Wewak long bung bilong ol Daiosis pater.

Neisse/Nysa. Em i go mekim tupela yia novisiet, tupela yia em i stadi long pilosopi na foapela yia em i mekim tioloji stadi. Long Septemba 14, 1947 em i kisim odinesen olsem pater long pestode bilong Eksoltesen bilong diwai kruse.

Ripot i kam long Pater Gawlik long Wewak i tok, Misa bilong bodi bilong Pater Blasig i kamap tude (Fonde) Januari 14 long 1:30 long abinun. Bodi bilong em bai slip long Kraisi King Katidrel long Wirui peris bai ol pipel i ken go lukim long las taim. Long 3 o klok long abinun, bai i gat Misa bilong ol dai man bilong tingting Pater Blasig. Pater Elmer Eisbernd, SVD, Provinsel Supiria bai go pas long dispela Misa wantaim ol arapela pater bilong daiosis.

Pater Blasig wantaim 13 arapela misinari i kam long PNG long Januari 1950. Namba wan wok misin bilong em i go long Kunjingini peris nau i gat 6-pela peris. Pater Blasig i amamas long wokim ol peris long kamapim strong Kristen bilip na tu skulim ol pipel long lukautim gut laip bilong ol long graun.

Mama i karim Pater Blasig long Rennersdorf, Jemeni. Papa bilong em Emanuel na mama Emilie Blasig. Pater Blasig i gat tripela brata na wanpela susa. Em i namba tu long famili bilong em. Las brata bilong em, Ernst i stap yet long Huertgenwald long Jemeni.

Ol pipel bilong Is Sepik i save tok, Pater Blasig em i wanpela man bilong wok olsem Santu Paul. Em i save wok long de na nait wantaim. Long 5-pela yia em i lukautim Roma na Warabung. Insait long 12-pela yia em i wok olsem peris pater bilong Maprik (1975-1987) em i serisim tru Maprik peris.

Pater Blasig i go skul long Rennersdorf. Mama bilong em na wanpela SVD pater i wok hat long skulim Pater Blasig long laip bilong ol SVD misinari long Holi Kros

Em i bilip olsem taim em i statim wan-wok pastorel progrem, Karismatik riniuel em bun tru bilong gutpela wok misin. Long sampela mun, em i wok olsem peris pater bilong Yangoru tasol bipo long Krismas 1987 bisop Raymond Kalisz i salim em i go long Negrie we em i wokim wok i stap inap em i dai long dispela birua bilong ka.

Aitape Distrik Disasta Komiti tok orait long wokim Wipom skul

AITAPE Distrik Disasta Komiti i tok orait long Tunde 12, olsem Hanshin Quake Rilif Faundesen bilong Kobe, Japan wanpela non-gavman ogenesesen husat i wok bung wantaim Papua Niugini Kaunsel bilong ol Sios i ken go het na yusim K300,600 ol i bungim long wokim skul long Wipom.

Jenerel Seketeri bilong PNGCC, Reveren Pat Kila i tok wantaim dispela mani na tok orait ol i ken go het nau long baim ol meteriel bilong wokim dispela nupela skul.

PNGCC i gat tingting long yusim dispela mani long baim ol meteriel bilong wokim siksipela klasrum, wanpela laibreri, wan-

pela haus sik na sapos i gat mani i stap yet, bai ol i wokim foapela haus tisa.

Reveren Kila i tok tu olsem Nesenel Edukesen Seketeri na Distrik Edukesen Edvaisa bilong Dipatmen bilong Aitape tu i amamas long tingting bilong kirapim dispela skul long Wipom.

Gavman i no kisim gut takis bilong ol lain i go long Jayapura long Vanimo

IAN KAKARERE i raitim

NESENEL Gavman i no kisim gut takis bilong ol lain i go long Jayapura long Vanimo bikos planti bilong ol i no save baim dipatsa takis taim ol i go long Jayapura long bot bilong ol yet. Dispela em wanpela bel hevi menesing dairekta bilong Vanimo risot hotel, Kym Downes i tok.

Mis Downes husat i bin gat wanpela bot, MV Narimo Express na i bin save kisim ol pasindia long Sandaun i go long Jayapura long Irian Jaya i stapim dispela sevis bikos tude planti ol bot bilong ol pipel long ples i save kisim ol pasindia i go long Jayapura.

Em i tok ol papa bilong bot i save yusim ol imigresen opisa long Vanimo long kisim tredisenel boda krosing permit (TBCs)

long wanem ol pipel bilong PNG husat i mekim pren wantaim ol.

Em i bilip ol papa bilong dispela ol bot i nogat tok orait bilong Gavman long mekim dispela sevis. Em i ting ol dispela bot i nogat ol laip jeket, radio, sefti ikwikmen, na ol masin bilong helpim ol si man long si olsem lo i tok ol bot i mas gat taim ol i ron namel long solwara bilong ol arapela kantri.

Em i go het na i tok i lo bilong kastoms, kwarintain, helt na sekyuriti sek bilong sekim ol man i kam long Indonesia o long PNG i laik go long Indonesia, tasol wantaim kain pasin bilong ol bot bilong ol pipel long ples i go i kam, em i hat long Gavman i sekim ol dispela samting.

Mis Downes i raitim wanpela pas i go pinis long dipatmen bilong Foren Afeas na i autim dispela bel wari bilong em.

Las yia Gavman i stapim Air Niugini sevis namel long Vanimo na Jayapura na dispela i mekim planti lain i yusim ol bot na ka long go i kam long Vanimo na Jayapura.

Long wankain taim, ol pipel bilong ples Skou long sait bilong Indonesia i rausim siks de rot blok bilong Vanimo/Jayapura haiwe long Mande, Januari 18 bihain long ol i blokim rot bikos gavman bilong Indonesia i wok long yusim ol gavman bas na yusim dispela rot long holiide, taim ol i no toksave long ol pipel bilong Skou. Ol pipel i no wari long ol praiwet ka tasol ol i no amamas long bas bilong Indonesia gavman long ron long dispela rot taim Indonesia Gavman i no toksave long ol. Gavman bilong Indonesia i pinisim dispela rot tasol PNG na Indonesia Gavman i no opim dispela haiwe yet.

Aitape plis i no mekim wok bilong kisim bek somil bilong Aitape Daiosis

OL PLISMAN bilong Aitape i no mekim wanpela samting bilong go kisim bek somil bilong Aitape Daiosis bihain long ol pipel bilong Malol i bin go kisim dispela somil long 2:45 long abinun long Desemba 29 las yia. Kos bilong dispela somil we (Foundation of People and Community in Development o FPCD) i bin givim Aitape Daiosis em i klostu olsem K20,000.

Siaman bilong Aitape Daiosis Rihabilitesen Komiti, Baltasar Tas Maketu i tok FPCD i bin givim tupela wokabaut somil long Novemba 1998 long Aitape Daiosis bilong helpim ol lain i kisim bagarap long tsunami long Julai 17, las yia.

Mista Maketu i tok dispela tupela somil em i no bilong wanpela ples o

pipel we tsunami i bagarapim. Nogat. Em i samting bilong Aitape Daiosis na nogat wanpela grup i ken go long daiosis na kisim long laik bilong ol. Em i tok tu olsem FPCD i no givim dispela somil long Aitape Distrik Disasta Komiti na ol pipel bilong Sissano, Warupu, Arop na Malol. Olsem na ol pipel i noken kisim kran-gi tingting olsem olgeta samting ol pipel bilong PNG na ol arapela kantri i salim i go long Aitape em bilong ol stret.

Mista Maketu i tok tu olsem Aitape Daiosis i tokim ol plisman pinis long go long Malol na sasim ol lain husat i kisim dispela soruil na tu long bringim dispela somil i go bek long daiosis tasol i kam inap tude ol plisman i no mekim wanpela samting.

WANTED: "THE TIKTOK GANG"

3 NEW TASTY FLAVOURS ON THE RUN

REWARD: "GREAT TASTING BISCUIT!"

Icecream Lollypop Bubblegum

Olgeta Kristen i mas mekim wok long kamap holi

Toktok bilong ol bisop long Osenia Sinod long Rom stat long namba wan spika na i go long las spika.

WENCESLAUS MAGUN
i raitim

OLGETA Kristen i mas mekim wok long kamap holi long wanem hap ol i stap o wanem kain wok ol i mekim insait long wan wan daiosis. Sapos olgeta i mekim olsem, bai wan wan daiosis i bihainim singaut bilong Rome long kamap holi, Bisop bilong Cisse, Oksileri na Vika Jenerel bilong Daru-Kiung, Reveren Gilles Cote, SMM, i tokim Pop John Paul II insait long Osenia Sinod long Rome. Bisop Cote i tok long mekim dispela, ol Kristen i mas mekim tupela samting:

- Long baptismo, olgeta Kristen i kisim pawa bilong Holi Spirit na olsem olgeta wantaim i mas wok bung long strongim na kamapim gut wok bilong bodi bilong Sios.

"Yumi mas painim rot bilong yusim olgeta pawa i stap long wan wan man na meri. Na olgeta wantaim i mas wokabout long wankain rot bilong bilip, bihainim pasin bilong sori na helpim arapela," Bisop Cote i tok.

- Na long grow wantaim olsem wanpela Sios komyuniti, olgeta Kristen memba i mas stap wantaim insait long tripela hap bilong kamapim *trupela komyuniti*; namba wan - Olgeta i mas painim aut wanem samting God i laikim ol i mekim; namba tu - Olgeta i mas gat wok bilong mekim disisen;

Na las tru - Olgeta i mas wok bung wantaim long karim aut dispela disisen.

Bisop Cote i tok wanpela rot tasol bilong kamapim gutpela Sios long daiosis em bilong bihainim rot we i wok gut long givim spes bai olgeta Kristen insait long daiosis i gat wok bilong mekim.

Em i tok dispela rot inap kamap gutpela rot bilong yusim kalsa bilong ol pipel bilong autim tok bilong God.

Tsunami kilim 2,253 pipel

TSUNAMI long Julai 17, 1998 em i wanpela bikipela disasta insait long Osenia we i kilim 2, 253 pipel na bagarapim foapela ples, Edministreta bilong Aitape daiosis long Papua Niugini, Reveren Austen Crapp OFM i tokim Pop.

Pater Crapp i tok Aitape daiosis i wok kwik taim tru long saplaim ol marasin na ol arapela sevis i go long ol pipel bilong ol ples i kisim bagarap.

Em i tok ol pipel i wari tru na bai kisim longpela taim long helpim ol wantaim ol gutpela skul toktok long tingting lus long dispela bikipela bagarap wantaim Misa na ol sakramen.

Em i tok dispela progrem bai i go inap long tri-o 5-pela yia. Planti ol pipel bilong PNG yet na long ol arapela kantri i soim bikipela marimari long helpim wantaim kainkain samting.

"Dispela hevi i bungim ol Sios long wok bung wantaim tu olsem wanpela sios long helpim narapela narapela. Dispela i givim hop long Kristen bilip long PNG," Pater Crapp i tok.

Wok paul na bagarap i bikipela long palamen

LONG PNG tude, ol lida long palamen i no wari tumas long tok tru. Na tu wok paul na bagarap i kamap na i go bikipela tru.

Insait long dispela hevi, wanpela askim we Sios i mas askim gen em: 'Tok tru em wanem samting?' Asbisop bilong Mosbi, Reveren Brian James Barnes OFM i tok.

"Olsem Jisas i kam long yumi long tok tru (Jn18,37), wankain tasol wok misin bilong yumi em long tok tru long Jisas, toktok bilong em i gat laip.

Yumi mas toktok tu long ol wok paul, ol pasin bilong bagarap laip na pasin bilong gijaman," Asbisop Barnes i tok.

Em i tok planti ol pipel i pilim bikipela pen tru long sindaun na we kantri i wok long go na bel hevi wantaim ol lida husat i no save long wok bilong ol long mekim wok.

Ol pipel i pilim olsem ol i no inap kisim helpim moa na i painim sampela lain long makim maus bilong ol na autim hevi ol i karim i stap.

"Tru tumas sampela lain i mas toktok. Dispela em i wok bilong yumi insait long wok bilong autim Gut Nius bilong Jisas, em i rot, em i tok tru na em i laip bilong yumi," Asbisop Barnes i tok.

Givim moa wok bilong Sios i go long ol le man na meri

GIVIM moa wok bilong Sios i go long ol le man na meri. Dispela em i tingting bilong Rome long wok bung wantaim lida man husat i stap olsem wokboi bilong givim sevis.

Na long mekim sios i wok tru insait long komyuniti, givim moa wok bilong Sios i go long ol le man na meri, na ol pater, bruda na sista i mas wok bung gut wantaim ol le man na meri, Bisop bilong Daru-Kiung, Gerard Joseph Deschamps SMM i tok.

"Larim olgeta wok i mas go long ol le man na meri, olsem bai ol i ken mekim wok bilong ol bihainim wanem kain save na strong ol i gat long hevi bilong taim bilong ol yet, bai ol i ken mekim gut wok bilong ol long sevim Sios (Lumen Gentium, 33). Sapos yumi givim olgeta pawa i go long ol oden minista, yumi lus tingting long wanem kain 'Sios bilong wok bung' we Kaunsel bilong Rome i toktok long en," Bisop Deschamps i tok.

Em i tok dispela em kain Sios daiosis bilong em i traim long wokim bihain long ol i kisim sampela skul Better Wol Muvmen i givim ol.

Toksave:

Wantok bai go het long raitim toktok bilong ol arapela bisop bilong PNG insait long Osenia Sinod long neks wik.

Laip i stap long man na meri wantaim

BILONG statim wanpela famili i mas i gat wanpela man na wanpela meri. Long olgeta famili bilong graun, long santu famili yet, i gat wan wan wari i save kamap.

As bilong planti dispela wari em hia: Ol man i no save sindaun gut wantaim ol meri; na ol meri i no save sindaun gut wantaim ol man.

Ol India i save tok: Dispela wari namel long man na meri i bin kamap long taim God i bin wokim namba wan man na namba wan meri yet. Ol i save stori olsem:


God i wokim man long olkain strongpela samting bilong graun:

Wokim pinis, nau em i bungim olkain naispela, switpela, malumalu samting na em i wokim wanpela meri.

Wokim pinis, nau em i givim meri long man. Na man i amamas.

Bihain long wan wik, man i kam bek long God na em i tok olsem: "God Papa, dispela meri yu bin givim long mi, em i paulim laip bilong mi olgeta. Em i no save malolo liklik long toktok toktok tasol.

Em i laik mi mas oltaim oltaim tingting na wari na



sori long em tasol. Em i save krai kwiktait long olgeta liklik pipia trabel. Em i no inap mekim wanpela strongpela wok.

Mi les long em.....Olsem na nau mi bringim em i kam bek long yu."

God i tok, "Oke, laik bilong yu." Na em i kisim bek meri.

Bihain long wanpela wik gen, man ya i kam bek na i tok, "God Papa, stat long dispela taim we mi givim bek dispela meri long yu, laip bilong mi em i emti tasol.

Olgeta de mi save tingting long dispela meri long yu, laip bilong mi em i emti tasol.

Mi tingim danis bilong em, na luk bilong em, na singsing bilong em, na laip bilong em.

Mi tingim taim em i holim mi, na mi pilim olgeta bodi bilong em i malumalu.

Maski! Mi laik em i kam bek gen."

Orait, God i givim meri i go bek long man.

Bihain long tripela de tasol, dispela man i kam bek gen wantaim meri na i komplem. Em i tok, "God Papa, mi longlong nau. I tru, dispela meri i save givim amamas long mi.

Tasol em i save givim mi planti trabel na wari moa. Ating moabeta em i go bek olgeta long yu.

Mi no inap sindaun gut wantaim em."


"Tasol yu no inap sindaun longwe long em tu," God Papa i tok.

Na em i larim meri i stap wantaim man. Em i no kisim bek meri.

Nau man i paitim poret bilong em na i tok, "Bai mi mekim wanem samting nau?"

Long taim meri i stap, mi no hepi.

Na long taim meri i no stap, mi no hepi tu. Olabo! Mi longlong nau."




Nupela diken bilong Hagen

• Bisop Herman Raich SVD bilong Wabag Daiosis i odenim Bonipas Umba (Kindeng peris long lep han), Clement Papa (Kuli peris long namel) na Caspar Wop (Rebiamul peris long rait han), long Desemba 20, 1998 na ol i kamap Diken.

Poio: Bruda Aloysius Aisi.

Madang Nius



Matulon wanpisin askim gavman long givim bek graun bilong ol

MARGARET MUNJIN i raitim

OL PIPEL bilong Matulon wanpisin insait long Madang taun eria i askim Nesenel Gavman long givim bek graun bilong ol stat long Jomba plein i go long Modilon Jomba insait long Madang taun.

Siaman bilong Matulon graun, Paul Kamang i tok Gavman i bin kisim nating graun bilong ol, taim wanpela kampani ol i kolim 'German Niugini Kampani' i kisim graun bilong ol long 1888 aninit long lukaut bilong ol arapela kantri olsem Jemeni na Australia. Stat long dispela taim i kam inap tude ol as papagraun i save go long bik bus long wokim gaden o painim abus. Mista Kamang i tok taim gavman bilong Jemeni na Australia i lusim PNG, na taim PNG i kisim indipendens long 1975, gavman bilong PNG i i kisim ol dispela graun na i mekim wok antap long en inap long 22 yia olgeta. Tasol long dispela taim i kam inap tude, i nogat ripot i soim stret pasin bilong baim dispela graun long ol papagraun.

Kamang wantaim ol arapela papagraun i winim pinis wanpela 'Setifiket bilong Rekognisen' olsem ol i papagraun tru bilong dispela graun long Oktoba 6, 1998 na nesenel gavman i gasetim dispela long Nesenel Gaset namba 6119 bilong Oktoba 15. Dispela Setifiket bilong Rekognisen i

Pengau tenkim ol provinsal memba

NAMBA tu Gavana bilong Madang Provinsal Gavman, Pengau Nengo i givim bikpela tok tenkyu na hamamas i go long olgeta memba bilong asembli long mekim 1998 wanpela gutpela yia long politik insait long provins. Em i mekim dispela toktok long wanpela pati ol i holim long Siar ples bihain tasol long provinsal asembli i pasim K43,278,600 long Desemba 30.

"Mi givim bikpela tok hamamas i go long yupela olgeta nesenel memba bilong palamen na olgeta presiden tu wantaim olgeta arapela memba bilong asembli long gutpela sapot bilong yupela, yupela i givim mi na Gavana Jim Kas long 1998. Olsem na mi askim long yupela mas wokim wankain long 1999," Mista Nengo i tok. Em i tok: "Maski nau gavana i stap long kalabus, mipela kisim edvais bilong loya bilong mipela long wet tasol long apil bilong em long suprim kot. Bikos long dispela mi mas givim ken bikpela tok tenkyu i go long yupela long wanem i no gat hevi inap nau na mi askim yupela olgeta long wok bung wantaim gen long 1999 tu."

Mista Nengo i tenkim tu olgeta pipel bilong Madang long gutpela luksave bilong ol na wok bung wantaim gavman na em i askim ol long mekim wankain pasin long 1999. Em i tenkim tu olgeta nius ripota insait long provins na tu long kantri long gutpela wok bung na askim ol long mekim gut dispela wok bilong ol gen long dispela yia long helpim kisim ol toktok i go long ol pipel bilong PNG na tu long provins bai ol i ken save long wanem kain wok gavman i laik mekim o bringim. Na tu long stiaim gavman sapos gavman i mekim sampela asua.

soim ples klia olsem ol i papa tru bilong dispela graun na gavman i mas luksave long dispela na givim bek graun bilong ol.

Kamang wantaim ol arapela papagraun nau i laikim bek graun bilong ol na ol i askim Nesenel Gavman long stretim tok na tokim ol wanem samting i wok long kamap. Bihain long longpela taim bilong ol papagraun i karim pen, ol i laikim bek graun bilong ol bai ol i ken mekim sampela wok long helpim ol yet. Em i tok ol papagraun i no laik long kisim lo i go long han bilong ol yet bilong stapim ol wok bisnis na ol arapela wok developmen long dispela graun nau ol i tok pait long en. Tasol ol i laikim gavman long givim bek dispela graun ol i kisim aninit long kontrak bilong 'lease' olsem bai ol papagraun i ken mekim sampela bisnis na kisim mani long ol arapela developmen i kirap pinis long dispela graun.

Kamang i tok 'lease' bilong dispela graun i pinis bikos 99 yia kontrak bilong 'lease' long dispela graun i pinis na nau graun i mas go bek long ol as papagraun stret.

Madang PEC rausim Mollok long asembli miting

BEN TAUMAI i raitim

MADANG Provinsal Eksekutiv Kaunsel i rausim memba bilong Bogia, Bernard Mollok long i no inap stap insait long Madang Provinsal Asembli miting long bihain taim bikos provinsal eksekutiv kaunsel i bin rausim em long wanem em i bin lusim asembli miting tripela taim.

Eking Siaman na namba tu gavana Pengau Nengo i tokaut long dispela bihainim ogenik lo.

Ogenik lo i tok olsem sapos wanpela memba i lusim tripela miting bilong provinsal asembli, ol ken rausim ol long kamap bihain long ol narapela miting.

Nengo i tokim *Wantok Niuspepa* olsem em i sori tru long ol pipel bilong Bogia bikos ol bai nogat memba i makim ol long provinsal asembli. Tasol em i orait, tripela kaunsel presiden bilong Yawar, Almami na labu bai makim ol.

Mista Nengo i tok, dispela disisen em bilong PEC na i nogat sampela samting i go wantaim dispela tingting bilong ol i laik kamapim vot i nogat bilip long Gavana Jim Kas.

"Mipela bihainim ogenik lo na em samting bilong memba bilong Bogia long go bek long Bogia na toktok wantaim na eksplenim long ol pipel bilong Bogia."


Mi no inap go na toktok na toklia i go long ol pipel bilong Bogia," Mista Nengo i tok. Em i

tok long nesenel palamen, Mista Mollok bai makim ol pipel bilong Bogia yet tasol i no long provinsal asembli.

PEC i givim blesing long dispela disisen na salim pinis wanpela kopi bilong dispela disisen i go long minista bilong provinsal afes na Lokol Level Gavman na tu long nesenel eksekutiv kaunsel long kisim blesing bilong ol.

Saspensen bilong Mista Mollok em i namba wan tru long histori bilong Papua Niugini bihain long rifom i kamap 8-pela krismas i go pinis.

Wantok i no inap kisim sampela toktok o bekim i kam long memba bilong Bogia bikos em i stap long Mosbi.



Madang namba tu provinsal bilong kisim moa turis

• **Wanpela samting i save mekim planti ol pipel bilong PNG na ol arapela kantri i amamas long go long Madang em long pasin tumbuna bilong ol pipel bilong Madang. Na tu ol pipel bilong Madang i gat bel isi pasin na rispek long ol arapela pipel na turis. Poto i soim olsem ol pipel bilong Kayan long Bogia i holim yet pasin tumbuna bilong ol.**

MADANG em i namba tu provins insait long kantri bilong ol turis i go lukim. Wanpela ripot bilong Turism Promosen Atoriti i tok. Madang i bin kisim 289 turis aninit long Mosbi wantaim 579.

Tasol ripot i tok, Mosbi i gat moa turis tasol dispela i no min olsem ol turis i kam bikos ol i laik lukim Mosbi. Dispela i soim olsem Mosbi

em ples we ol i save kam insait long PNG pas-taim na bihain go long wanem ol provins ol i gat laik long lukim. Ripot i soim olsem planti ol turis bilong Amerika i save kam na go long ol ples olsem Tari, Western Hailens, Sepik, Madang na Niu Briten bihain long ol i kam long Mosbi.

Ripot i tok tu olsem moa long 30 pesen bilong ol turis i kam long Australia i save

go long Madang na Morobe provins long kisim malolo. Wanpela wok painim long ol arapela kantri i soim olsem moa long 30 pesen bilong ol turis i bin go long Madang na Sepik. Ripot i tok tu olsem ol mani man-meri i putim Madang namba wan provins bilong lukim taim ol i kam long PNG long dispela yia.

Bus marasin dokta i helpim ol pipel bilong Madang

JOE KRAMMER i raitim

WANPELA savemeri bilong bus marasin, Dokta Nancy Aramburo bilong Filipins i raun long ol ples insait long Madang na givim skul long ol pipel long yusim ol bus marasin bilong pinisim ol kainkain sik na sua long bodi.

Dokta Aramburo i gat save bilong "Regflexology na Naturopath". Em i tok em i helpim planti ol lain i gat kensa long nek na ples bilong karim na ol arapela sik olsem leprosi, leukemia, malaria na malaria long het. Taim em i givim marasin long ol man meri na pikinini i gat sik em i save tokim ol long yusim wanem kain graun, lip, diwai o wara bilong

wanem kain rop bilong bus long dring bilong kamap gut gen. Em i bilip olsem: "Yu inap stretim olgeta sik tasol yu i no inap stretim man".

Wanpela we bilong kain wok em i save mekim em olsem long putim presa long pinga bilong lek na larim win i go long het na stapim sik. Em i tok em bai skulim ol pipel long we bilong kikai retpela graun o wasim

gras bilong ol wantaim dispela graun long kilim ol waitspot na ol arapela sik bilong skin na bodi. Dokta Nancy i go long planti ples na setelmen na long ol "Women na Yut in Developmen Senta" na skulim ol pipel i husat i no kisim sevis long gavman. Husat i laikim bus marasin bilong stretim sik bilong ol i ken go lukim Dokta Nancy long Madang.

Lae Nius

Morobe sanapim polisi bilong 5 yia plen

MOROBE Provinsal Gavman i sanapim pinis 5-pela developmen polisi bilong wok bihainim insait long 5 yia plen bilong em, Gavana Luther Wenge i tokaut long dispela insait long 1999 provinsal baset ripot bilong em long Desemba, 1998.

Ol dispela developmen polisi em;

- Strongim demokretik gavman long olgeta level (ol lokol level gavman).

- Developim strongpela provinsal ekonomi (bisnis insait long provins).

- Kamapim gutpela helt na gutpela sindaun insait long komyuniti.

- Developim distrik na lokol level gavman sevis senta.

- Developim na stretim gut trenspot sevis, komyunikesen na gutpela wok bilong pulim pawa lait i go long ol asples.

Mista Wenge i tok long luksave na strongim wok bilong ol lokol level gavman, provinsal gavman i oraitim na putim sampela mani moa olsem yunaitet grent i go long wanwan lokol level gavman na tripela nomineted memba bilong Tutumang. Baset alokesen aninit long palamentri seksen em K1,550,000 bai inap olsem K50,000 long wanwan lokol gav-

man na ol memba i go pas, Mista Wenge i tok.

Gavana Wenge i tok dispela mani em bikpela samting bikos em bai lukautim wanem kain projek. Aninit long K15,000 we i no stap insait long 5 yia developmen plen o baset. Polisi gaidlain bilong dispela fan i redi pinis long strongim ron bilong dispela plen.

Mista Wenge i tok em i amamas olsem wok bilong karimaut provinsal na lokol level gavman isait long Morobe i wok long kamap gut na go pas long planti arapela provins. I gat sampela hevi long mani tasol dispela i no stopim wok long go het.

Baset ripot bilong 1999 i soim olsem total mani gavman bai kamapim aninit long 1999 baset em K76,793,390 (klostu K77 milien). Dispela em K10 milien sot long K87 milien baset bilong las yia 1998.

Gavana i tokaut olsem bikos bikpela senis i bin kamap long nesenel gavman grent long 1998, Morobe i kisim K54 milien na long dispela yia 1999 Morobe bai kisim K42 milien Dispela em K11 milien sot long dispela yia.

Ol dispela hap mani em nesenel gavman i putim i go insait long nupela dipatmen ol i kolim Rurel Developmen Dipatmen. Olsem na

Morobe administresen i askim Rurel Developmen Dipatmen long sampela helpim na dipatmen i wanbel long givim K9 milien.

Na dipatmen i tok tu olsem em bai helpim Morobe administresen wantaim moa mani bilong kirapim ol projek we kos bilong ol i antap moa long K9 milien, baset ripot bilong Gavman Wenge i tokaut.

Mista Wenge i tok mak bilong mani Morobe gavman i lukluk long kamapim long dispela yia em K34,399,490 (K34 milien). Na taim nupela takis sistem ol i kolim Velu Eded Takis (VAT) i kamap, bai Morobe gavman i kisim narapela K12 milien antap.



**Petrol i sot?
... Yu yet
nau!**

- Wok man bilong Telikom, Rex Duali, bilong Lae i baim petrol long mani bilong em yet long yusim Telikom bas long wok bilong kampani. Kampani i save baim 20 lita petrol long Mande, Trinde na Fraide. Taim petrol i sot Tunde na Fonde, ol draiva yet i mas stretim long poket bilong ol.

Foto: Franco Nebas

Wenge laik kisim Cuzman famili go long Lae

YAKAM KELO i raitim

MOROBE Gavana Luther Wenge i redi long kisim Cuzman na meri bilong em wantaim 7-pela pikinini i go long Lae givim wok na lukautim ol long hap sapos Foren Afeas dipatmen i stretim pepa bilong ol.

Mista Wenge i tokaut long las wik olsem Cuzman i no wangepa raskel o trabelman husat i ronawe long kantri bilong em i kam long PNG. Insait long tripela krismas olgeta Arnold Cuzman wantaim famili bilong em i stap long Mosbi, em i no mekim wangepa trabel, Mista Wenge i tok.

Gavana bilong Morobe i tok PNG Gavman i mas skelim gut Cuzman wantaim famili bilong em bihainim pasin bilong ol man.

Bikos PNG em i ples bilong laikim narapela manmeri, lukautim arapela husat i bungim hevi, soim narapela long rot sapos em i paul na welkamim ol arapela lain husat i kam long narapela hap. Olsem na mipela i mas soim tru pasin bilong PNG taim mipela i laik lukluk long hevi na sindaun bilong dispela famili.

Cuzman wantaim meri na ol pikinini bilong em i bin lusim kantri bilong ol long Romania na i kam long PNG long 1996 i laik go long Australia.

Tasol taim ol i kam long PNG, pepa bilong ol long kam insait long narapela kantri i bin stap long hevi olsem na opis bilong Foren Afeas i laik salim ol i go bek long Romania. Tasol Foren Afeas Dipatmen ino stretim pepa bilong ol na ol i stap yet inap nau long Mosbi.

Morobe Gavana i tok Gavman i ken givim wangepa pepa ol i kolim Pemisiv Residensi we i wankain olsem ol manmeri bilong Wes Irian i save kisim long stap long PNG na wok long hia. Famili bilong Cuzman i ken kisim dispela pepa na wok long PNG inap tripela krismas we Gavman i laik rausim ol o givim ol pementent residensi pepa long stap long PNG, Mista Wenge i tok.

Mista Wenge i tok Cuzman em wangepa man husat i ken wok na em i bilip Cuzman i ken kamapim sampela gutpela samting i kamap sapos PNG Gavman i marimari long em.

Em i tok sapos Gavman i marimari long Cuzman na famili bilong em, em i redi long kisim ol i go long Lae na givim em wangepa graun bilong em i ken stap na wok long em.

Mista Wenge i tok Gavman bilong PNG i mas pilim sori nau long dispela famili bilong Romania bikos ol i stap long bikpela pen, bel bilong ol i bagarap pinis na sindaun bilong ol i nogut olgeta.

Cuzman i tok sapos PNG Gavman i laik rausim em, ol i mas hariap stretim pepa bilong em na rausim em i go na i no ken westim taim wantaim pepa bilong em.

Cuzman i gat wangepa las pikinini meri nem bilong em Mirriam Naomi we mama i karim em long PNG. Em i gat wangepa krismas nau.

Wau - Bulolo kompensesen nogat papa tru yet, Wenge i tok

YAKAM KELO i raitim

MOROBE Gavana Luther Wenge i tok nogat man i papa yet long Wau Bulolo graun we Gavman bilong em i laik askim Australia Gavman long baim kompensesen long en.

Mista Wenge i tok em i no luksave long husat i papa tru bilong dispela graun bikos dispela i no wok bilong em long tokaut long husat em papa tru bilong Wau Bulolo graun. Dispela em samting bilong kot long tokaut.

Gavana Wenge i tok em i karimaut wok tasol nau long traim kisim kompensesen long bagarap we i bin kamap long Wau Bulolo eria long taim bilong gol maining bipo.

Nau ples i bagarap na em i laik kisim kompensesen we i sut long stretim gen

ples long hap. Taim mi winim dispela wok na kisim kompensesen mani ya i kam, ol lain husat i gat toktok long dispela graun i ken go long kot na tokaut long kot.

Na kot yet bai tokaut long husat em papa bilong graun, i no mi bai tokaut long papa tru bilong graun, Mista Wenge i tok.

Em i askim ol pipel bilong Wau Bulolo husat i wok long tok hat long em olsem em i no mekim gutpela toktok long sait bilong ol papagraun.

Mista Wenge i askim ol dispela asples long i noken mekim planti toktok tumas long niuspepa bikos nogat wangepa samting tru i kam yet.

Tasol em i askim ol long i mas kam na sindaun wantaim em long tokaut long hevi na wari bilong ol na i noken go long publik long niuspepa o redio.

Gavana i tok sapos dispela kompensesen mani i kamap, bai Gavman i laikim olsem mani i mas go long stretim ol rot, bris, haus sik, skul, stretim ol bus na eria we i bin bagarap long wok maining na ol arapela bikpela sevis bilong helpim ol pipel.

Sampela liklik mani i stap bek bai ol asples o papagraun i ken kisim taim kot i luksave long ol, em i tok.

Ol pipel bilong Wau Bulolo i bin givim wangepa petisen i go long han bilong Gavana Luther Wenge long givim long Praitim Minista Bill Skate we em i ken givim i go gen long Gavman bilong Australia.

Dispela petisen i askim Gavman bilong Australia long baim ol bagarap i bin kamap long graun na bus bilong Wau Bulolo long taim bilong wok gol bipo. Dispela kompensesen i sanap olsem K700 milien.




Piksa i soim wanem samting wok long kamap long Finsafen

• **ANTAP:** Ol singsing grup bilong ples Simbang long Finsafen pulim ol manmeri i go long bikpela bung bilong Finsafen.



• **RAITHAN:** Outsait bilong Agororo sios long Yunzain ples Finsafen.



• **ANTAP:** Maneba bris long Finsafen.

• **LEPHAN:** Dispela piksa i soim Qoya bris long Finsafen distrik we i stap long mak bilong pundaun sapos ol ino hariap long stretim.

Wanpela meri Morobe i kotim man bilong em long smokim spak brus na i save paitim em olgeta taim. Meri ya i tokim ol plis long las wik taim man bilong em i smok na i go paitim em.

Plis i bin go insait long haus na painim sampela karamap spak brus (mariwana) long haus bilong man ya na meri bilong em. Olsem na ol i holim em na sasim em long smokim spak brus.

Meri Morobe kotim man bilong em

Ekting Provinsal Plis Komanda Simon Yipam i tok ol plisman bilong em i bin go long Morobe Distrik So long las wik taim dispela meri i bin kamap na mekim dispela ripot long ol.

Long wankain hevi tu, Mista Yipam i tok ol plisman i holim tupela man wantaim ol karamap spak brus we tupela i laik kisim i

go long Morobe. Tupela i kalap long bot taim ol plisman i sekim tupela na painim ol dispela spak brus long han bek bilong tupela. Tupela nau i stap long Lae plis sel long wetim kot bilong tupela.

Mista Yipam i tok dispela trabel i bin kamap taim ol manmeri i go amamas long lukim Morobe Distrik So. Tasol olgeta samting

bilong so i bin kamap gut tru na i nogat trabel i kamap inap tripela de bilong so i kamap na pinis long Sande las wik.

Mista Yipam i tok dispela i bin wanpela gutpela so tru we i bungim ol pipel bilong arapela kaunsel eria long Huon Galp ilektoret na ol pipel i amamas gut wantaim.

Ol plisman i bin go stap tasol long kamapim wok sekyuriti long ol pipel long amamas bilong ol.

Duaks ben bilong Lae i bin mekim pairap wantaim musik bilong ol long nait na ol manmeri i kilim skin tu i go tulait long amamasim dispela distrik so.

Mista Yipam i tok em i amamas ol manmeri i soim rispek long narapela narapela na i nogat trabel i kamap.

Lukaut long laitim paia nabaut

Ol pipel bilong Lae siti na Morobe provins i kisim tok lukaut long i no ken laitim paia nabaut arere long rot o bus.

Ekting Provinsal Plis Komanda bilong Morobe provins Simon Yipam i tok ples i wok long kamap drai nau na i nogut long laitim paia nabaut bikos paia i ken kamapim bikpela birua long dispela taim.

Mista Yipam i askim tu ol arapela manmeri long toksave long ol plisman sapos ol i lukim arapela lain i wok long laitim paia nabaut long rot o bus arere long ples o gaden.

Mista Yipam i tok laitim paia nabaut em lo i tambu na man o meri i sakim dispela tambu bai kisim sas bilong lo.

Mista Yipam i mekim dispela tok lukaut long ol manmeri bilong Morobe provins na Lae siti long lukautim gut ol samting na ples bilong ol long birua bilong paia.

FETI helpim ol pipel long lukautim timba

FRANCO NEBAS i raitim

FINSCHAFEN Eco-Timber Intergrated (FETI) em wanpela program we ol Lutheran Development Service (LDS) i bin kamapim long helpim ol lokol komyuniti


long menesim fores (timba) risos na tu long kirapim gut teknikal na maket wok bilong ol liklik timba operata.

Opis bilong FETI em i stap long Heldsbach misen stesin autsait long Gagidu stesin long Finsafen. Man husat i go pas long dispela program em, Volker Schiller olsem kodineta.

FETI program i bin kamap bihain long LDS i lukim ol pipel na ol ovasis kampani i wok long kam insait katim timba nabaut na bagarapim ol fores. Ino ol timba kampani tasol i bagarapim ples tasol ol pipel tu we ol i katim bus na kukim nabaut.

Long dispela as LDS i bin toktok wantaim ol rural komyuniti long kamapim dispela program long lukautim na menesim fores gut.

Ol i bin kamap wantaim wanpela plen na salim igo long ovasis long kisim helpim. Long yia 1997, askim bilong ol long mani (fans) i bin karim kaikai we ol i go het wantaim dispela program. Tasol ol lain husat i givim helpim i tu-bel liklik na i askim ol LDS



• Sampela timba we i kam a ananit long Feti program i stap long shed long Finsafen.

long wokim moa stadi long ol ples na givim ripot i go bek long ol olsem dispela program bai karim kaikai. Long dispela as FETI program i bin ron isi tasol long yia 1998 we ol wokman (konsaltan) i go het long stadi bilong ol.

Long dispela taim yet em Kambang Holdings, wanpela bisnis han bilong Luteran i salim wokman (konsaltan) bilong ol i go limlimbur long ol ples long Finsafen na toktok wantaim ol pipel long ol hevi we i bungim ol long dispela program bilong FETI na kisim tingting bilong ol na salim igo long ol ovasis dona.

Man husat i bin go pas long dispela wok em Kamung Matrus husat i bin go long Finsafen na toktok wantaim ol pipel long wanem as dispela program i bin mekim na stopim ol long go het wantaim ol projek bilong ol.

Planti bilong ol dispela projek em liklik timba so mill we i stap long ples Nanduo, Wareo na Masaweng.

Kodineta bilong FETI Volker Schiller i tok olsem ol pipel i save pinis long kisim ol fri-mani gavman i givim na ino save tingting long mekim wok ol yet, long dispela as em i hat long developmen i kamap. Schiller i tok, "FETI nau i wok long helpim ol

long yusim ol dispela samting (risos) we i stap pinis long kirapim ol wok gen."

Long dispela taim tu wok man bilong Kambang Holdings Matrus Kamung tu i wok long go het wantaim ol toktok bilong em wantaim ol pipel long painim aut wanem ol hevi i mekim na ol projek ol i wokim i pundaun.

Kamung husat bai pinisim dispela raun bilong em bai ripot bek long ol bos bilong em we ripot bai i go long ol ovasis dona long lukim na skelim bipo givim sampela moa fan long ronim dispela projek.

NGO i gat laik long helpim long developmen



• Memba bilong Finsafen Alfred Pogo (namba tu long raithan) i wokabaut i go long bikpela bung bilong ol Finsafen pipel long krismas de. Foto: Franco Nebas.

NON-Gavman Oganaisesen (NGO) grups i gat laik long helpim long bringim developmen i go insait long Finsafen Distrik tasol pipel na Gavman long hap ino wok bung wantaim ol.

Namba tu vais presiden bilong Yabim / Mape-lokal levul Gavman Kaunsel Manase

i tok aut long dispela toktok long wanpela liklik bung wantaim ol nuisman long Gagidu long tupela wik i go pinis.

Manase i mekim dispela toktok bihain long wanpela Forum (miting) we nupela memba bilong Finsafen Alfred Pogo i bin holim long ples Simbang long Finsafen.

Dispela bung em long painim wanem as tru na developmen ino kamap insait long Finsafen moa long planti yia i go pinis.

Long dispela bung ol saveman bilong Finsafen yet husat i wok long olgeta hap long kantri na holim ol bikpela wok i kamap tu na putim ol tingting bilong ol long bringim ken developmen long distrik bilong ol.

Manase i tok, "ol NGO grup i gat bikpela laik tu long bringim developmen i kam insait long distrik tasol yumi yet ol pipel wantaim gavman bilong yumi ino wok bung wantaim long larim ol i kam insait."

Dispela long wanem long taim bilong dispela bikpela bung, ino bin gat maus man bilong ol NGO o ol NGO grup husat i stap pinis long Finsafen na mekim ol wok i stap kamap na givim ol toktok bilong ol long wanem hap ol i ting i stopim developmen long Finsafen." em i tok.

Long Finsafen Distrik yet i gat samting olsem 4-pela NGO grup i stap pinis we ol i wokim long mekim ol wok wantaim ol pipel long ples. Ol dispela grup we istap long Finsafen em, Habitat For Humanity, FETI, American peace Corp na European Union husat tu i soim laik pinis long joinim ol arapela tripela.

Ol dispela grup em wanem ol projek ol i mekim em, Habitat For Humanity i helpim ol pipel long mekim nupela stail haus, FETI long lukautim fores na menesim gut wantaim ol liklik so mil, American pis Corp ol i helpim ol pipel long Malisiga na Tami Alan long salim ol karvins (crafts) bilong ol.

Manase i singaut strong long Gavman long luksave long ol dispela lain na wok bung wantaim ol long bringim gutpela developmen long Finsafen distrik.

Provinsal seavings na lon sosaiti bilong Morobe

BUSTIN ANZU i raitim

MOROBE Provinsal Asembli (Tutumang) i kamapim wanpela tingting pinis long kamapim wanpela seavings na lon sosaiti bilong em insait long provins. Dispela sosaiti bai kam aninit long lukaut bilong divisen bilong komes.

Long setim dispela sosaiti, baset bilong Morobe Provinsal Gavman i putim pinis

K300,000 long kamapim dis-

pela wok. Dispela kain helpim bilong Tutumang bai go het long narapela tupela o tripela yia inap dispela seavings na lon sosaiti i sanap strong em yet.

Long taim Gavana Luther Wenge i kamapim dispela baset ripot, em i askim olgeta distrik na lokal level gavman long sapotim dispela sosaiti.

"Mi laik askim olgeta distrik na lokal level gavman long sapotim dispela sosaiti na dispela bai yumi luksave husat i manmeri bilong wok na husat i

les manmeri." Wenge i tok.

Dispela sapos i kamap tru, em bai helpim planti ol manmeri husat i save wokim ol liklik bisnis insait long ples long kisim dispela mani long wokim ol liklik wok na bihain bekim wantaim sampela interes.

Dispela seavings na lon sosaiti i wankain olsem sosaiti bilong plis,ami, na ol arapela insurens kampani we ol manmeri kamap memba na kisim mani long sampela hevi na bihain bekim.

Agrikalsa stadi long Garaina na Menyamya

BUSTIN ANZU i raitim

MOROBE Provinsal Gavman i wok strong nau long strongim wok bilong agrikalsa na dispela tu i ken strongim ol ikonik developmen insait long provins.

Long ol narapela stori bilong bisnis Gavman i laik mekim sampela wok painim aut long wanem kain wok didiman i ken kamapim long dispela tupela hap, Garaina Veli na Menyamya.

Ol saveman bilong wok didiman

bai mekim wok painimaut na bihain toksave. Sapos dispela i kamap tru, em bai kamapim wok moni bilong ol lain long dispela hap na sem taim tu bai kisim developmen i go insait long ol ples.

Wankain projek olsem tu i bin kamap long Makam we nau ol save-man bilong planim rais i kam na wok long dispela hap.

Sapos ol i painim gutpela stori long dispela tupela ples, em bai helpim ol pipel bilong Morobe long developim provins bilong ol yet.

Hamelengan skul long Kabwum redi long stat

KLOSTU bai 1999 skul yia i stat na ol papamama wantaim ol pikinini na ol skul tisa i redi long mekim wok long skul.

Memba bilong Kabwum Ginson Saonu i bin raun long ilektoret bilong em na lukim Hamelengan komyniti skul long Kabwum distrik las wiken long sekim wanpela nupela klasrum em yet i bin sapotim wantaim mani na skul i kamap long las yia.

Ol pipel yet i sanapim dispela klasrum na Mista Saonu i amamas long dispela projek na givim K1,000 long pinisim olgeta wok bilong dispela klasrum.

Memba Ginson Saonu i tokim ol

pipel bilong Hamelengan olsem mi bin givim yupela liklik mani tasol yupela i mekim bikpela wok na sanapim klasrum bilong yupela. Dispela i soim olsem yupela i laikim edukesen sevis i kam long yupela. Olsem na mi givim yupela K1,000 long pinisim dispela klasrum.


Ol lida na pipel bilong Hamelengan ples i amamas long memba i mekim dispela raun i go lukim ol na ol i askim em long sapotim skul bilong ol long kamap strong. Sapos memba i ken mekim olsem bai ol tu i sapotim em i go inap long taim bilong nupela ileksen i kam long yia 2002, ol i tokim Mista Saonu.



■ Memba bilong Kabwum Ginson Saonu i sanap wantaim ol bikman na ol manki bilong Hamelengan ples long las wik



INDEPENDENT STATE OF PAPUA NEW GUINEA LAND ACT OF 1996 AS AMENDED TO DATE LENS DIPATMEN



RENT NOTIS PEPA

Lens Dipatmen i salim i go aut pinis ol len rent notis pepa bilong 1999 long olgeta husat nau i wok long lisim graun bilong Gavman. Sapos yu i no kisim yet rent notis pastaim long namba 15 dei bilong mun Februari, 1999 orait yu mas ringim **HELPIM DESK** long **telipon namba 301 3202**.

Yu husat lisim graun bilong Gavman, i mas baim rent moni nau i go pinis long mun Mas, 1999. Bihain long mun Mas bai Lens Dipatmen i stat long kisim bek graun wantaim impruvmen taim yu putim baksait long ino baim rent moni bilong graun.

Lens Dipatmen i bin kisim bek planti lis graun wantaim improvements long yia 1998. Rot bilong bihainim na kisim bek lis graun lon dispela yia, ol loya bilong Gavman mekim isi tru. Olsem na Dipatmen bai hariap tru long luksave long husat i no baim rent na bai kisim bek planti lis graun long olgeta hap bilong kantri.

Sapos yu no klia o i laik kisim moa save, orait ringim **telipon namba: 301 3202**. Na tu i ken salim pas i kam long Secretary, Lands Department, P.O. Box 5665, Boroko, NCD, na raitim **Attention: Revnue Officer**

6 De bilong mun Jenuari, 1999.

MORRIS ALALUKU
Sekreteri bilong Lens

SAUTEN RIJON NIUS

Sentrel plis i bin mekim gutpela wok wantaim ol pipel

SENTREL RIPOT**FIRMIN G NANOL i raitim**

PLIS long Sentrel provins i bin mekim gutpela wok na i no bin gat planti birua o hevi i bin kamap long krismas na niu ya, Ekting Sief Inspekta na Sentrel plis Provinsel Plis Komanda Fred Yakasa i tok.

Em i tok tu olsem ol man long ples i bin helpim ol plis long ka na bot bilong ol yet long mekim patrol na karim aut gut wok bilong plis.

Mista Yakasa i tok tu olsem i no bin i gat wanpela trabel o birua i bin kamap long sentrel provins bikos ol plis ofisa long ol ples i toksave long ol pipel long stap isi na noken bikhet long taim bilong holide.

Em i tok olsem ol i bin karim aut wanpela bikpela kempein long ol ples na tokim ol manmeri long stap isi na noken bikhet long krismas na niu ya. Mista Yakasa i bin tok olsem ol manmeri i bin harim gut tok bilong


plis na ol i bihainim wanem tok ol kaunsela na lida man bin mekim. Em tok olsem long dispela as tasol ol plis i no bin gat hatwok na tu nogat trabel i kamap long ples.

Mista Yakasa i tok, "mi save bilip strong long ol pipel olsem na mi yet mi bin go aut long ol ples na toktok wantaim ol pipel long wanem gutpela we ol pipel i laik bai plis i wok wantaim ol long mekim krismas na niu ya i kamap gutpela". Na em i tok tu olsem em i gat bikpela hamas long we ol viles kaunsela na ol lida i bin wok bung wantaim na mekim gutpela wok long dispela taim.

Em i tok "dispela em i min olsem plis na na ol lain long komyuniti i bin wok bung wantaim na tu bai wok bung yet long stapim lo na oda problem long Sentrel provins". Mista Yakasa i bin tok olsem ol manmeri long ples tu i bin stap isi na i no mekim wanpela trabel o raun nating long nait taim. Em i tok olsem i no bin gat wanpela spak pasin tu long ples.

Em i bin tok olsem plis long Bomana plis Koles na Kairuku-Hiri sait tu i bin kamap long helpim ol Sentrel plis. Em i tok olsem ol plis i bin go inap long hap bilong Aroma, Yule Island, Gabagaba viles na Kwilkila na ol i bin mekim bikpela wok long salim ol resev plis long olgeta hap bilong Sentrel provins. Em i bin tok tu olsem ol Mobil Skwat i bin mekim gutpela wok tu long haiwe na sekim ol ka na ol lain husat i bin karim bia igo long ples.

Mista Yakasa i bin tok olsem ol plis man i bin mekim gutpela wok tru na ol i bin haijekim na kisim sampela bia katen olsem 40 katen olgeta long sampela lain husat i bin karim igo long hap bilong Rigo long Sentrel provins. Em i tok olsem ol i tokim ol plis long sasim na kisim ol katen bia we i moa long 4-pela katen bikos em i tok olsem ol bai drink spak na mekim trabel na bagarapim sindaun bilong ol manmeri long ples husait i laik hamamas long gutpela taim.



■ Sentral Plis - wok long rausim sampela bia katen long Gaba Gaba Kona rot long hap bilong Rigo long Sentral Provins long Krismas na Niu ya.

1,400 Wes Irian bai kisim pepa bilong raun fri

IAN KAKARERE i raitim

MAK olsem 1,400 manmeri bilong Wes Irian long Is Awin refuji kem long Westen provins bai kisim tokorait bilong PNG Gavman long stap na raun fri insait long Papua Niugini.

Long dispela wik Fraide Januari 15, 1999 ol bai kisim dispela pepa ol i kolim pemisiv residensi setifiket we ol i ken painim wok insait long kantri, putim ol pikinini long skul na yusim servis Gavma bilong PNG i kamapim. Dispela 1,400 manmeri i makim 362 famili olgeta.

Ol arapela Wes Irian manmeri husat i stap long arapela refuji kem long boda bilong PNG na Indonesia i no inap kisim dispela pepa inap ol i go stap long Is Awin kem inap 6-pela mun. Bihaun ol i ken askim long kisim

dispela pepa bilong givim freedom long ol i ken raun na stap long wanem hap kona bilong Papua Niugini.

Long arapela ripot bilong Is Awin refuji kem, plis long Kiunga i bin holim 5-pela man long sas bilong bagarapim ol samting, holim ol sotgan na birua samting na pretim wanpela plisman.

Not Flai plis komanda Sief Inspekta Saibu Ako i tok dispela hevi i bin kamap taim wanpela kros namel long ol pipel i kamap na i go bikpela.

Dispela kros i bin kamap oihainim stori olsem wanpela wantok bilong hetmasta long skul long hap i bin slip wantaim wanpela meri bilong Waraston long Desemba las ya. Ripot i tok tu olsem ol pipel bilong Waraston i belhat moa taim ol i harim olsem dispela hetmasta i bin putim ol skul pikinini bilong

ol Montfort praimer skul long panismen bikos ol i no bin go skul long Desemba 1, 1998. Long Desemba 1, 1998, ol skul pikinini i stap wantaim papama bilong ol bikos ol Wes Papua pipel i tingim Independens de bilong ol taim Nedalen i bin givim ol long 1962. Long dispela taim ol i apim flak bilong ol i go antap we olgeta refuji manmeri long Waraston i witnessim.

Dispela belhat i mekim na ol i pulim lain i go na brukim haus bilong dispela hetmasta na bagarapim ol samting long haus.

Ol i kisim sotgan tu na sut i go long haus bilong plisman long Is Awin kem na ronim dispela hetmasta na plisman i go hait long dispela birua.

Ol plisman long Kiunga igo insait long Is Awin na helpim ol lain bilong ol long hap na holim ol dispela lain i mekim trabel.

Kimave stretim sindaun bilong ol pipel long Ara-Ava

GALF RIPOT

GAVANA bilong Galf provins a memba bilong Kikori Ridler Kimave i bin stretim wanpela wari bilong tupela grup long Ara-Ava, wanpela ples long Kikori long taim bilong Krismas.

Moa long wanpela ya i go pinis, tupela grup ya i save toktok pait na kros i stap long ol sampela pasin bilong sindaun we i no stret.

Tupela grup ya em tupela brata i go pas long ol.

"Mi no lukim wanpela gutpela developmen i kamap long dispela kain kros na pait bilong yupela," Gavana i tokim ol.

Gavana Kimave i kamap na stretim ol wari na toktok na tupela brata i sekan na bel isi i kamap namel long olgeta pipel long ples.

Ol pipel bilong Ara-Ava i lukim dispela i kamap na ol i kraun tenkim

Mista Kimave long kamap long ol na stretim sindaun long ples.

"Sapos yupela i gat wari, kisim igo long Lotu na bai Kraus i helpim yupela, Gavana i tokim ol pipel bilong em.

Em i tok ol i noken moa mekim kamap ol kros na pait we bai bagarapim gutpela sindaun long ples.

Mista Kimave i bin mekim dispela raun bilong em long taim bilong Krismas na Niu ya wantaim meri na pikinini bilong em.

Mista Kimave i tok em i raun na lukim ol pipel long iektoret bilong em long harim ol, na painim we long helpim ol.

Dispela raun bilong em i mekim na ol pipel i amamas tru long lukim em. Ol i tok em i nambawan taim bilong wanpela memba bilong Kikori long raun long dispela hap.

Flai Riva Gavman laik kisim sels takis

FLAI RIVA RIPOT

FLAI Riva Provinsal Gavman i laik kisim sels takis long ol bisnis na kampani long Westen provins. Tasol i gat ol bisnis na kampani i toktok egensim dispela.

Flai Riva provinsal asembli i bin pasim dispela sels takis long Jun 5, 1995 tasol inap 1998, provinsal gavman i laik stat long kisim ol dispela takis. Tasol olpela Ministra bilong Provinsal na Lokol Gavman Afeas Simon Kaumi i bin tokaut long Oktoba las ya olsem dispela sels takis i no bihainim lo.

Taim dispela toksave i kisim provinsal gavman, Westen provins edministreta Michael Debege i raitim pas i go long Mosbi long kisim tingting bilong Atani Jenerel Michael Gene. Michael Gene i bin bekim pas bilong em na tok takis ya i bihainim lo na Flai Riva Provinsal Gavman i ken go het kisim sels takis long ol

bisnis na kampani. Mista Chew Boo, menesa bilong North Fly Rubber kampani i tok dispela sels takis bai kamapim bikpela hevi long raba groas long Westen provins. Mista Boo i tok ol lain asples i save kisim strong long salim raba bilong ol tasol ol i bin bungim hevi pinis bikos prais bilong raba i go daun na prais bilong ol kaikai na ol samting long stua i go antap tru. Na dispela sels takis bai putim moa hevi i go antap long ol asples raba groas long liklik mani ol i kamapim.

Westen provins Gavana Nobert Makmop i laikim olgeta bisnis na kampani insait long Westen provins i mas baim takis. Mista Makmop i tok gavman bilong em i laik traim long pulim gut mani bilong kirapim ol developmen projek insait long provins. Gavana i tok tu olsem gavman bilong em bai traim long kamapim gutpela banis long ol bisnis na kampani i ken wok gut long en.

PNG Gardener resis nau i kamap long NCD

FIRMIN G NANOL i raitim

Paks na Gadens divisen bilong Nesenel Kapital Distrik nau i kamapim wanpela kompetisen we ol i kolim long PNG Gardener Competition long strongim wok bilong NCD long klinim na lukautim Pot Mosbi siti.

Ekting siti Edministreta na Kureta bilong Nesenel Kapital Botanikel Gadens Justin Tkatchenko i bin tokaut long dispela kompetisen long las wik Fraide taim em i wok long supavisim ol wokman bilong NCDC husat i bin wok long klinim na planim ol flawa long Yunivesiti. Wina bilong dispela kompetisen bai gat sans long larim ol wokman long Paks na Gadens divisen long NCDC klinim na stretim flawa gaden bilong em fri na dispela bai kamap long PNG Gardener program long EM TV.

Em i bin tok olsem ol wokman bilong wokim gutpela flawa gaden

bai kam na stretim gaden bilong yu fri long wanem kain stail o we yu laikim ol long wokim gaden bilong yu.

Em i isi tru long yu long go insait long dispela kompetisen. Wanem samting yu inap long mekim em yu baim wanpela 1999 PNG Gadena Kalenda long Nesenel Botanikel Gadens na ansarim ol kwesten i stap long beksait bilong dispela kalenda na salim igo long adres istap long dispela kalenda.

Kos bilong dispela kalenda em K4-tasol.

Mista Tkatchenko i bin tok olsem Pablik Afeas Divisen bilong NCDC i mekim gutpela wok long klinim na planim ol gutpela flawa long mekim siti bilong yumu i luk nais. Na em i tok olsem dispela em i wanpela bilong ol program NCDC i mekim long tok save long ol pipel olsem ol i mas wok wantaim long kamapim siti bilong yumu.

K1000 spot fain long tromoi rabis nabaut long siti

FIRMIN G NANOL i raitim

Nesenel Kapital Distrik Komisen bai sasim K1,000 long ol man o kampani husat i wok long tromoi ol pipia nabaut long olgeta hap bilong siti, Ekting Deputi siti edministreta Justin Tkatchenko i tok.

Mista Tkatchenko i bin tok olsem taim NCDC i wok long klinim na

stretim Pot Mosbi siti sampela kampani na ol man i wok long tromoi ol pipia nating nating long olgeta hap bilong siti na i no long ol ples bilong tromoi pipia olsem long Baruni dam.

Em i tok olsem dispela em i no gutpela pasin bikos em i save bagarapim siti na tu mekim ples i luk nogut long ai bilong ol turis o ol ovasis lain.

Mista Tkatchenko i tok olsem dispela kain pasin i tambu tru na i mas stop. Em i tok olsem husat man o ka i kam tromoi ol pipia istap na sapos ol wokman bilong NCDC i lukim yu ol bai kisim ka ki bilong yu na bai ol i tokim yu long peim K1,000 spot fain.

Em i tok, "mipela i kam istap hia long klinim na lukautim siti bilong Pot Mosbi na i no bilong rabisim Pot Mosbi. Husat ol

kampani o man i wok long tromoi ol pipia i mas klinim na go tromoi long Baruni dam".

Em i tokaut tu olsem planti pipia ples i wok long kamap long Morata, Jack Pidik Pak na long ol hap we i tambu long tromoi pipia o rabis. Em tok olsem ol lain long NCDC bai pulim ka ki bilong ol dispela ka i wok long tromoi pipia nabaut long siti.

Mista Tkatchenko i tok tu olsem em i bin lukim wanpela ka bilong wanpela Malaysian konstraksen kampani bilong wokim haus i bin kam na tromoi ol pipia long Jack Pidik Pak. Em i tok olsem em i bin pulim ka ki bilong dispela kampani ka na tokim draiva long peim K1000 spot fain. Em i tok olsem ka ya i bin stap yet long Jack Pidik Pak long 3-pela de olgeta.

• Ekting siti edministreta Justin Tkatchenko na ekting dairekta bilong Paks na Gadens Misis Vicky Isana i soim dispela 1999 PNG gradener kalenda resis. Husat i winim dispela resis bai ol NCDC wokman i kam strexim gaden na banisim gaden bilong em.



Rurel helt woka askim long K200 krismas bones

NESENEL Gavman i mas tingim ol pablik sevans husat i save wok insait long ol distrik na bus bilong Papua Niugini. Wanpela lida insait long Is Sepik provins, Luke Paskam i autim dispela bel hevi long dispela wik.

Mista Paskam i tok em i bin sori nogut tru taim ol sista na nes bilong Is Sepik provins husat i save wok insait long bus i kam na askim em sapos K200 bones Gavman i bin givim long ol pablik sevans long krismas i redi long ol i kisim.

Taim mi bin traim painimaut long Mosbi opis, ol i tok dispela em mani bilong ol pablik sevans long siti tasol, Mista Paskam i tok.

Mausman ya i tok ol nes na sista husat i save wok long bus i save bungim planti hevi tru long wok bilong ol. Ol i save wokabaut longwe hap tru, brukim bus na wara o maunten long go sevim pipel. Tasol taim Gavman i laik givim amamas mani, em i save givim tasol long ol opis lain long siti na ol bus lain i save nogut.

Mista Paskam i askim Nesenel Gavman long lusim dispela kain pasin na tingim ol rurel pablik sevans nau bikos ol i stap na ol pipel long ples i save kisim sevis.

PUBLIC NOTICE U-VISTRAC FINANCE CORPORATION LIMITED

The Bank of Papua New Guinea has been made aware of a company known as U-VISTRAC FINANCE CORPORATION LIMITED which is holding itself out as a finance company and is requesting the public to deposit money with the company with a promise 100% interest on the deposits.

We would like to inform the public that under the Banks and Financial Institution Act only licensed financial institutions are allowed to accept deposits from the public. U-Vistract Finance Corporation Limited is not a registered or licensed financial institution and as such the company is carrying out an illegal business of accepting deposits from the public.

We, therefore, would like to caution the public against making deposits with the company because your deposits would not be protected or you would not earn interest on your deposits as promised by the company.

We believe the company is operating out of Lae, Port Moresby, Buka (recently) and may have also expanded its operations to other parts of Papua New Guinea.



PABLIK NOTIS U-VISTRAC FINANCE CORPORATION LIMITED

Bank of Papua New Guinea i laik toksave long ol pablik olsem wanpela kampani em nem bilong em, U-VISTRAC FINANCE CORPORATION LIMITED, i wok long tokim ol pablik olsem em wokim bisnis olsem wanpela finance kampani. Ol wokman bilong dispela kampani i wok long tokim ol pablik olsem sapos ol i dipositim moni wantaim ol bai kampani i peim ol bikpela win moni o interes (100% interest).

Ol pablik mas save olsem dispela kampani i nogat lisens o em i no bin kisim tok orait long Bank of Papua New Guinea long wokim bisnis olsem wanpela finance kampani. Olsem na ol pablik mas was gut na no ken dipositim moni long dispela kampani nogut ol wokman bilong dispela kampani i paulim moni bilong yupela.

Bank of Papua New Guinea i bilip olsem dispela kampani igat opis long Lae, Port Moresby, Buka na tu long sampela hap long Papua New Guinea.

**Authorised by the Governor
Bank of Papua New Guinea**

WANTOK Sports Wilken

Wau makim interim eksekutiv

WAU LIG RIPOT

ARI GUH DANDEE i raitim

WAU Ragbi Lig i makim pinis wanpela interim eksekutiv bilong en long painim mani long afiliet i go long Papua Niugini Ragbi Futbal Lig. Man i go pas long interim eksekutiv em Samson Hiogai. Na namba tu bilong em i Len Alden na sekretari bilong asosiesen em Lawrence Sipala. Tresera em Tiki Wander.

Ripot i kam long Wau olsem Ari Guh-Dandee em i pablisiti opisel bilong asoseisen long raitim stori i go long ol niuspapa. Hiogai i tokaut insait long wanpela miting las wik olsem Wau Ragbi Lig i mas painim K1000 long baim afiliesen fi bipo long anuel jenerel miting bilong Papua Niugini Ragbi Futbal Lig long narapela mun. Em i tok ragbi lig em wanpela bikpela gem insait long Wau we i save pulim planti ol yangpela na bagarapim plen bilong ol long mekim ol kain trabel insait long haiwe na taun.

Insait long dispela miting tu, ol lain interim eksekutiv i laik olgeta gem i mas kamap long Wau, na ol bai senisim nem bilong Wau-Bulolo Ragbi Lig i go long Wau Ragbi Lig tasol. Hiogai i tok nem Wau-Bulolo i save bagarapim tru nem bilong ol pipel insait long distrik olsem na ol lain laik Wau yet i mas statim kompetisen bilong ol. Wau-Bulolo ragbi lig kompetisen i save bungim planti hevi tumas. Olsem na ol i no amamas na laik senisim nem ya. Namba tu presiden Alden em wanpela biknem pilaia bilong Wau long 1960, na em i gutpela long holim wok olsem wanpela opisel long skelim wok bilong ragbi lig insait long Wau.

Bipo Alden i holim wok tresera tasol nau em i lusim i go long Sipala. Sipala em wanpela bisnis developmen opisa insait long Wau. Wander em i taun menesa na dispela bai helpim tru ol dispela eksekutiv long holim na ranim gut ragbi lig kompetisen long Wau long dispela yia. Sampela ol biknem pilaia olsem Koi Simina na William Yak i soim laik pinis long kamap olsem wanpela komiti ya. Tupela plis opisa olsem Vincent Bayu na Richard Lenny i givim nem olsem komiti long traim lukim olsem ol trabel long Wau ragbi lig i noken kamap.

Sape i laik ol trening skwat memba mas stat trening

PNGNF RIPOT

HENRY MORABANG i raitim

EKTING presiden bilong Papua Niugini Netbal Federesen Janet Sape i askim olgeta memba bilong trening skwat bilong Saut Pasifik Gems long statim trening bilong ol.

Netbal federesen i tokaut long nem bilong 30 memba bhain long nesanel sempionsip long Lae las Julai.

Sape i laik ol dispela pilaia i mas ringim hetopis bilong federesen long Pot Mosbi long kismisim trening program na statim trening bilong ol yet.

Netbal federesen i tokaut long trening skwat las yia Ogas we i gat planti pilaia bilong Mosbi i stap insait long tim.

Skwat em Helen Au, Lucy Bailey, Roselyn Gawi, Lillian Kori, Leanne Launa (Lae), Renagi Dringo, Marion Genia, Vavine Iamo, Violet David, Monal Lisa Leka, Julianne Leka, Caroline Lahari, Emma Maki, Veronica Mola, Lua Mavara, Winnie Mavara, Margaret Opina, Mimi Ori, Gewa Raula, Kilala Owen, Ravu Raula, Barbara Stubbings, Melinda Sape, Naomi Taviri (Pot Mosbi),

Miriam Gapi (Sentral), Rebecca Lokoloko, (Moripi), Gamini Ilagi, Janet Gimot, Margaret Koko (Goroka)

Sape i tokaut olsem sapos ol lain i no kismisim trening program hariap bai tokaut tu olsem em wanpela rul long makim ol pilaia long fainel skwat.

Em i tok ol pilaia husat i no go long Fiji tu bai resis long winim spes long fainel seleksen ya. Dispela tim i go long Fiji i no fainel na olgeta pilaia bai i gat wankain sans long winim spes long tim.

PNG i no pilai gut tumas long Fiji. Tasol bikpela tingting nau em long traim kamapim gutpela pilai Saut Pasifik Gems. Netbal federesen bai tokaut long fainel 12 pilaia long Mas we ol i gat tupela mun long redim tim long pilai long Me 29 long Guam.

Sape i tokaut olsem bai i gat tripela pilaia i stenbai bikos nogut sampela kain hevi i kamap, ol dispela pilaia i ken kismisim ples bilong ol.

Insait long arapela netbal stori, ol posisen bilong federesen olsem presiden, vais presiden, junia vais presiden, sekretari na tresera i op nau long ol kendidet i ken resis long en.

Sape i tok olsem netbal federesen i salim fom i go pinis long olgeta wanwan asosiesen na ol i mas salim fom i kambek gen long opis bilong em ya.



• Ol meri Telikom i sanap na soim stail ya. Bos yet Christine i sanap long kona lephan. Foto: Joe Ivaharia.

ICPNG na PNGBC aut long PSSA resis

PABLIK SEVANS SOKA RIPOT

MADELINE AREK i raitim

TUPELA wimens tim long NCD Pablik Sevans soka kompetisen i aut bikos ol i fofit tripela taim olgeta. Tim ya em Invesmen Koperen bilong Papua Niugini (ICPNG) na Papua Niugini Benking Koperesen (PNGBC).

Eking presiden bilong PSSA Simon Koima i tok olsem i gat bai-lo bilong PSSA olsem sapos wanem tim i fofit tripela taim em bai aut. Olsem na tupela tim i mekim wankain olsem na ol i aut.

ICPNG i fofit tripela taim we em i no putim wanpela tim egens long BPNG, Atornu Jenerel na PNGBC. Na PNGBC i no putim tim egens long Helt na ICPNG.

Sekretari bilong asosiesen Bede Tomokita i tok asosiesen i laik olgeta tim i mas putim tim

bilong man na meri. Na sapos ol i no bhainim rul, ol bai autim ol ya.

Tomokita i tokaut olsem ol i toksave pinis long tupela tim olsem ol bai aut long asosiesen. Na tupela tim ya i no mekim wanpela toktok na dispela i soim olsem ol i orait tasol.

Em i tok MVIT na PNGBC i join na dispela i ken kamapim gutpela na strongpela tim. PNGBC bipo em wanpela strongpela tim stret long kompetisen tasol nau pawa bilong ol i dai pinis.

Kcima i tok ol nupela tim olsem Cellnet, Police, Nesanel Kalsrel Komisin na Helt i wok long kamap strong na daunim strong bilong ol biknem tim olsem PNGBC, Woks na Telikom.

Eking presiden i tokaut olsem dispela wik Sarere em i las de bilong baim olgeta fi. Na sapos wanem tim i no baim afiliesen na rejistresen baim long dispela wiken yet.

IS NU BRITEN LIG RIPOT

WALTER DARIUS i raitim

BIKPELA askim nau i go long Is Nu Briten ragbi lig long wanem na em i no holim jenerel miting long givim taim long ol klap long redim ol yet long 1999 ragbi lig sisen.

Long semtaim tu, Is Nu Briten Spots Developmen Atoriti i kismisim long i no tokaut long ol spotting asosiesen sapos ol i bai i gat fil long pilai o nogat. Bikpela samting nau Kokopo So graun em gav-

Is Nu Briten ragbi lig i paul yet

man i kismisim nau long wokim nupela kepitel bilong Is Nu Briten.

Is Nu Briten Lig i bin traim holim ming tripela taim olgeta tasol i rogat ol opisel i kamap long strongim miting.

Tupela nupela tim Warangoi Storms na BitapakaSouths i gat bikpela kros bikos Is Nu Briten i no singautim miting na tu i no bekim askim bilong ol long joinim kompetisen long dispela yia.

Mausman bilong tupela klap ya Alois ToBata na Arnold Tivilet i tok ol i no amamas tru long dispela

kain pasin bilong ol opisel bilong Is Nu Briten ragbi lig.

"Mipela i gat inap pilaia long putim tripela tim, mipela raitim pinis konstitusen, na wokim inap mani long ranim klap na tu kirapim pinis trening tasol Is Nu Briten ragbi lig i no bekim pas yet ya."

Nau yet tupela interim presiden ToBata na Tivilet i no save husat tru i presiden bilong Is Nu Briten Lig. Taim ol i askim sapos David Tamtu i presiden yet, sampela i tok nogat Timothy Masiu em i nupela presiden.

Sampela man i tok Joe Koro i presiden. Tasol taim tupela presiden i painim aut, Koro em i kalabus, na husat tru em i presiden.

Is Nu Briten em i wanpela bilong ol tripela ragbi lig asosiesen long Niugini Ailan long salim ripot bilong ol i go long PNGRFL. Na de bilong salim ol dispela ripot em las yia Novemba.

Mausman bilong PNGRFL long Niugini Ailan, David Tamtu i tok olsem olgeta lig insait long eria bilong em i mas save nau. Ol i mas hclim miting bilong ol yet na

bhain ol i mas redi long bikpela miting bilong PNGRFL we bai kamap long Lae long Februari.

Tamtu i tok Is Nu Briten na Kimbe em ol sinia lig. Tupela i mas stretim ol yet na redim ol long bikpela miting. Sapos tupela i no redi, tupela bai bagarapim sans bilong tupela long SP inta siti Kap ya. Na dispela bai i no gutpela tumas long ragbi lig insait long Niugini Ailan ya.


I gat sampela ol bikpela senis olsem K1000 afiliesen fi. I mas i gat 7-pela tim tasol long A gret kompetitisen na tu i mas i gat kompetisen bilong Anda 17 na Anda 19 yet.




• Pilaia bilong Treasury i leit long stapim pilaia bilong Helt 1 taim em i kisim bal long Pablik Savens netbal resis.

Eksen poto long las wiken long Mosbi

Poto: Joe Ivaharia




• Misina Dai (holim bal) bilong Baia Raider i laik wokim trik egensim ol Magpies long Gordons tas resis.



• NBC pilaia wok long painim hol long NPF pilaia long kikim bal i go klia long Pablik savens soka resis.



• Telikom na NDCD pilaia i resis long Kisim bal long Pablik savens soka resis long Mosbi.



Demas Tovia bilong NGI i kamap long bes egensim ol Elcom. long las wiken. Elcom i win 1-0.

PRL bai holim edministresen woksap

POT MOSBI LIG RIPOT

HENRY MORABANG i raitim

POT MOSBI Ragbi Lig i bai holim namba wan edministreta woksap long Gateway Hotel long dispela wik Sarere.

Insait long dispela woksap ol bai toktok long wok bilong klap edministresen, mani, sponsasip, wok bilong dokta na tu pablisiti na stadi long klap.

Operesen menesa bilong PRL Ivan Ravu i tok ol volunia na ol lain ol i makim long dispela wok bai mas kamap long dispela woksap. Dispela

woksap em long lainim ol presiden, tresera, sekretari na ol lain husat i save ranim ol ragbi lig klap long Pot Mosbi.

Ravu i askim olgeta lain long givim mani bilong afiliesen long PRL long stap insait long long dispela miting. I nogat fi long wanem ol lain i laik tasol ol klap i mas givim nem long ol lain husat em ol i

laik salim long dispela woksap long PRL opis long Borok.

Ol lain husat bai toktok long dispela woksap em Scott Vavine bilong PNG Spots Komisen. Vavine bai toktok long Spots edministresen, lan Liveras bai toktok long stadi bilong Harlequin ragbi union klap, John Darby bai toktok long

fainens menesmen, Martin Riechhardt bai toktok long we bilong pulim sponsasip, Dokta Kendino bai toktok long wok bilong tim dokta na Numa Alu na Martin Liri bai toktok long wok bilong niuspepa.

Ravu i tok dispela woksap bai stat long 9 kilok moning na pinis long 4 kilok long apinun.

Mumeng laik putim tim long Morobe Kantri

MOROB KANTRI LIG RIPOT

BUSTIN ANZU i raitim

MUMENG Distrik i laik putim wanpela ragbi tim long Morobe Kantri Ragbi Lig kompetisen long dispela yia. Dispela tingting i bin kamap long AGM bilong ol.

Mumeng i gat nem long soka tasol ol i laik traim kamapim tingting bilong pilai ragbi lig. Sapos ol opisel bilong i tok orait Mumeng bai kamap namba wan distrik long putim wanpela tim insait long Lae siti.

Ripot i kamap long Wantok i soim olsem dispela em wanpela toktok we ol opisel bilong Morobe Kantri bai paitim toktok taim ol i holim anuel jenerel miting long dispela wik Fraide.

Miting bilong Morobe Kantri sapos long kamap long Novemba 15 tasol ol i surikim i kam long dispela wik Fraide.

Insait long dispela miting or klap presiden i mas kam wantaim presiden ripot, fainensel ripot, kampani husat bai givim sponsa long tim, na lista bilong ol pilai long 4-pela gret, na afiliesen fi bilong K500 long nupela tim na K200 long olpela tim.

Long dispela miting, ol olpela opisel i pasim tok long holim yet wok bilong ol long putim sampela pepa i go long Morobe Provinsal Gavman long stretim dispela Omili stadium.

I gat ripot olsem tupela kampani i laik stretim dispela stadium insait long 5-pela yia long mak bilong K35,000 we stadium inap long holim 20,000 manmeri.

Ol tim i soim laik pinis long dispela resis em Kamkumung Jets, Wests, 10 ma'l Brothers, 2 mail Kaubois, Yalu Aliwanga, East, Tent City Rangers, Dunlop Pirates, Hawks na Mumeng.

Insait long dispela miting, ol opisel bai painim aut husat bai stap yet olsem opisel na husat bai pinis.

Sofbal skwat i gat moa Pot Mosbi na Rabaul pilaia

PNGSF RIPOT

FRANCO NEBAS i raitim

PAPUA NIUGINI sofbal Federesen long dispela wik i kolim pinis trening skwat bilong ol long pilai insait long 4-pela ovasis tonamen long dispela yia. Ol dispela 4-pela tonamen em , senia wimen Asia/Oceania Olympik kwalifai long Taipei, Taiwan, long March , Senia man gems long Guam long Mei na junia wimen wol sempionsip long Taipei, Taiwan long Jun na senia man wol sempionsip rijonol kwalifai long Canberra, Australia long Septemba.

Presiden bilong Federesen Henry kila i tok olsem junia wimen skwat em wankain tasol we ol i bin winim Niu Silan long rijonol kwalifai long Brisbane, Australia long Septemba las yia.

Kila i tok olsem dispela ol pilaia ol i selektim em bihain ol ripot i kam long ol kosa na tim menesmen.


Em i tok olsem ol i bai tokaut long fainel 17 pilaia na tripela risev bihain long Nesenel sofbal taitels long Mt Hagen long Ista wiken (Epril).

Ol lain husat i stap long junia wimen tim em , Jacqueline Takaili , Fenella Sam , Natalie Bart , Georgina Mocke , Tessie Komek , Helen Bunbun , Shirley ToMangana , Fidelma Takaili , Alice Kalas , Nicky Simba , Tracey Kig , Wendy Sogai , Andrea Lai , Robertha Kaul , Helen Wema , Anna Wosley , Rose Jerry , Lomot Kisokau , Nini Costigan na Damarish Kauke.

Ol opisal em, Makis Patonga (kosa) , Henry Takaili (namba tu kosa) na Salome Nambon (menesas). Olgeta lain mas baim levi fi bilong ol K1500 long Nesenel taitels long Hagen.

Kila i tok olsem tu ol sapota na arapela opisal husat i laik long go wantaim tim tu mas rejistaim ol yet long Federesen hariap.

Em i tok olsem 4-pela mamba bilong junia tim em ol i stap long sinia wimen skwat, na sapos ol i go wantaim ol sinia tim long Mas em gutpela long ol long kisim eksprens



• Elcom Jerry Katusele (raithan) ketsim bal na autim pilaia bilong NGI long Pot Mosbi mens sofbal. Elcom win 1-0. Foto: Joe Ivaharia.

na bihain lidim junia skwat long Wol sempionsip 3-pela mun bihain.

Ol pilaias em , Jacqueline Takaili , Georgina Mocke , Anna Wosely na Alice Kalas.

Kila i tok ol senia wimen i laik salens long dispela Olympik Kwalifai moa long SP gems we em bai slo pits komptisen. Tim bilong ol sinia wimen em , Takaili , Margaret Joseph , Pauline Bulumaris , Pauden Makis , Wendy Katusele , Heidi Aitikus , Mocke , Jenny Pilak , Shirley Kori Bombe , Beverly Pasen, Grace Wanma,

Kalas, Kolish Banam, Linah Joshua, Carol Yawaing, Rae Pulu , Mectil Raymond, Rose Jerry, Stehanie Sete , Delvin Woni, Freda Sam , Wosely , Geradine Paivu na Kathleen Michaels.

Ol opisels em, Joe Lumaris (kosa), Roselyn Pasen (namba tu kosa) na Helen Costigan (Menesas). Olgeta pilaias bai baim levi fi bilong K2000.

Long sinia man tim em planti pilaias kam long Pot Mosbi na Rabaul. Planti bilong ol dispela pilaias em ol i bin pilai long 1996 wol sempionsip long Michigan USA. Dispela skwat bai ol katim i go daun long 17 pilaia long Nesenel Sofbal taitels long Hagen.

Skwat bilong ol man em , Esau Vinarang , Patrick Pilak , Ansem Bunbun , Martin Bobo , Isimel Marnapal , Cornelius Bunbun , Danny Mong , Francis Diap, Allan Tomang , Robin Lambert , Pedro Kinavai , Albert Jerry , Dick Bart Jr, Damin Wartovo , Stanley Wartang , Michael Kalas Jr , Christopher Avuchulus, Lindsay Pulu, Lipirin Pulpulung, Ilikis Abiuda Jr, Tony

Dapie , James Tovue , Emil Lucas , Paul Bogan, Peter Kisokau, Peter Urari, Jerry Edward, Simon Matana, Herman Dickna Graeme Ganglof.

Menesmen tim em , (kosa) Caspar Womola , (namba tu kosa) Arthur Kinakava na Nick Tata (menesas). Levi fi em K1500 long wanwan pilaias.

Long dispela taim yet tu , 16-pela kantri i soim laik long resis long junia wol sempionsip long Taipei long Jun. Dispela sempionsip bai stat long Jun 17 i go pinis Jun 26, 1999.

Ol dispela kantri husat i soim laik long dispela resis em , China , Japan, Korea, Botswana , Czech Republic , Italy , Netherlands, Russia , Argentina , Brazil , Canada, United States , Venezuela, Australia, Papua Niugini na Chinese Taipei.

Mangi Bogia i laik traim lig gen

VIPERS RIPOT

MARK Mom na Andrew Norman em tupela nupela pes insait long 36 pilaias em ol selekta i makim long Pot Mosbi Vipers trening skwat.

Mom i save pilai long Canberra Raiders long Australia tripela yia i go pinis taim em i skul long Canberra Yunivesiti. Taim em i skul, em i winim skolasip na pilai wantaim Raiders.

Mom em hapkas Bogia na Kerema. Em i bin pilai hapbek

bilong Australia Skulbois tim i go pilai long Nu Silan.

Mom tu i bin makim PNG Kumul taim ol i salensim French Roosters 'ong Pot Mosbi we Adrian Lam i kamap namba wan hapbek.

Taim em i lusim Australia na kambek long Papua Niugini, em i kisim wanpela wok wantaim SP Holdings na em i nogat taim long mekim trening bilong em.

Tasol i no long taim i go pinis, em i statim gen trening we siaman bilong selekta Peter Bebi i ama-

mas na makim long skwat. Las yia Mark Mom i joinim Brothers ragbi lig klap tasol em i no soim pes bilong em liklik.

Andrew Norman em wanpela strongpela fowat tasol em i ken pilai long senta tu ya.

Norman nau i stap long Pot Mosbi na i luk olsem em bai joinim wanpela klap bikos nem bilong em i stap pinis long Pot Mosbi Vipers skwat.

Ful skwat em Watkins Tolaup, Johannes Bade, Godfrey Luke,

Rumints Kiap, Francis Pegu, David Mune, Philip Welia, Paul Nombri (Royals), Robert Volu, Francis Wani, John Jonathan (Post Pumas), Colin Geno, Galama Mulaga (Magani), Philip Boge, Toua Kohu, Lohia Ben Moide (Hawks), Dickson Sibiya, James Naipao, Billy Kambao, Alex Peng (Tarangau), Cedric Belo, Patrick Belesi, Jacob Kenosi, Obert Batia (Dobo Warriors), Chris Lome, Tuksy Karu, Michael Marum, Nick Andy, Norris Selu (Paga), Luke Waldiat, Kera

Ngaffin (Defence), Iamo Tau (Tigers), Wilson Mavoko (Brothers), Mom na Norman.

Siaman bilong ol selekta Peter Bebi i tok ol i givim 4-pela spes i go long Sentrel ragbi lig.

Sentrel Lig bai holim wanpela trail gem long Mas 7 long givim 4-pela pilaias i go long Vipers.

Operesen menesa bilong PRL Ivan Ravu i askim olgeta lain husat i laik kamap kosa, trenas, menesa na tim dokta bilong Pot Mosbi Vipers i mas salim aplikensen bilong. De bilong aplikensen bai pas long Januari 22.

Strongpela salens long Lae sofbal resis

LAE MENS SOFBAL RIPOT

FRANCO NEBAS i raitim

STRONGPELA salens bai kamap long Lae man sofbal resis long dispela wiken namel long kompitisen lida Brown Eagles na namba tu ples NGI Telikom. Eagles husat ino lusim wanpela gem liklik long dispela sison i lukluk fowet long difendim gen taitel bilong ol long dispela ya.

Bihain long ol gems long las wiken, Eagles i stap yet long namban wan ples wantaim 16 poin, NGI Telikom 14, Coca Cola Aviat 12, Karanas 11, Manalos 10, Burma Raiders Elcees 9,

Malangan 5, Island Hawk 5, YMCA 4, Tabaur 2 na Bismark Shark 2.

Eagles i bin laki long las wiken bihain long ol i autim Manalos 9-8 long wanpela strongpela gem we inap long ol i dro tasol stail mangi bilong Eagles John Tume yet i wokim samting stret long ol kain stail bilong em na ol winim Manalos.

Dispela gem egens NGI long dispela wiken em bai tu wankain olsem las wiken tasol NGI i gat ol stail bilong ol yet we ol inap long bagarapim sindaun bilong ol Eagles.

NGI i gat namba long autim Eagles pinis taim tupela i bin long las sison i go pinis we ol i winim ol tupela taim na dispela em ino wanpela hevi long ol. Eagles husat bai misim sevis bilong stail pita bilong

ol James Pinia husat go holide long ples bai traim usim sem lain hap olsem ol i pilaia long las wiken.

Tagaga Ngaungau husat bai kisim ples bilong Pinia bai traim mekim wankain long ol NGI long fes 5 inings na bihain bai Tume i pinisim wok. Long dispela stail bilong ol tasol em ol i win long las wiken.

Ol arapela pilaia husat bai givim han long tupela baga ya em, Thomson Tavor, Thomas Buasi, Ray Manup, David Maira, Kepas Taule na James Taule. Ol dispela lain em ol stail long paitim bal abrusim infil ya.

Tasol Eagles noken ting olsem dispela bai isi long wanem ol NGI i sapim pinis han bilong ol long bagarapim sindaun tu ya. Ol i gat

ol stail pilaia olsem, Tony Valuta husat bai sanap long pita wantaim ketsa bilong em John Pidik bai rausim ol betas bilong Eagles go bek long matmat.

Ol i gat strongpela infil na tu long beting sait we ol bai givim gat taim long kompitisen lida. Ol lain husat tu bai sapotim tupela baga ya em, Tony Sapul, Andrew Gorogoro na Fedinan Kuak. Dispela lain ya i wok long paia lait stret long ol gems bilong i go pinis na bai mekim wankain gen long dispela wiken.

Sapos ol i autim tiket bilong Eagles bai ol i sindaun wantaim long namba wan ples.

Long arapela gems, Aviat / Manalos gem tu bai arapela gutpela gem long wanem Aviat husat i stap namba 3 ples bai

traim long stap yet na Manalos bai pait hat long stap insait long fainel 4. Long dispela taim yet ol i sindaun long namba 5 ples. Aviat bai gutpela sans liklik long wanem ol i malolo gut long tripela wiken na i redi gut long pilai long dispela wiken. Tasol Manalos tu ya ol i wok long paia lait tu long sait ya. Pita bilong ol Malom Paikara i wok long stap long fom ya na bai mekim samting stret long rausim trasis bilong Aviat. Em bai kisim helpim long Michael Kalas. Kalas em hap man nogut ya na ol birua i mas putim gut was long en.

Long arapela gems em, Bismark bai i go daun long Burma Raiders Elcees, Malangan na Is hawk bai skelim strong na Karanas bai rausim YMCA.

Yangpela pita Hulo holim ki long win bilong Gans

LAE SOFBAL RIPOT

YANGPELA pita Melanie Hulo bai go pas long win bilong Malangan egens Is Hawk long Lae wimen sofbal resis long Sarere. Hulo husat i wok long kamap namba wan pita long Lae bai soim olgeta stail bilong em olsem em i gat namba long pita.

Las wiken ol ino bin laki tumas bihain long ol i go daun long NGI Telikom 11-10 long wanpela strongpela gem stret. Dispela lus i lukim ol nau sindaun long namba 5 ples.

Bihain long las wiken gems, Bismark Shark sindaun antap long namba wan ples

wantaim 18 poin, Karanas 12, Manalos 12, NGI Telikom 10, Malangan 10, Tabaur 6, Coca cola Aviat 4, Brown Eagles 4, Burma Raiders Eagles 4, Post PNG YMCA 4 na Is hawk 4.

Malangan long Sarere mas winim gem bilong ol long stap insait long fainel 4. Long wanem stat long neks wiken bai lukim ol dabol heda gems long tupela wiken

na sapos ol ino mekim gut sore tumas bai traim gen neks ya.

Yangpela pita Hulo em i bai holim ki long win bilong ol we mama bilong klab Tus Pulu bai pilai bek stop bilong em. Pulu em wanpela olupela pilaia na em i save gut long ol stail bilong betas we em bai kontrolim Hulo long rausim siket bilong ol betas.

Long infil bilong ol em bai, Rae Pulu, Helen Pulu na Roselyn Songi bai go pas long ol. Island Hawk husat i stap long leda bai traim bes bilong long winim dispela gem.

Long arapela gems, Bismark bai bagarapim sindaun bilong Burma Raiders Elcees,

Coca Cola Aviat bai traim bun wantaim Manalos, NGI Telikom bai rausim siket bilong Brown Eagles na Karanas bai bagarapim sindaun bilong Post PNG YMCA.

Long dispela wiken bai lukim ol las gems bilong namba tu raun we neks wiken bai dabol reda inap long tupela wiken na bihain long em bai fainels bai stat.



Ol pilaia bilong Helt i bin leit na birua bilong ol Treasuri i kisim bal pinis. Dispela tupela tim ya i brukim bun long Pablik savens netbal resis long Pot Mosbi. Foto: Joe Ivaharia.

Planti tim i no kamap long gem

PRAIVET KAMPANI NETBAL RIPOT

PRAIVET Kampani netbal kompetisen Kampani i no bin stat gut bihain long longpela malolo bilong Krismas na Niu Yia las wiken long Riita Flynn's netbal kot long Boroko.

Long divisen wan, wanpela gem tasol namel long Post Courier na Travelodge i bin kamap we ol meri long Lawes Rot i win 33-11.

Dispela skoa i antap tru long wiken ya. Ol arapela gem bilong divisen wan i no kamap bikos planti tim i no kamap long pilai. Courts, SP Holdings na Faideal i win long fofit long wanem ol birua tim olsem Ela Motors, Daltron na Steamships i no soim pes long ples pilai.

Presiden bilong Praivet Kampani netbal kompetisen Kila Gei i tok planti gem i no kamap bikos ol pilaia i go malolo. Tasol em i singaut long ol pilaia long kamap long dis-

pela wiken long pinis namba tu raun bilong kompetisen.

Long divisen tu, Shell fofitim Coca Cola, Deloittes winim Theodist 13-10, Word Publishing autim Theodist 23-17 na Steamships fofitim Pot Moresby Travelodge.

Na skoa bilong divisen tri i sanap olsem MBA i fofitim City Pharmacy, Brian Bell fofitim Yellow Pages, Ray White i nekim Fairdeal 41-9 na EMB winim Rothmans 24-19.

Koiari bai holim jenerel miting

KOIARI LIG RIPOT

KOIARI ragbi lig bai holim wanpela jenerel miting long dispela wik Sande long larowari Haiskus oval long Sogeri.

Dispela miting em bilong pasim toktok wok bilong KRCLC, klap rejistresen na pilaia rejistresen bilong dispela ya.

Siaman bilong Koiari Ragbi Lig Kaunsil Kennedy Edene i tokaut olsem insait long dispela miting, siaman na tresera bai tokaut long ripot bilong 1998 tu ya.

Dispela miting i op long olgeta olupela na nupela klap long joinim. Na tu dispela miting i op long wanem ol lain husat i laik sapotim ragbi lig insait long Koiari tu i ken kamap long dispela miting.

Edene i tok KRCLC i laik statim kompetisen hariap bikos bai i gat sampela ol arapela pilaia tu bai kamap ya.

Em wantaim olgeta eksekutiv bilong em i laik olgeta klap olsem Hooks Tigers, Sogeri Choice, Crystal Lakers, Sirinumu Pukpuks, Sirinumu Owls, Ice Panthers na tu ol eksekutiv bilong Sogeri olsem Dick Warina, Peter Teine, Yamore Geary long kam sindaun long dispela miting.

Insait long wanpela spesel miting, KRCLC i laik toktok wantaim Sentral Ragbi Lig long kamapim wanpela kompetisen long promotim ragbi lig insait long Sentral provins long makim wanpela representativ tim we ol pilaia bilong Sentral tasol i mas stap long em.

Tupela hauslain bai brukim bun long Okaihens lig

OKAIHENS LIG RIPOT

WANPELA bikipela op-sisen ragbi lig kompetisen i save bungim ol Isten Hailens em Okaihens ragbi lig.

Okaihens i sanap makim tripela distrik long Isten Hailens olsem Okapa, Kainantu na Henganofi.

Dispela wik Sande, em bai namba 8 raun bilong Okaihens ragbi lig kompetisen we tupela wanpisin Usu United na Yamaso Raiders bai bung long bikipela gem. Olgeta gem bilong Okaihens i save

kamap long Hohola ragbi lig-oval long olgeta Sande.

Yamaso Raiders i gat strongpela bilip long winim dispela gem bikos ol i gat gutpela beklain na fowat. Tupela senta pilaia ya Parks Robert na Steven Maron bai go pas long beklain na long fowat, Sonny Reipa husat i save pilai long Souths klap long PRL, Daniel N na Laik Asafa bai pilai strong tru.

Kosa bilong Raiders Tobias Ao i gat ol kain liklik trik we em bai autim taim tupela tim i bung. Usu United tu i gat nem. Em i gat ol pilaia

olsem Charles Peru long fulbek, senta Yawinga Stone na Iksen Kebo long faiv-et bai go pas long beklain ya. Na long fowat em Francis Agonami, Mike Wako, Nathan Amos na Wilson Kiki.

Kosa bilong United na wanpela biknem pilaia bilong Souths Wayne Moare i go pas long tim ya.

Moare em wanpela pilaia husat i ken ritim gut gem. I tru United i gat sampela gutpela pilaia tasol planti bilong ol i stap long holide na Moare i painim hat liklik long putim strongpela tim.

Tim bilong United em: Charles Peru, Des Tino, Toksy Aiso, Yawiga Stone, Mathew Aiso, Iksen Kebo, Tony Hair, Francis Agonami, Andrew Obeo, Willie Ken, Mike Wako, Bom Ovia, Nathan Amos riservs: Kay Asiyu, Wilson Kiki, Muty Darksy, Felix Anton

Tim bilong Raiders em: Cowboy Peter, Jackson David, Parks Robert, Steven Maron, Alan Mapi, Kops Andrew, Moist, Laik Asafa, Felix Ao, Daniel N, Sonny Reipa, Brian Kenny, David Bavuso, riserv: Pitt Asafa na Vecko Ayo.

Ostrelia givim K5.5 milien bilong putim kolta long Not Kos/Bogia haiwe

BEN TAUMAI i raitim

EDMINISTRETA bilong Madang Provinsel Gavman, Clant Alok i tenkim ol pipel bilong Ostrelia na gavman bilong ol long givim samting olsem K5.5 milion bilong putim karanas na kolta long 65 kilomita rot stat long Not Kos i go long Bogia. AusAid na ADB i putim mani bilong mekim dispela projek. Dispela projek i stat long 1997 na i pinis las yia.

Mista Alok i tenkim tu Woks na Tres-spot dipatmen bilong Madang long lukautim wok, Shorncliffe Pty Ltd long putim kolta na ol arapela sab kontrakta wantaim ol papagraun long olgeta helpim ol i putim wantaim bilong pinisim dispela haiwe.

Em i tok, dispela rot i bikpela samting tru long ol pipel bilong Not Kos na Bogia bikos ol i save yusim olgeta taim. Nau i rot i gat kolta bai helpim ol long ron gut na bringim ol kakau, kopra na ol arapela samting bilong salim long maket long Madang na long wankain taim bringim

mani bilong provins i go antap. Dispela rot bai helpim tu ol pasindia long ron gut antap long ka long dispela haiwe.

Mista Alok i tok Madang em wanpela provins long PNG we i nogat gutpela rot olsem sampela arapela provins i gat. Olsem na wanem samting Ostrelia i mekim long putim mani bilong dispela rot em i bikpela samting tru long provins na long ol pipel bilong Madang.

Tasol em i tok liklik hap wok bilong pinisim dispela rot i stap yet na em i hop Ostrelia bai go het long helpim ol bilong pinisim dispela wok. Long sait bilong ol pipel bilong Madang, em i tok ol bai traim long mekim olgeta samting bilong daunim ol bikhet pasin na mekim dispela rot i gutpela bilong ol pablik long ron long en.

Man husat i statim dispela projek, em olpela memba bilong Sumkar na Minista bilong Trensport, Peter Yama. Long taim bilong em, kolta i go pinis long Mirap na wok bilong putim karanas i go olgeta long Daigul Helt Senta. Hap wok i kamap long ilektoret bilong

Mista Yama na hap wok bilong putim kolta i stat long Bogia stesen i go long Holi Spirit Hai Skul na i go pinis long Daigul.

Mista Alok i go het na i tenkim tu Yuropien Y tien bilong putim mani long stretim na putim kolta long Lae/Madang haiwe. Em i tok taim dispela wok i pinis, Madang bai lukim gen narapela bikpela developmen we i kamapim ol gutpela rot namol long Madang na ol arapela provins.

Em i tok narapela tupela nesenel rot we i nogat mani bilong stretim em, Madang/Raikos haiwe na Madang/Simbai haiwe. Em i tok planti pipel bilong arapela kantri na provins i save ting olsem Madang em wanpela naispela provins tru. Tasol tru tumas moa long 80 pesen bilong ol pipel bilong Madang i nogat gutpela rot bilong go long Madang taun na salim ol kaikai o kisim ol arapela sevis we ol pipel klostu long taun i gat sans long kisim. Long dispela as Mista Alok i tenkim tru ol kantri na ogenaisesen husat i putim mani insait long provins bilong kamapim ol gutpela rot na ol arapela sevis.



• Sitok Iru i wok long sekim wanpela autobod moto bilong wanpela man. Sitok save mekim wok mekanik long Kila Kila hos kemp long Mosbi. Sitok tok olsem, i nogat planti wokmani long Papuan Niugini nau, na husat i save hatwok long save bilong em bai inap lukautim sindaun bilong em. Foto: Ian Kakarere.



TOYOTA
KIJANG
1.8 UTILITI

STENDED DEK

K18,990

DRAIV IGOAUT PRAIS!

STANDAD EM IGAT:

- Kijang 1.8 lita ensi
- Longpela wil beis
- 3 pelaman iken sindaun
- long kebin • Madflaps
- 4-spud manuel transmisen
- Dobol wisbon frant sapsensen
- Frant disk brek
- Rek na panion stearing
- Wantaim FRI Redio Kaset Sterio.



**HARIAP
NAU TAIM
STOK I
STAP YET!**

Ela Motors

TOYOTA

***FREIGHT APLIKESAN IGO LONG ARAPELA BRENS EKS-STOK LONG POT MOSBI NA LAE!**

PORT MORESBY PH 3229400 • LAE 4722322 • RABAU 9821988
 KOKOPO 9829100 • MADANG 8522188 • GOROKA 7321844
 MT HAGEN 5421888 • WEWAK 8562255 • KAVIENG 9842132
 KIMBE 9835155 • TABUBIL 5489060 • VANIMO 8571254
 PORGERA 5479367 • KUTUBU 5496685 • BUKA 9839915
 LIHIR 9864099 • ALOTAU 6410100

Israel lusim fri namba wan hap long ol Palestin kalabus lain



Ahmed Obeid i wanpela long ol 250 kalabus lain bilong Palestin we gavman bilong Israel i bin larim ol i go fri bihainim pis agrimen we tupela bikman bilong Israel, Presiden Benjamin Netanyahu na Yassar Arafat bilong Palestin i bin sainim long Wye Riva konfrens long Yunaitet Stets, Amerika. Presiden bilong Amerika Bill Clinton i bin stap olsem namel man long dispela toktok bilong painim gutpela sindaun namel longol Israel na Palestin pipel long Midel is.

Poto i soim tupela mama na pikinini i amamas long

pikinini man i kamaut long haus kalabus na mama i holim pasim na amamas kra i wantaim. Bihainim dispela agrimen, Israel i bin tok long lartim i go fri 750 Palestin pipel we em i holim olsem kalabus long ol haus kalabus bilong em. Bihainim tu agrimen, Israel i rausim ol soldia bilong em 500 kilomitas longwe long Wes Benk, boda mak namel long Israel na Palestin we planti Palestin na sampela Jews pipel i save stap long insait long en.

Mohammed Ne'irat wanpela Palestin man wantaim 72 krismas em i wan-

pela long ol husat i bin kamaut fri long kalabus bihain long 23 yias. Em bin kalabus bihain long em i kilim dai wanpela Israel bas draiva long 1975 bihain long bas i lusim ol Palestin wokman long boda eria. Planti long ol Palestin kalabus lain we ol i larim i go fri em ol i bin kalabus long ol asua we i no bikipela tumas. Tasol ol i larim Mista Ne'irat long go fri bikos em i wok long go lapun tumas. Planti ol Palestin pipel i no bilip olsem pait i pinis bikos ol i tok hevi bai i stap yet aim Israel i holim pas na sindaun long graun bilong ol (Palestain pipel) yet.

Iraq sanap strong yet long ol birua

Baghdad, Iraq: Iraq i sutim tok long ol Yunaitet Nesesn Spesel Komisn (UNSCOM) i beis long Iraq long karimaut spai pasin. Grup ya i stap long kantri Iraq long traim mekim Iraq i rausim na stapim ol strongpela samting bilong pait we em i wokim yet insait long kantri.

Iraq i wokim dispela toktok bihainim ol ripot long sampela niuspepa insait long Amerika we i tokaut long dispela samting.

Iraq i tok planti long ol UNSCOM memba i bin stap insait long spai wok long stap bilong ol long kantri.


Long Krismas taim las mun, Amerika na

Briten i bin karimaut Operesen Deset Fox na bomim ol militeri instelesen na ol hap we ol i bilip olsem ol Iraq i wokim ol steongpela samting bilong pait long en.

Maski Amerika, Briten na UN i wokim ol samting long traim mekim Iraq i harim askim bilong ol, Iraq na lidasip long kantri i sanap strong yet na tok ol bai egensim yet ol birua husat i laik bagarapim kantri na pipel bilong ol.

Long dispela wik, ol bikman long gavman bilong Iraq i tok strong gen long rausim tambu we Westen wol i putimlong ol "no fall zon" eria. Ol i tok tu olsem ol no luksave long Kuwait, neiba kantri bilong ol.

Perth long Westen Australia i ples bilong ol nais blekpela swan



Dispela em wanpela blekpela pisin olsem pato tasol em i gat longpela nek na ol i kolim long swan. Ol swan em ol i naispela moa long ol pato wantaim naispela kala na longpela nek bilong ol. Planti pipel i save long ol waltpela swan tasol olsem yumi lukim long piksa ya, i gat ol blekpela swan tu ya we ol i kism long wanpela raunwara Pert, Westen Australia. Dispela hap i gat nem long ol belkpela swan. Piksa i kam long Newmans Australia megesin.

Wok painimaut long dai bilong Prinses Diana klostu pinis

London: Nogat man bai i kism bikipela sas o sanap long bikipela kot long dai bilong Diana, Prinses ov Wales long mun Ogas long 1977 long Frans, ol ripot long dispela wik i tok.

Ripot i kam long niuspepa Daily Mirror i tokaut olsem opisel 16 pes ripot we ol atoriti bilong Frans i bin karimaut i tok asua i bin stap long draiva bilong Mesedis Benz ka, Henri Paul husat i bin dai long birua we i bin kilim tu Prinses Diana na boipren bilong em Dodi Al-Fayad long Ogas 31 1977. Nainpela paparazi fotografa na wanpela narapela man i bin wok long ronim blekpela mesedis limosin ka na em i ron spit stret na bam long andagraun tanel rot long Pont del Alma long Frans. Ol dispela lain i bin kism sut tok long dai bilong Prinses Diana na ol i sapos long sanap long kot tasol bihainim ol wok

painimaut bilong ol atoriti insait long 15-pela mun i larim sas long ol dispela paparazi fotografa na tok ol bai kamap long liklik majistret kot tasol. Tasol tripela fotografa na tupela man husat i bin stap pastaim long ples we ka i bam long en bai kism sas long i no gviim helpim long ol lain i bung'm birua na tu long pasim rot bilong imejensi sevis i karimaut ol wok bilong ol. Nem bilong tupela bilong ol em Romauld Rai na Christian Martinez. Jas Herve Stephan i bin pinisim draf long fainol ripot long disepla samting las wik.

Ripot i tok ol bos long Ritz hotel long Paris we Al Fayad, papa bilong boipren bilong Prinses Diana, Dodi i papa long en we i bin larim Henri Paul long draivim tupela bai i no kism sas long i no glasim gut draiva bipo ol i larim em i draivim Prinses Diana na Dodi. Ripot i tok tu

olsem ol papa bilong motoka kampani, Etoile Limousines, we Prises Diana na Dodi i bin haiarim ka long ol bai noken kism kism sas long putim laip bilong ol arapela long hevi taim ol i no givim draiva olsem tupela i bin askim ol long en. Ka i bin ron spit long mak bilong 99.7 kph abrusim spit limit mak na bam long pos aninit long tanel rot long biknait Ogas 31, 1997. Bodigad bilong Prinses Diana, Trevor Rees Jones em bin wanpela man husat i no bin dai long birua tasol em bin kism bikipela bagarap long en.

Ripot i tok loya bilong Mista Rees-Jones i no amamas tumas long opisel ripot na i tok sampela samting i no stret bikos kem bilong Al Fayad i bin stapim sampela samting long jastis i go gut long ol atoriti i no karimau wok painimaut bilong ol.

Wok painimaut i bin kism witnes long 160 pipel, ripot i tok.



Prinses Diana long Ascot Hos reis, saut Ingran.



WANTOK

Askim long klasifaid ads: Miri Aiori Ext. 214, John Iagata Ext. 218

KLASIFAID



TOKSORI



MR MARK TIGAT

Sinia Protokol Opisa
Dipatmen bilong Praim Minista

Long Sarere mi kirap nogut long harim dai bilong MARK TIGAT.

Dai bilong Mista Tigat bai kamapim bikpela hevi long Dipatmen bilong Praim Minista bikos em i wanpela wokman we mipela ol wanwok bilong em i save gat bikpela rispek long em.

Mista Tigat em wanpela gutpela man tru bilong wok long opis bilong mi na opis bilong ol olupela Praim Minista long bipo. Long taim bilong mi, Mista Tigat em sinia protokol opisa long ol pati na visit i kamap long opis bilong Praim Minista na em i no save mekim mi bel nogut long ol wok bilong em.

Long rausim laip bilong dispela yangpela man i mekim bel bilong mi i kros na wari nogut tru.

Mi laik bai plis i mas painim dispela biruaman na kisim em i go long han bilong lo. Prea bilong mi i go long meri bilong em wantaim pikinini meri na ol famili bilong em. Ol famili bilong em na mipela ol lain i wok wantaim Mark i lusim wanpela gutpela man tru.

Prea bilong mi na ol pren na wanwok bilong Mark bai i go wantaim em long rot bilong em i go long God Papa.

BILL SKATE, CMG, MP
Praim Minista.



TOK SORI

Sief Seketeri bilong Gavman, Robert igara, Ekting Seketeri, Evoa Lalatute na ol wokman long Dipatmen bilong Praim Minista na Nesenel Eksekutyiv Kaunsel i laik autim bikpela sori bilong mipela i go long **MISIS HELEN MARAKAN** na pikinini meri **VALENSIA MARAKAN**.



LEIT MARK TIGAT MARAKAN
Sinia Protokol Opisa bilong Praim Minista

Ol man nogut i bin kilim em long Sarere moning Januari 9, 1999. Mipela tu i gat wankain wari na belpen ol famili bilong em i gat long dai bilong dispela papa, kancre, brata na pikinini bilong ol.

"Wanwan pren i makim wanpela wol long yumi, wol we i no bon yet inap ol i kamap. Na long dispela bung em nupela wol i bon."

MR EVOA LALATUTE
Ekting Seketeri

FRI KAR kompetisen!

Yu save olsem yu inap winim wanpela fri kar long Freeway Motors?

Baim wanpela Independent niuspepa, na katim hap toksave long baksait, raitim nem bilong yu na salim i kam. Salim plenti bilong dispela toksave na bai yu kisim plenti sans long win. Hariap na kisim wanpela Independent niuspepa tete.

Salim dispela hap toksave, i kam long:

**The Independent/Freeway Motors
WIN A CAR COMPETITION**
P.O. Box 1982, Boroko, I.I.I.

THE Independent

1998 the year in review!

JANUARY IS ON SALE, 70¢

70¢

ISSUE

Agororo haus lotu sanap bihain long 6-pela yia

FRANCO NEBAS i raitim

TAIM bilong rausim olupela yia na kisim nupela i gat kain kain we long amasim long olgeta hap long Papua Niugini na Wol tu. I save gat planti kain kain we long amasim nupela yia.

Long wanpela ples insait long Finsafen Distrik bilong Microbe Provins i lukim wanpela bikpela selebresen i bin kamap long dispela de Janueri 01, 1999. Ples Yunzain i stap samting olsem 1000 kilomita antap long mak bilong solwara (antap long maunten bilong Finsafen) i amasim dispela nupela yia wantaim openin bilong nupela haus lotu bilong ol.

Yunzain ples em samting olsem 2-3 aua draiv lusim Gagidu stesin (Finsafen) i go antap long maunten we i save kol tru olsem long Hailens. Ol pipel long hap i save tokples kote, Hube na Dedua. Populasen em samting olsem 2000 pipel i stap long 3-pela bikpela ples, Yunzain (olpela), Anong na Tombengi.

Long dispela 3-pela ples i gat 5-pela klen em , Faino , Tinogom , Bata , Pemboro na Gongde. Yunzain em i stap long Yomeng peris long Satelberth seket insait long kote distrik.



• Matthias Natu husat i bin go pas wantaim ol famili bilong em i wokim dispela alta o hap we baibel i stap na pasto bai ritim.



Janueri 01, 1999, i lukim bikpela amamas bilong ol long openin nupela haus lotu we i kisim ol 6-pela krismas long sanapim dispela nupela stail haus lotu we kos bilong em i olsem k31,000.

Dispela kamap bilong haus lotu em long hat wok bilong ol pipel yet na tu sampela helpim i kam long autsait olsem politisen na nesenel Lutheran sios.

Selebrasen bilong dispela haus lotu i kisim olsem wanpela wik olgeta we i stat long Mande Desemba 27, 1998 i go long Janueri 1, 1999. Moa long 10-pela singsing grup long arapela ples na ol asples yet i amamas inap long de bilong opim haus lotu.

Ol arapela ples we husat tu i bin kamap long selebrasen em , Hompua , Masa , Fasiyo , Yawo-Sirimana , Mape (Nigo), Kitaka peris Wareo na Dedua / Sanquo. Ol dispela ples tu i soim amamas bilong ol we ol i karim kaikai na presens (ofa) bilong ol tu kamap long haus lotu.

Man dispela i olsem wanpela so ya i kamap long ples Yunzain ya. Ol pipel bilong Yunzain we ol i wok long taun na olgeta hap

long kantri i bin kamap long witenesim dispela openin bilong haus lotu we i wanpela histori bilong ol.

Ol pikinini Yunzain husat i marit i go long arapela hap long Papua Niugini i kisim famili na ol poroman bilong ol tu kamap long dispela de.

Man ol i kilim samting olsem 26 kau na moa long 100 pik wantaim planti kaikai bilong gaden na stua. Ol visita i kamap long dispela selebrasen i amamas tru , long wanem ol i no isi long kaikai .

Wanpela hevi tasol em buai i sot we ol lain bilong kaikai buai i kisim taim liklik tasol ol lain long bus i gat buai tu ya em kavivi (wel buai) i stap. Long de bilong openin stret i bin gat liklik ren i pundaun tasol dispela ino stapim ol manmeri long kamap long witenesim dispela openin.

Moa long 3000 pipel i bin kamap long de bilong opening. Ol i kam olsem long ol ples long nambis na tu ausait long Finsafen distrik.

Man husat i go pas long wokim bilong dispela haus lotu Sipai Yuenga i tok olsem dispela haus

• Ol piksa insait long haus lotu i soim wanem hap gutnius i bin go

Antap • Agororo Memorial sios i sanap namel long Yunzain na Anong viles.

OL FOTO: FRANCO NEBAS.

lotu em long hat wok bilong ol pipel bilong Yunzain long ples na tu husat i wok autsait i givim-taim na helpim long sanapim dispela haus lotu.

Dispela haus lotu em ino gat wanpela kontrata o wanpela kampani i wokim, nogat em ol lain long ples yet i putim tingting wantaim na ol i sanapim dispela haus lotu we i namba wan stret .

Ol i givim nem long dispela haus lotu olsem, "AGORORO MEMORIAL SIOS" long tok ples kote i minim olsem , "Kisim ol man i kam na givim tok gutnius long ol".

Yuenga i tok, "long wanem as ol i putim dispela nem, em long wanem long taim bilong ol tumbuna bilong ol taim gut nius i bin kam, ol pipel long Yunzain yet i bin go na kisim ol arapela lain long arapela ples i kam na kisim gut nius na i go bek long ples bilong ol. long dispela as ol i kolim dispela nem."

Reveren Baker kosiang bilong Lutheran sios i bin opim dispela sios. Ol lain husat tu i bin kamap em memba bilong Finsafen Alfred Pogo, wod kaunsel, pasta long arapela peris na ol bikman bilong nesehel Lutheran sios.

Pipel lukim ol lida olsem ansa bilong ol hevi

MASTA WAI i raitim

TAIM bikpela haus palamen i bin op long olgeta 109 nesene memba bilong palamen i kam bung, ausait long palamen haus tu i pulap tru long ol manmeri bilong planti kain kain ples. Olgeta i kam tu long lukim memba bilong ol na toktok wantaim ol. Dua na bikpela geit bilong haus palamen i pulap tru long ol planti manmeri bilong ples na long taun tu.

Mi bin bungim sampela lain bilong ples i kam long lukim Gavana bilong ol. Ol i kam wantaim sampela bikpela hevi long sindaun bilong ol long ples. Olsem na ol i sanapim tingting olsem Gavana bilong ol inap painim sampela gutpela rot long helpim ol wantaim hevi na wari bilong ol.

Dispela i soim tu olsem, ating long provins bilong ol yet, i save hat tumas long ol ples lain i gat

sans long lukim lida bilong ol. Ating long provins yet, opis bilong gavana i save hat tumas long ol asples lain i go mekim apoinmen bikos ating planti lain tumas i save laik lukim Gavana o ol kain lida bilong provins. Olsem na planti apoinmen bilong planti lain i save stap longpela taim moa.

Tasol taim ol asples lain i lusim mani long kisim balus i go long Mosbi long lukim memba o Gavana, ol i save gat gutpela sans tu long lukim lida o nogat?. Sapos memba i Minista, ating bai em i nogat inap taim long lukim ol pipel bilong em long ilektoret. Bikos em bai i gat planti wok na ol bung bilong dipatmen na ministri em i lukautim. Bai em i mas sindaun long planti bung bilong wokim ol plen na polisi na ol ripot bilong kisim i go long palamen o long kabinet miting. Ating wanpela gutpela taim tasol long memba o minista i ken mekim long lukim ol pipel bilong en, em long wiken long

haus bilong em stret. Bikos long opis, bai em i nogat taim.

Ating sapos memba i memba nating na i no kisim wanpela wok ministri, em bai i gat sampela taim long lukim ol pipel bilong em. Ating bai em i gat planti taim na em bai singautim ol pipel bilong em i go long opis bilong em long ol i ken sindaun na toktok wantaim. Na ol pipel i ken autim tru planti wari na hevi bilong ol we memba inap painim rot bilong helpim ol.

Sapos ol pipel bilong ples i go lukim memba long haus palamen, na long dispela taim, em bikpela bung bilong palamen i kamap, bai husat memba, minista o Gavana i mas painim spes o taim insait long dispela taim long lukim ol pipel bilong em. Sampela taim, ol lida i no laikim bai ol pipel bilong em i lukim em long dispela taim bilong palamen kibung. Olsem na sampela i save askim ol pipel long kam bek lukim em long wanpela o tupela wik bihain.



• Memba bilong Kundiawa Peter Waieng i sikan long ol ragbi pilaia long opim wanpela ragbi lig gren fainel long Kundiawa pilai graun.

“...Taim mipela i makim lida i go long haus palamen, em i no moa lida bilong yumi dispela famili o dispela ilektoret tasol. Em bai sanap olsem lida bilong olgeta pipel bilong Papua Niugini.”

Long las yia mi bin lukim planti lain bilong ples i bin go lukim memba bilong ol. Tasol dispela i bin kamap long taim bilong palamen kibung stret long dispela wik. Mi bin bungim narapela tupela bikman long ausait dua bilong haus palamen. Na mi askim tupela. Tupela i tok, sampela lain i go insait pinis long lukim memba na tupela i stap ausait bikos nogat man inap sainim tupela i go insait.

Tasol memba bilong ol ples lain ya em mi bin lukim em i sindaun long floa bilong haus palamen long taim bilong bung. Bihain tasol long bung i pinis, memba ya i bungim mi long rot insait long palamen na tok halo long mi na em i tekov i go long painim kaikai long belo. Taim mi kisim stori long tupela ples man olsem ol i kam long lukim memba, mi tingim tasol sapos memba bai i gat taim long sindaun na toktok wantaim ol long apinun o nogat. Bikos dispela em bisi de tru bilong olgeta memba bilong haus palamen.

Tasol ol pipel tu em bikpela samting long olgeta memba i mas rispek na givim sampela taim long lukim ol na harim wari bilong ol.

Planti ples lain i save ting gutpela taim bilong lukim memba


em long taim palamen i bung. Bikos long dispela taim, bai memba i kamap na stap na ol i ken lukim em isi long opis bilong em. Tasol ol i mas klia tu olsem, sampela taim, memba bai i gat planti wok o bung long dispela taim bikos long sampela bikpela toktok we i sut long wokim lo o ol bikpela toktok bilong palamen i mas pasim. Olsem na i gat hap hap sans bilong ol pipel na memba long ol i ken bung wantaim.

Taim mipela i makim lida i go long haus palamen, em i no moa lida bilong yumi dispela famili o dispela ilektoret tasol. Em i stap pinis long bikpela haus bilong nesene palamen. Na em bai sanap olsem lida bilong olgeta pipel bilong Papua Niugini. Em bai mekim ol lo na disisen we olgeta manmeri bilong Papua Niugini bai kisim amamas o sevis na developmen long en.

Planti lain i go stap long Mosbi na i laik go bek. Na taim ol i bungim hevi long baim tiket bilong balus, ol i save ron i go long haus palamen long lukim memba long givim ol mani bilong baim balus tiket. Arapela i save ting olsem ol i mas go lukim memba long givim ol sampela mani bilong statim ol liklik wok projek insait long ples o long taun. Dispela em planti kempen komiti bilong ol memba i save kamap wantaim.

Tasol dispela samting i gat hevi bilong em. Taim memba i kisim ol toktok long komiti o ol lain famili o lain sapota bilong em long mani bilong wokim bisnis, sampela taim memba i save pundaun long dispela kain traim we em i save givim aut mani. Na bihain, ol lain bilong Odita Jenerel i save sekiri rekot bilong mani ol memba i save kisim na askim long risit na pepa bilong ol wok mani i go long en. Na dispela i save kotim memba na memba i save lusim sit bilong em na go kalabus o risain long kamap memba.

Long palamen taim, planti manmeri i save go pulap. Na ol i gat planti kain kain stori na as bilong lukim memba long tokim em.



• Vais minista bilong Turism Ginson Saonu i bungim ol pipel bilong Madang provins long wanpela bung bilong ol.

...bilas bilong bipo i wok long lus isi isi

JOE KANEKANE i raitim

SAPOS yu stap insait long wanpela bia klap, o sampea hap we planti ol man i stap, yu bai inap long harim ol giaman koros namel long ol bia pren bilong hailens na nambis.

Kain koros i pani tasol em i blong daunim poin long wanpela o narapela. Sapos yu bilong Sepik bai yu harim ol kain tok olsem, karving o doti wara, o sapos yu bilong Lae ol bai i tok Wopa, kunai o Karanas. Long ol narapela hap bilong kantri i gat kankain nem we ol i bai yusim, Dispela i no bilong belhat na kirapim pait, em i bilong wokim pani na lap tasol.

Tasol mipela ol lain long hailens, mipela i save kisim taim tru, taim ol poro i wokim pani na tok: *gris pik o sikin diwai, o as tanget*. Yu save gris pik, em i gat smel na sikin diwai, em i gat hevi long raunim namel long bel bilong yu na i no gutpela stail bilong dres ap.

Long wanem em i tru, mipela i save rabim gris pik long taim bilong bilas na tu ol tumbuna bilong mipela i save putim sikin diwai na supim tanget long bak-sait bilong ol.

Bai mipela i tok wanem, samting ol tumbuna i lainim mipela, olsem na ol papa bilong mipela i wokim na nau, mipela tu i bihainim lek bilong ol dispela ol lain.

Ol poro bilong mi i laki liklik, long wanem, masta i kamap pinis taim ol mipela i bon, olsem ol trasis na sioi i kamap pinis.

I gat taim we mipela i save werim, long taim bilong wokim pasin kastom na tu long putim long taim bilong tingim pasin tumbuna.

Olsem na taim ol poro i mekim dispela tok, mipela i save daunim na tokim ol olsem, long dispela hap tok em ol i win. Tok pani bilong ol i tru, olsem na i nogat ro long mipela i haitim dispela kain tok.

Taim ol waitman i no bin kam yet, ol pipel bilong mipela long Sauten, Enga na Westen hailens i save tasol long putim sikin diwai.

Long dispela taim i no gat ol samting olsem kolos o laplap we ol i ken karapim sem na tanget long as bilong ol.

Skin diwai

Diwai i hevi tru, na turangu ol tumbuna bilong mipela i mas kisim bikpela taim tru long karim kain hap diwai namel long bel na silip wantaim. Diwai i pas long bel na raunim sait olsem na ol lain i kisim taim. Long sindaun tu, bai yu kisim taim, long wanem yu mas surukim sikin diwai i go antap long bel o i go daun long sait. Sapos yu no putim gut, em i bai mekim skin bilong yu i tekewe na sua i ken kam. Na, taim yu no taitim rop gut, diwai i ken pundaun long ai bilong plentu lain, na yu ken kisim bikpela sem. Taim ol i laik silip ol i save larim tanget autsait long haus. Long moning ol i save kisim na werim gen. Long nait ren na



• Joe Kanekane namba tri long raithan i werim skin diwai na tanget long greduesen bilong em. Em i sanap wantaim ol wan skul bilong em long yia 1993.

Skin diwai na as tanget



• Joseph Wambo wantaim Mathew Mata bilong ples Galkowasu i putim skin diwai bilas bilong Tupela.

kilaut i save mekim tanget i wet yet, na i gutpela long werim.

Long katim sikin diwai i hat tu. Yu mas painim dispela spesel diwai long bik bus. Katim gut, bihain tekewe skin bilong dispela diwai. Bia yu larim i drai long san pastaim, bihain yu makim gut sais bilong yu na katim. Sapos yu popaia, em bai hatwok bilong yu i go nating. Tasol sikin diwai i gutpela, long wanem yu ken putim akis insait, han paus o sumuk namel long bel na skin diwai. Em i bai stap gut.

Tanget

Long painim tanget tu, bai yu kisim taim long wanem, taim tanget i drai

bai yu mas painim niupela. Sampela man i save plainim tanget arere long haus, tasol sampela i mas go long wei hap long bus long kisim. Bikos plenti lain i save painim, sampela taim bai i nogat, olsem na yu mas go long bikbus stret long kisim.

Ol man meri long peles tu i bai lukim ol tanget yu putim na ol i ken skeklim, sapos yu wanpela man bilong wok o man bilong stap nating tasol.

Long wanem sapos yu kisim wanpela long na gutpela tanget, em i bai karamapim olgeta hap long baksait bilong yu. Sapos yu kisim sotpela, ating bai sampela hap long bodi bilong yu i bai stap long

ples kilia. Taim yu laik nil daun o kalapim banis o brukim paiawut, em yu mas wokim liklik ol muvmen olsem i gat sans olsem bai sampela hap bilong yu i bai stap long peles kilia.

Tanget i gutpela long ol arapela diwai lip long bus. Em i isi long stretim taim yu sidaun na tu em i save stap long taim pastaim long yu i ken senisim. Yu ken werim inap long fopa pela dei pastaim long em i drai. Yu ken plainim gen dispela ol tanget yu werim pinis. I gat plenti yus bilong kain lip olsem na sapos yu go raun long hap bilong hailens em i

Tasol, taim ol werim i go i go, em i kamap isi.

Werim skin diwai

Las taim mi bin werim sikin diwai, em taim mi kisim digri bilong mi long UPNG. Man, husait i kisim skin diwai i no kisim long mak bilong mi, olsem na samting i tait nogut tru namel long bel na sait bilong mi. Taim mi putim malo na tanget, diwai i go tait olgeta. Greduesen, olsem na plenti ol man i toktok na mi kisim taim tru long stap isi long sia bilong mi.

Long dispela taim tu mi putim het bilim na rop na pisin gras-tu i mekim het bilong mi pen, na klostu tru mi traut. Taim mi rausim bilas, bikpela sua i kamap long tupela sait long wanem skin diwai i kaikai sait bilong mi.

Mi hamamas olsem, mi bilas tumbuna long kisim pepa bilong mi. Long wanem mi no save sapos bai mi gat taim long werim dispela ol kain bilas gen. Mi no save tu sapos ol pikinini bilong mi i bat gat taim long putim dispela bilas bilong tumbuna. Tasol, long tingting bilong mi, mi hamamas olsem long bikpela dei long skul bilong mi, mi putim skin diwai na as tanget, long soim olsem mi gat luksave long pasin tumbuna.

Mi save tu, olsem long laif bilong mi, mi bai werim nek tai, na trasis olgeta taim, olsem na maski sapos mi kisim pen na sua i kamap long sait bilong mi, em wanpela taim tasol. Piksa bilong mi long dispela spesol dei i bai stap yet long ol yia i kam bihain. Tru, ol poro i ken daunim poin bilong mi wantaim ol narapela lain, tasol wanem samting ol i no inap long rausim, em dispela pasin tumbuna stail long bilas. Em i bai stap yet.

KANAGE



■ Kanage wantaim meri bilong em i go wok gaden i stap na wanpela bikpela balus i kam i go. Kanage sanap kisim win na lukluk i go antap long balus na tokim meri bilong em, tumoro bai mitupela i go na yu bai lusim mi. Na meri bilong em askim, bai mi lusim yu i go we?. Na Kanage tok, yu lukim traipela susuki i kam go antap ya em mi laik go long en. Meri bilong Kanage lap na tok yu bus kanaka, dispela i no susuki, em ol i save kolim balus. Na Kanage tok, ating nau ol waitman i mas senisim nem ya, tasol taim bilong mipela, ol waitman i save kolim susuki. Sapos ol i laik senisim nem o sotkat long nem, yupela mas kolim PNG pilim pen. Em sotkat nem bilong balus.

**Agu Marun
Lae**

■ Kanage em wanpela man nogut bilong pilai kas long olgeta de. Em i no save malolo liklik. Tasol wanpela Sande, ol lain bilong em i askim em long go long lotu. Olsem na ol i go lotu i stap na taim bilong kisim kolekta. Orait olgeta manmeri i putim kolekta i go na kap bilong kolekta i kam long seksen bilong Kanage. Kanage lukluk i stap em tupela man long sait bilong em i putim 20 toea 20 toea. Olsem na Kanage i ting olgeta lain i bet 20 toea. Taim kap i kam long Kanage, em putim 50 toea na kokia 30 toea. Taim man bilong kisim kolekta i lukim, em i tokim Kanage, nogat man i save kisim sens long kolekta. Tasol Kanage i harim na askim, olsem wanem, yupela senisim lo pinis a?. Man bilong kisim kolekta i harim na isi tasol em kisim kolekta na wokabaut i go. Ol famili bilong Kanage i lukim na ol sem nogut tru.

**Karry Remda
Lae**

■ Kanage i hangere nogut tru na em kisim bret na painim bata bilong rabim long bret. Em painim bata i go na kisim Axion bilong wasim ol plet kap na sospen. Boks bilong tupela i wankain olsem na Kanage i ting em bata. Kanage rabim Axion pinis long bret na em mekim save long kaikai na slip long bet i stap. Taim junia Kanage i kam lukim em, kalap nogut na bikmaus, aiyo papu, yu kaikai marasin bilong wasim plet wantaim bret ya. Taim Kanage harim olsem, em holim bel na bikmaus long junia Kanage na tokim em, yu wantaim mama bilong yu i stap nau long mak bilong meme na dai na pinis olgeta. Junia harim olsem olsem na em ronawe i go stap wanpela wik wantaim anti long Kimbe taun.

**Waven Hepe
Kimbe**

■ Kanage i save wok long Wewak na em i gat wanpela gelpren. Kanage em papa bilong famili tasol yu save, mauswara bilong em i save moa yet na em autim tiket bilong yangpela meri saki kantri yet. Wanpela taim meri ya i no moa stap long Wewak olsem na Kanage i ringim wanpela 6 packs poro bilong em long Mosbi na askim, wandok yo, yu lukim sampela lain tu long kekeni len o nogat?. Poro bilong Kanage i harim na bekim, olsem wanem, ol pik i brukim banis ah, ating yu no wokim gut banis olsem na ol pik i kalap i go painim kaikai long narapela banis. Kanage harim olsem na em skelim olsem skoa bilong em i sot pinis olsem na em tok, em orait, sapos mi painim pik ya,



AIVOO! EM WANEM KAIN KARIM LEK YAH!?

NA EM KARIM LEK TASOL YAH! NUPELA, STAIL YAH!

bai mi pasim han lek bilong em na lokim em long banis tasol. Poro bilong Kanage i harim na lap nogut tru.

**Kanage pren
Mosbi**

■ Kanage em bilong Mt Giluwe long Simbu provins. Wanpela taim em bungim ol yangpela meri long Kundiawa taun na ol i pulim em i go long ples bung bilong karim lek. Taim Kanage i go sindaun, em ino westim taim. Wantu tasol em holim wanpela hap lek bilong meri Gumini na tromoi antap long hapsait nek bilong em. Turangu meri Gumini i hangamap wansait i go daun bikos narapela laik bilong em i flai antap long skai na narapela i traim long sapot long graun. Taim ol bikman bilong lukautim haus karim lek i lukim dispela, ol i kam na pamim beksait bilong Kanage wantaim bikpela diwai na em tromoi lek bilong meri Gumini i go daun na brukim haus karim lek i go ausait na tekov long Mt Giluwe long biknait.

**Lazarus Ralea Francis
Goroka**

■ Kanage em kepten bilong wanpela soka tim long Kimbe. Wanpela wiken ol i pilai soka na Kanage i kisim bal na kikim bal i go antap tru. Olgeta pilai bilong tupela tim wantaim i ron i go long bungim bal bai i kam bek tasol bal i no kam bek. Bal i go antap na lus long klaut. Kanage i isi tasol go ausait na kaikai buai na pulim smok na kisim win gut tru orait em i kam bek long pilai graun. Taim em i kam bek, bal i pundaun stret long lek bilong em. Em nau Kanage i tokim ol lain long fil, yupela ol liklik pikinini pilai soka long nau tasol ya. Yupela i no fit long wanpela samting. Em mi kikim bal i go long namba wan pilai graun bilong mipela ya. Olgeta manmeri harim na lap nogut tru.

**Joe Fren
Kimbe**

■ Kanage i sanap arere long wanpela banana na lukluk long ol turis waitman i wok long raun na baim kaving na ol bilas

bilong ol asples Sepik. Em i sanap igo na ai bilong em i slip na em pundaun long ai bilong olgeta manmeri na ol turangu waitman na meri i kirap nogut tru.

Kanage i kirap tasol na bikmaus i go bek long hap em i bin sanap na tok, yupela ol man bilong pait ah, wet pastaim. Em tok olsem na siksti igo long haus na ron wantaim tamiok kam aut. Taim ol manmeri i lukim olsem, olgeta i lus nabaut na turangu ol turis tu i kalap nabaut na ron long hotel ol i slip long en.

Kanage i sanap na lukim as bilong banana i bruk na em i lap isi tasol long em na go bek lusim tamiok insait long haus.

**Eugene Sami
Wewak**

■ Kanage bilong Kagua long Sauten hailans. Wanpela taim em wantaim pren meri bilong em i go pikim kopi. Tupela pikim ol kopi i go na Kanage i tait olsem na em sindaun long as bilong kopi na kisim win. Em sindaun i go na lukim han bilong pren meri i gat hap kolos i bruk long aninit. Olsem na em i kirap isi tasol na tokim prenmeri, aiyo, aninit long han bilong yu i olsem wel skin bilong malio ya. Taim prenmeri i harim olsem em i kirap na bekim, taim bilong kisim kopi na yu wok long stadi long han bilong mi i stap a. Ating i gutpela long yu no ken kam long gaden, yu mas stap long haus na wet tasol i stap.

**Kopi Alega
Kagua**

■ Kanage i waswas gut tru na i go sanap lukim ol manmeri i pilai kas. Em sanap i go longpela taim na lukim wanpela yangpela meri i pilai na lusim bikpela mani tru. Klostu meri ya i laik kirap na Kanage tokim em, yu sindaun, bai mi sponsa long yu. Taim meri ya harim, em tok, rait man. Sanap long beksait bilong mi na tromoi i kam. Kanage harim na kisim bikpela fittings tru na lusim ova K100 long betim meri ya long kas.

**Alpa Hondi
Kimbe**

■ Kanage sindaun long klasrum i go na tisa tokim ol studen long go ron liklik long ausait na kam bek. Taim olgeta studen igo aut, Kanage ting tisa i no tok long em, olsem na em sindaun yet. Taim ol studen i kam bek, ol i lukim Kanage sindaun na lap isi tasol bikos tisa i no lukim em. Tisa i kirap na tokim ol studen, get your books and write your home works. Taim Kanage harim olsem em karim ol buk bilong em na wokabaut igo ausait na go long haus. Ol studen i lukim na ting Kanage i mas kisim medol kes o em ino save gut tok Inglis o samting.

**Stenly Nandex
Lae**

■ Kanage i wokabaut i go na wanpela polisman i kam bung em na tok. Gut moning long em. Kanage harim dispela toktok ino stret olsem na em i askim sampela yangpela meri long rot, hey ol susa dispela plisman i tok Gut moning long mi ya, tasol mi no save long wanem mining bilong dispela tok. Ol meri ya harim na tokim Kanage olsem, plisman ya i tok, tumoro bai yu dai. Taim Kanage harim olsem em siksti igo bungim plisman ya na tokim em, hey yu tu Gut moning long yu, tumoro bai yu tu i dai. Taim plisman i harim olsem em paul olgeta na sanap painim tingting long dispela toktok.

**Noring Nareng
Mendi**

■ Kanage wantaim misis bilong em i go wokabaut i go long stua na bikpela ren i bungim tupela long rot na wasim Kanage nogut tru. Misis Kanage isave na kisim ambrela olsem na em i orait. Taim Kanage i laik go holim men bilong em na stap aninit long ambrela. Misis bilong em pusim em i go aut na kros long em. Ren i wasim Kanage nogut tru na em belhat na tok, em orait, ai bilong pablik olsem na ren i ken wasim mi na mi kol. Long haus bai yu wokim bikpela paia stret na boilim skin bilong mi inap mi kisim bek win bilong mi. Olgeta manmeri harim na lap indai nogut tru long toktok bilong Kanage.

**Mangi Kapriman
Buloto**

KANAGE

"Em nau, narapela wik bilong mi ken"



■ Olgeta taim Kanage i save go long belo na pinisim kaikai bilong wanwok bilong em. Kanage i save giamanim misis bilong wanwok bilong em olsem, "noken wari, paps i kaikai pinis long hotel ya". Olsem na misis bilong pren bilong em i save givim kaikai tasol na em kaikai. Wapela taim pren bilong Kanage i belhat nogut tru na planim wapela retpela lembo i go insat long plet rais na lusim i stap. Kanage i amamas na kam daun na pren bilong em i tok, "Kanage, planti kaikai ya, kam kaikai sampela". Kanage amamas na sindaun holim spun na pulapim rais i go long maus. Taim tit bilong Kanage i pairap, ol sids bilong lembo i bruk nabaut insait long maus bilong Kanage. Em nau tuhat i stat long ron long pes na ol bodi bilong Kanage tasol em i no tokaut. Em laik ektim olsem fada man olsem na em tok, "yu kaikai wantaim mipela ol India, bai yu kaikai ol sili na ol kari kaikai tasol." Samting tru em maus bilong Kanage i kuk pinis tasol em i laik giaman haitim.

Big bro Kanage Mosbi

■ Kanage em manki Lae na em i go long Mosbi. Em i kalap long F28 balus na go long Mosbi. Taim balus i flai i go antap tru insait long klaut, bel bilong Kanage i surik nogut tru. Na em i stat long wari na tingim ol papamama na susa brata na ol pren bilong em long Lae. Em i traime long lukluk long glas i kam daun na ting em bai lukim haus na ol samting long Lae siti. Tasol em kirap nogut long lukim olsem bikipela klaut i karamapim olgeta hap. Kanage i lukim olsem bikipela waitpela klaut i karamapim olgeta hap na em tingting long em yet olsem, dispela i mas namba tu graun ya. Yumi save harim long lotu olsem bihain bai yumi go long nupela ples Paradais. Olsem na dispela i mas dispela hap graun we bihain bai yumi wokim ol haus na siti long en bihain.

Yu save, Kanage i no bin ron long balus bipo na em i no save long wanem samting i stap antap long klaut na em i ting balus i no inap ron i go antap olsem.

Festaim Manki Mosbi

■ Kanage i save putim skin tru long wapela yangpela meri bilong Kimbe. Tasol meri ya i no save laikim Kanage. Oltaim bai Kanage i bungim ol poroman bilong em na stori long ol olsem meri Kimbe em dai pinis long bros bilong em.

Taim meri Kimbe i harim olsem planti manmeri i stori long em olsem Kanage i autim tiket bilong em, em bel hat nogut tru na painim rot long tokim Kanage olsem em i nogat laik long Kanage.

Wapela taim meri Kimbe i raitim pas na tokim Kanage olsem, "Dia brata Kanage," Kanage i no ritim olgeta pas bikos bel bilong em i bruk nogut tru taim em i lukim olsem meri ya i kolim em brata. Wapela wik olgeta Kanage i sik na i no soim pes long ples klia.

Kanage heart breaker Mosbi

■ Kanage i save prenim wapela yangpela meri long Bumayong kompaun long Lae. Tupela pren gut na Kanage i gat bikipela laik tru long maritim meri ya. Wapela taim Kanage i spak na em wantaim tupela susa bilong em i wokabaut long rot na karim radio kaset wantaim na harim musik. Taim pren meri bilong



WHAT'S THE KILOMETER FROM HERE TO KAINANTU?

YUPELA HOLIM STRONG, MASTA ITOK EM BAI GIVIM GO TRU! HOLIM STRONG!!

Wapela wik bihain, Kanage i tokim ol lain long haus olsem em i gat sua long as bilong em. Ol lain long haus i harim na tokim em, "yu wanem, as bret a. Sampela taim, kam long ples na kisim trening." Kanage harim na tokim ol lain bilong em, "turu ya, ating yupela ol ples lain i mas gat dabol skin pinis ya na mipela ol lain long taun i wok yet long wan skin ya." Olgeta lain i harim na lap nogut tru.

Sonny Sandre Para, Morobe provins

■ Kanage i kamap olsem wapela lidaman bilong ples. Wapela taim em i harim kot bilong wapela yangpela man na wapela yangpela meri. Komplén i kamap olsem yangpela man i laik holim yangpela meri tasol em ronawe. Ol lain bilong meri i soim bruk dres bilong meri ya long kot. Nau Kanage i askim man ya, "Joe, yu sikirap long wanem samting na yu brukim dres bilong Susana?". Na man ya i tok "askim Susana pastaim, mi bai toktok bihain long em". Olsem na Kanage tanim na askim meri long tokaut. Meri i tok "baten i strong tumas olsem na mi brukim long tret." Taim Kanage harim olsem em askim, "taim tret i bruk Joe i stap we?". Na Susana i tok gen, "Joe i stap pinis." Kanage tanim na tokim papamama bilong meri, "yupela harim pinis a. Lukim nau, tupela i pas pinis. Larim tupela i marit tasol. Kot dismis?". Kot i pas na olgeta manmeri i go bek long haus wanwan.

Paps Kanage Goroka

■ Wapela taim Kanage i trikim meri bilong em olsem em i laik go raun painim abus long nait. Olsem na long 8 kilok nait, Kanage kisim spia na tos na lusim haus. Taim Kanage go ausait long haus, meri bilong em tu i sanap long dua na lukim em. Misis Kanage sanap lukluk i stap na em lukim Kanage i go long kona na haitim spia long bus na katim long narapela rot i go. Nau Misis i kisim save olsem i gat bikipela danis long ples na Kanage i laik mekim trik. Misis Kanage tu i kirap bilas stail moa yet na em i go long disko ples. Taim em i go kamap, em lukim paps Kanage i sindaun laitim spia na smok i stap. Em nau Misis

Kanage mekim trik na salim wapela boi i go tokim Kanage olsem wapela meri i laik danis wantaim em. Taim Kanage i harim dispela, em seksek tru na lusim hap spia istap na kirap i go na bungim meri ya. Misis Kanage i bilas stail moa yet na Kanage i no klia long em. Tupela danis i go na Misis Kanage i tokim Kanage, "bai mitupela tasol i danis olsem i go tulait. Noken danis wantaim narapela meri". Kanage harim na fillings kukim lewa bilong em olgeta. Tupela danis i go na meri askim Kanage, "mi gat bikipela laik long yu tasol mi save olsem yu marit man ya". Na kwiktaim Kanage bekim na tok, 'em bipo, nau mi singel ya, just love mi tasol'.

Tupela danis i go na meri i tok long lukim Kanage gen long narapela taim. Olsem na em i go pas long haus na go giaman slip i stap. Klostu tulait na Kanage i go kamap wantaim spia na bunara bilong painim abus. Em nok na meri bilong em i kam opim dua. Em nau misis i askim, "ol abus we?". Na Kanage tok, "sori taim nogut na ol abus i ronawe nabaut long mi." Em nau misis bilong em tok, "em orait, mi gel pren bilong yu olsem na yu bai trikim mi na maritim nupela meri bikos yu bruk marit pinis wantaim namba wan meri bilong yu a?". Meri i hatim em gen, "olgeta lapun i save isi long danis ya, tasol yu ya nogat, beksait bilong yu i mas sanap stret yet olsem na disko bilong yu i brukim tulait na trikim ol meri olsem yu singel man". Turangu Kanage kisim bikipela mama bilong sem nogut tru na i no go raun ausait inap wapela wik olgeta.


Watson Watok Sandaun

■ Kanage i bilong Buang na wapela taim em i sik na i go long haus sik. Em i go sindaun long fom na wetim dokta long harim sik bilong. Tasol dokta i kirap na i go insait long opis na Kanage i sindaun wet tasol. Nogat narapela sikmanmeri i kam. Na Kanage wapela tasol. Olsem na em wet longpela taim i go na em les. Nau em lukim olsem nogat man na em surik i go long fran na lukim sampela marasin. Em kirap na holim marasin bilong pekpek wara na ting olsem marasin bilong skin pen. Em kisim na rapim long skin bilong em na i go bek sindaun wetim dokta i stap. Taim dokta i kam bek, em smelim olsem sampela kain marasin i smel olsem na em askim, "sikman, wanem marasin i smel ya?". Na Kanage i tok, "dokta, nogat man long givim mi marasin olsem na mi yet kisim marasin bilong skin pen pinis". Dokta harim na bikmaus na tok, "yu longlong, em ino marasin bilong skin pen, em marasin bilong pekpek wara".

Yasaptung Bullang Buang, Morobe provins.

■ Kanage wantaim sampela wantok i wetim pmv bilong go long ples Kainantu. Ol i sanap long Eriku long Lae i stap na wapela waitman tu i laik go long Kainantu na em i kam stop na askim, "who's going to Kainantu, jump on." Kanage muvum olgeta lain i go long beksait na em yet saitim long fran wantaim waitman ya. Ol i draiv i go na waitman i mekim ol stori long tok Inglis na Kanage i no save. Tasol em i wok long giaman lap na muvum het bilong em tasol. Olgeta taim waitman i toktok bai Kanage i lap na muvum het na tok, "Agenes o, mi kam o". Waitman i harim na askim Kanage gen, "whats the kilometer from here to Kainantu?". Kanage harim na subim het i go ausait long windua na tokim ol lain long beksait olsem, "yupela holim strong, masta i tok bai em i givim long 60". Taim ka i kamap long Wararais na abusim go antap liklik long Kasam Pas, waitman i askim gen long amas kilomita bilong rot i stap yet. Na Kanage i mekim wankain samting gen. Em subim het i go ausait long windua na tokim ol lain, "ol lain o, holim strong o, masta bai givim long 60". Taim waitman i harim olsem, em stopim ka na rausim Kanage na olgeta lain i go daun na em yet draiv i go. Olgeta lain i kros nogut tru na askim Kanage long wanem samting i kamap. Na Kanage tok, "Agenes em gel pren bilong mitupela wantaim olsem na em kros bikos mi spikim Inglis moa yet winim em."

Ted Maya Kerevat, Is Nu Briten provins.



Rot we Tongo Wara i kamapim het bilong wara Mendi

LONG taim bipo tru, wanpela man na meri i save stap klostu long wanpela liklik maunten ol i kolim Riviniga insait long Upa, Mendi Isten Hailans provins.

Tupela i save lukautim pik na planim planti kaukau na ol kainkain kaikai. Tupela tu i gat wanpela bikpela taro gaden. Wanpela taim taro i redi na tupela i laik mumu na tupela digim ol taro na kam putim long haus, kisim lip, pumkin paiauwut, stretim ol ston. Ol i stretim olgeta samting pinis.

Tupela i sapim ol taro pinis orait man ya i kirap na laik kukim ston. Em i putim ol liklik diwai daunbilo. Em i putim gen ol bikpela bikpela antap nau na em i tokim meri long putim ol ston i go antap. Man ya traim long winim paia i ken lait Em i winim paia i go i go tasol paia i no stat Olsem na em i tokim meri ya long kam winim paia gen. Meri ya i winim paia i go i go na em i no lait.

Orait em tokim man ya gen long kam winim paia. Trangu man i winim paia strong nogut tru i go i go na ai bilong em i ret nogut tru. Smok tu i bagarapim em nogut tru. Paia i kamapim bikpela smoke stret tasol em i no lait. Meri ya i go senisim man ya gen na em i winim paia. Em winim i go i go tasol smok i go bikpela stret na lait i no kamap. Tupela yet senis, senis na winim paia i stat long moning i kam inap long apinn nau trangau ai bilong tupela i i go ret olgeta na het bilong tupela i pen.

Tupela i sotwin nating na man yet i belhat nogut tru. Em i traim yet i go i go tasol smok i kamap bikpela stret na lait i no kamap. Man i kirap kisim dabol stik ya na em i tok olsem wanpela samting i stap insait long hia na mekim o em kirap pokim as wantaim dabol stik ya. Taim man ya rausim dabol stik long as semtaim wanpela liklik wara i sut aut long as.



Man i kirap tna okim meri ya long lukim wanpela samting i kamap. Meri i kirap lukim olsem wanpela lukluk wara i wok long sut isi isi long as.

Tupela i lukluk i stap yet na wara ya i wok long kamap bikpela isi isi.

Tupela i kalap i go antap long bet bilong tupela na lukluk long wara ya i stap. Isi isi tasol wara i kamap bikpela na em karampim olgeta hap insait long haus. Isi isi wara i wok long kam antap na klostu wara tasim tupela nau. Tupela i lusim haus na bed bilong tupela na i go ausait. Ol i sanap lukluk i stap wara ya brukim i go long hap we ol i sanap long em gen.

Tupela gen i lusim dispela hap na go baksait long haus na sanap i stap. I no long taim na het bilong wara i bihainim tupela na kamap long ples tupela i stap long em gen. Tupela manmeri ya i lusim dispela hap na tupela siksti i go na sindaun long geit long kam insait. Tupela i lukluk i stap yet na man, het bilong wara i kam. pinis long ples tupela sindaun i stap long em. Wara i kam pinis na tupela i kirap i go hait long daunbilo liklik na hait i stap. Isi tasol het bilong wara ya i kam pinis long tupela.

Tupela kirap lusim dispela hap, givim sikst nating i go daun moa liklik na hait i stap. Tasol ya save pinis wara ya i no lusim tupela. Em i wok long bihainim tupela manmeri ya yet. Mekim i go i go olgeta lusim eria bilong tupela tasol em bihainim tupela yet.

Tupela i traim long hait na mekim sampela JeckJok olsem leta "S" tasol wara i no lusim tupela. Em i wok long bihainim tupela yet na kam daunbilo tru. Orait tupela i no toktok tuol i stap isi tasol, i no long taim na wara kam long tupela. Tupela i go i go yet na wara bihainim tupela yet. Ol i mekim olsem na kam yet i go daun na ol i go kamap long daunbilo tru. Tupela i sanap na lukluk i go antap gen tasol olgeta wara i karim i kam daun.

Tupela i pret nogut tru, nogut wara bai kisim tupela so tupela givim nating i go daun olgeta tasol wara i no lusim tupela. Wanem samting tupela i mekim em wara i bihainim ol yet Ol i kam long narapela hap na tupela i hait i stap. Tasol wara i kamap pinis long tupela plet wantaim, sotwin wantaim tupela kam daun yet na kamap long wanpela maunten na wet i stap. Tupela i lukluk i stap na

wara i kamap wanpela wara we olsem snek i longpela tru. Hap bilong tupela em wara i karampim pinis.

Tupela pret nogut tru na sanap i stap yet.

Het bilong wara i kamap pinis long tupela na tupela i lusim dispela hap gen na kalap i go antap long maunten. Wara i bihainim tupela tasol i hat long kam antap long maunten. Olsem na em ipainim narapela rot bilong em yet na i go daun. Tupela manmeri i wokim haus long wanpela maunten em maunten kisim em long lake Ekari. Wara i go daun olsem long Mendi na ol lain long Mendi ol i save kolim wara Mendi. Ol lain long Apa Mendi i save kolim Tongo Riva na em het bilong Wara Mendi.

Sapos yu wanpela visita o yu wanpela sumatin bilong Mogol Nesinol Hai Skul, bai yu lukim Tongo Riva olsem wanpela snek. Tasol nogat. Em i rot we tupela manmeri i bin kam daun taim wara i bihainim tupela. Arere long wara bai yu lukim ol wail taro i pulap. Em taro tupela i laik mumu long gen wantaim ol diwai.

**Jerry Nolpi Tomba
Tabubil, Westen provins**



Nem: Jacklin Waki
Krismas: 19 meri
Adres: PO. Box 1757, Mt Hagen, WHP.
Save laikim: Lukim QTV, slip long san taim.

Nem: Miriam Ongi
Krismas: 18 meri
Adres: PO. Box 1757, Mt Hagen, WHP.
Save laikim: Danis, kalap, tanim het na lukim vidio.

Nem: John Kombamong
Krismas: 16 man
Adres: PO. Box 1757, Mt Hagen, WHP.
Save laikim: Wok long gaden, pilai tas na singsing.

Nem: David Manga
Krismas: 18 man
Adres: PO. Box 1757, Mt Hagen, WHP.
Save laikim: Raitim pas, ritim niuspepa na go lotu.

Nem: Rubben Sent
Krismas: 18 man
Adres: PO. Box 1757, Mt Hagen, WHP.
Save laikim: Pilai drama na singsing tu.

Nem: Amos Tepra
Krismas: 20 man
Adres: PO. Box 1757, Mt Hagen, WHP.
Save laikim: Ritim baibel na raitim pas long pen prens.

Nem: Bepi Koepa
Krismas: 18 meri
Adres: PO. Box 1757, Mt Hagen, WHP.
Save laikim: Kaikaim maus, kukim nus na danis.

Nem: Tendias Jonan
Krismas: 20 man
Adres: PO. Box 133, Bulolo, Morobe Province.
Save laikim: Harim musik, go long lotu, was long gem na tok pilai.

Nem: Tom Jackson
Krismas: 17 man
Adres: PO. Box 372, Wewak, East Sepik Province.
Save laikim: Harim musik, pilai soka, tok pilai, na raun wantaim ol poroman.

Nem: Ken Robin
Krismas: 20 man
Adres: PO. Box 328, Bialla, WNBK.
Save laikim: Go long lotu (SDA), harim gospel musik, tok pilai, wokim gaden, helpim papama, lainim pasin bilong yut, tingting long maket na i stap gut, lukautim haus gut, na wok mani.



DIA LAIPPLAIN,

Mi bin kisim ol gutpela mak taim mi inisim skul olsem skul setifek pepa bilong mi i soim.

Mi pilim olsem mi ken kisim wanpela wok insait long siti. Tasol mi no painim yet wok, stat yet long las yia, taim mi lusim wok we mi bin gat long dispela taim.

Long tingting bilong sait bilong kastam, dispela samting i save kamap taim wanpela manmeri i gat bel kros o wokir: rong long narapela. Na mama bilong mi i bilip olsem

Hevi wantaim memba bilong narapela famili inap stapim sans bilong mi long kisim wok?

hevi mi bungim long i no painim wok i kamap long wanem mi mas gat sampela kain hevi wantaim memba bilong narapela famili.

Long mi yet, mi ting olsem ol arapela man i gat moa save na ekspiens long wok i winim wok we mi aplai long en. Tasol sapos wanem mama em i tok i tru, dispela inap bagarapim sans bilong mi long kisim wok?

SAD JOB SEEKER

DIA PREN,

Long tude, em i hat tru long ol manmeri i gat bikpela save long wok na ekspiens, long kisim wok. Sapos yu laki ol i kisim yu long wanpela wok, i moabeta long holim pas long dispela wok na noken lusim inap yu kisim ofa long narapela gutpela wok.

Yu tok olsem yu bin lusim wok bilong yu long las yia, wanem as tru long yu wokim

dispela? Bos bilong yu i bin givim yu refrens tu taim yu lusim wok o? Gutpela refrens long olupela bos bai helpim yu taim yu wok long painim wok.

Yu tok tu olsem long bilip bilong pasin kastam bilong yu, yu no kisim wok yet bikos yu wokim sampela rong long ol arapela pipel. Em i isi long lukim long ol liklik komyuniti olsem long ples watpo na bipo, dispela kain samting i kamap.

Tasol long bikpela komyuniti olsem long taun na siti tude, em i narakain. Mipela i no bilip olsem hevi yu gat long i no painim wok i kamap bikos yu gat belhevi wantaim sampela lain insait long komyuniti.

Tasol taim mama bilong yu i autim ol toktok olsem, em bin mas save olsem yu bin gat sampela kain hevi we yu no stretim yet bihainim pasin kastam.

Sapos em i olsem, i moabeta yu kisim ol gutpela toktok long mama o long ol sampela

arapela bikman bilong yu long ples na komyuniti long wanem rot yu ken bihainim long stretim dispela hevi yu gat wantaim ol arapela insait long komyuniti bilong yu. Bihain yu wokim dispela, tingting bilong yu bai i klia, maski yu no inap painim wanpela wok yet.

Yu no tokim mipela long trening na ekspiens bilong yu long wok olsem na em i hat long mipela long helpim yu long sait bilong painim wok. Wanpela tingting mipela i gat em traim na kisim moa trening long teknikal kolis.

Ol yangpela pipel husat i skruim skul long kisim moa trening i save painim isi liklik long kisim wok. Olsem na mipela i strongim yu long kisim moa trening.



PNG HIT Parade 1999

SPONSOR - TRADEWINDS

Table with columns: W/B, L/W, T/W, SONG, ARTIST. Lists 20 songs from the parade.

IN: Name Soda Steve Lahui

OUT: ToDes Quakes

PNG FM PTY. LTD. Trading as NAU FM and YUMI FM. P.O. Box 774, Port Moresby Papua New Guinea. Ph: (675) 320 1996 Fax: (675) 320 1995

Rausim Praim Minista Bill Skate

MI LAIK tok tenkyu long Wantok Niuspepa long givim mi spes long autim liklik wari mi gat long em. Wari bilong mi olsem mi yet mi save lukim, harim long redio na ritim long ol niuspepa na mi i no wanbel stret long ol pasin praim minista bilong Skate i save mekim. Wanpela pasin we mi no wanbel stret em olsem long taim em rausim pati bilong deputi bilong em.

tasol i tok na em stap olsem praim minista long taim bilong fomim gavman. Na i no dispela tasol narapela em olsem em i wok long senisim ol ministri. Em i wok long rausim ol olupela minista na putim nupela minista i go insait long laik bilong em. Mi bilip olsem dispela pasin praim minista i wokim i soim olsem dispela gavman bilong Bill Skate em i no gavman bilong ol pipel bilong Papua Niugini tasol em olsem

praivet kampani bilong em olsem na em i ken haia na faia long laik bilong em. Mi lukim, harim na ritim na mi wari stret bai Papua Niugini stap olsem wanem long ol yia long kam. Em tasol na husat yu laik sapotim o agensim plis rait i go long Wantok niuspepa bai mi ken ritim. Foipa Alah Pot Mosbi

Ol Sios i as bilong kilim kastom na tumbunapasin

MI GAT liklik wari na mi rait i kam long yupela. I gat spes orait putim i go. So mi laik bekim pas bilong bisop bilong Evanjelikal Luteran Sios Sir Mista Getake Gam. Em i tok long PNG i lusim pasin tumbuna. Na mi bekim olsem yupela ol Sios i as bilong kilim tumbuna kastom wantaim tumbuna pasin bilong bipo taim ol misinari i karim lotu i kam na giamanim yupela. So yu bisop bilong Luteran bipo yu i stap bisop na bilong wanem yu i no bin autim kain tok olsem? Nau tasol yu risain na yu painim wok na toktok long dispela. Yu mas pasim maus

long dispela tok na tu namba tu wik yu tok piksa long bilum. Em i nogat mining bilong em. Em bilong ol meri na bilong ol man i go we? Sapos yu laik toktok long pasin tumbuna, yu noken hait long kona bilong Lae na toktok. Yu laik kirapim pasin kastom yu mas go long ples yu kam long en. Na toktok long pasin tumbuna. Bisop Sir Gam, mi laik tokim yu olsem pasin tumbuna bilong Finsafen i bin dai pinis long Juli 12, 1886. Taim ol namba wan misi-nari bilong Jemani i bin kurugutum Simbang, long maus bilong Finsafen.

Na yu laik toktok moa long tumbuna pasin yu go bek long Kawum na skulim ol yangpela manmeri. Noken sindaun long Lae na pairap nating a? So bisop mi laik tokim yu olsem. Yu gat rait long autim tok bilong God tasol. Na yu nogat rait long toktok long pasin tumbuna, em tasol Husat i sapotim o agensim mi, plis rait i go long Wantok niuspepa na mi lukim. Tenkyu long harim na God blesim yu. Mista W. Gingi. R Kimbe

Noken stopim ofa bilong helpim ol setelmen long Mosbi

MI BIN ridim long Wantok niuspepa bilong Desemba 24, 1998 we nius bilong Pater Ekako bilong Gerehu Katolik Sios i bin mekim bihain long toktok bilong Bisop Brian Barnes long ol Katolik manmeri bilong Mosbi i mas bungim moni na ol samting bilong helpim ol pipel bilong ol setelmen. Mi gat dispela tingting long autim long toktok bilong Pater Ekako. Ol setelmen na ol hevi bilong ol pipel i kam long taun na siti em samting gavman bilong mipela i kamapim. Em i ansa bilong wok developmen i go krangki tru. Dispela hevi i stat bipo yet long 1960 i kam inap nau na bai i go moa yet. Em bai hat tru long yumi long senisim o stapim nau. Yumi luksave olsem ol gavman bilong yumi long bipo i kam inap nau tu bai i no inap stretim o daunim dispela hevi. I tru sapos wanpela gutpela gavman i kamap husat i gat gutpela tingting na rot bilong wok developmen insait long ol ples na koyuniti we bai helpim ol pipel long stap bek long ples bilong ol yet. Ol pipel i lusim ples bilong ol bikos ol i nogat gutpela gavman sevis, ol i nogat rot bilong bisnis o rot bilong kisim moni, na i gat planti kain hevi olsem i mekim ol pipel i lusim ples na kam long taun na siti. Dispela hevi bilong setelmen i no nupela samting long PNG. Dispela hevi bilong ol setelmen i stap long planti ol arapela kantri long wol.

Em i rong bilong husat na dispela hevi i kamap long PNG? Em rong bilong gavman. Long taim bilong selp gavman na independens i kam inap na yet tu gavman i nogat gutpela tingting na plen bilong kamapim gutpela wok developmen na sevis insait long kantri. Katolik sios na olgeta arapela kristen sios i gat wok o obligasin long helpim ol tarangu pipel. Ol pipel long ol stelmen i tarangu tu. Sapos gavman i no givim ol gutpela helpim orait ol sios i mas mekim dispela wok. Em i tru nambawan wok bilong gavman em long sevim ol pipel, tasol olgeta gavman bilong yumi i no mekim dispela gut na ol i gat bikpela asua o rong. Stat long gavman bilong Se Michael Somare i kam inap nau gavman bilong Bill Skate i kamap krangi wok developmen. Na nogat wanpela gavman bai tok mi bin mekim stretpela developmen bikos olgeta hevi na trabel i soim olsem i no bin gat stretpela wok developmen long PNG yet. Sapos yu bilip man o bilip meri na yu save beten na lotu oltaim, ating bilip bilong yu i samting nating sapos yu no soim long gutpela pasin long laikim na helpim ol arapela bratasusa. Tingim stori long baibel long tisa bilong lo (farasi) na ol man bilong kisim takis. Tingim tu stori bilong gutpela samaritan. Tru sios i no ken tekova long wok bilong gavman, tasol sapos gavman i no

mekim wok bilong em orait bai husat mekim? Sapos Katolik Sios i tingting long pre na lotuna sakramen na wokim ol nupela hauslotu orait yumi ken tok olsem Katolik Sios i lusim pinis nambawan bikpela skul bilong Jisas yet em long laikim narapela manmeri tu, na taim yu laikim narapela manmeriyu soim dispela long ol helpim yu givim long ol. I gutpela moa sapos ol tisa, pris na lida bilong katolik sios i save gut mining bilong skul bilong Jisas long Baibel, na tu ol skul bilong sios olsem katolik sios olsem toktok bilong Vatiken 2 Kaunsel na ol arapela toktok ol saveman i bin autim. Sios i mas tokaut long gavman taim gavman i no mekim stret wok bilong en. Dispela askim i stap yet: gavman bilong yumi nau i mekim gut wok bilong en o nogat. Grasrut risten. Goroka Sapos yu laik salim ol pas bilong yu i kam long dispela niuspepa, salim i kam long dispela adres: THE EDITOR WANTOK NEWSPAPER PO BOX 1982, BOROKO, NCD.

Telefomin distriki i kamap bus

MI SAPOTIM brata Francis Akama long Wantok niuspepa long Novemba 11, 1998. Em tok long manmeri mas senisim pasin na tingting. Yes nau planti manmeri givim beksait long God na ol laikim amamas bilong dispela graun tasol dispela amamas bai pinis wanpela taim. Taim pikinini bilong God i kam namba tu taim olgeta dispela samting bai pinis. Olsem na marimari bilong papa God i stap yet, manmeri mas senisim pasin blong ol na kamap gutpela manmeri na stap. Nogut yumi ting olsem i gat taim na yumi wok long mekim nabaut i stap long dispela graun. Yumi noken ting olsem Jisas bai i kam daun na yumi senisim pasin o tanim bel nogat dispela taim Jisas i no inap sori long yumi ol sin manmeri bilong dispela graun bai yumi olgeta sanap long bikpela kot bilong Jisas na bai yumi givim stori i go long Jisas long wanem pasin yumi mekim. Gutpela pasin yumi mekim o pasin nogut yumi mekim bai yumi wanwan kisim pe bilong en. Olsem na stretim laip na i stap stret long ai bilong papa God. Simon Flierl Tabubil



Bik Bro REBO



IGO MOA NEKS WIK!



SIPAK MAIKY



IGO MOA NEKS WIK!

Kompetisen lida Gazelle lus long Hawks

MOSBI MENS SOFBAL

KOMPETISEN lida long mens sofbal long Pot Mosbi, Gazelle, i no statim gut nupela yia taim ol i lus long Hawks 5-3 las wiken.

Lus bilong ol i holim yet Gazelle long namba wan posisen wantaim FAI Manalos. Manalos i winim Jollibee MSC 5-1 long stap wantaim Gazelle long namba wan posisen long poin lata. AB Bears i winim Dolphins 13-3, Brown Eagles winim Malangan wansait wantaim 6-0. Na long em bilong wik, Elcom i autim tiket bilong biknem tim, NGL 1-0. Hawks i soim tru olsem ol i strongpela


tim husat i ken givim hat taim long ol strongpela tim.

Bihain long longpela tu wik malolo, ol pilaia i wok long traिम stretim ol yet long pilai sofbal. Tupela tim Elcom na NGL i klostu dro tasol gutpela pitsa bilong Peter Simon tasol i helpim tim. Simon i rekotim 7-pela traik aut egens long NGL. Pitsa bilong NGL Michael Pukai i rekotim wampela traik aut ya.

Tasol em i kisim gutpela sapot pilai i kam long Sam Kepas, Nigel Tata, Nason Albert na Blais Tatai. Pukai i putim tingting long pilai na em i larim Jeremaiah Katusele long wokabaut i kam long namba wan bes.

Katusele i go long namba tu bes na bihain em i go long namba tri taim wampela wan pilai bilong em paitim wampela sakrifais hit. Daniel i paitim wampela gutpela bal na Katusele i kam hom. Na dispela hom em wampela skoa bilong Elcom na tu dispela gem long apinun.

NGL i gat sans long winim wampela skoa tasol ol lain Elcom i strong tru na autim ol pilaia bilong ol. Insait long B gret, Bears winim Burma Raiders 6-3, Gazelle nekim Admiralty 18-9. Malangan na Tarangau i no putim tim. Na long C gret, NGL dro wantaim MSC 2-2, Elcom autim Norths 10-6, Tisa Jets flai antap long Manalos 11-3.



Das i kirap gen long netbal kot

• Tupela susa ya statim gen pilai. Das i kirap gen long Rita Flynn netbal kot. Pablik sevan netbal kompetisen i kik of pinis bihain long Krismas na Nu yia holide.

Long dispela wiken bai sekan gem bal lukim olgeta ol top tim bai pilai strong kamap wina long dispela sisen.

I wankain long Praivet netbal kompetisen we bai ol ol tim tu statim gem bilong ol pinis. Ol tu i strongim pilai yet.

Brown Eagles i holim yet namba wan spot

LAE MENS SOFBAL RIPOT

Brown Eagles i holim yet namba wan ples long poin lata bihain long ol i winim Manalos 9-8 long bikpela gem las wiken.

Maski biknem pitsa olsem James Pina i no stap, Eagles i strong yet long rekotim wampela poin egens Manalos. Pina i stap long Rabaul holide las wik na bai joinim gen tim long dispela wiken.

Tagaga Ngaugau i lusim ples bilong em short stop na kamap pitsa ya. Em i wokim gutpela wok na stapim ol pilaia bilong Manalos long rekotim ol skoa.

John Tume na Isimael Waluta i go pas long dispela win bilong Brown Eagles. Tupela i paitim ol gutpela bal long bringim ol pilaia bilong ol i kam hom. Na tu bal bilong ol i strong tumas na ol infil pilaia i mekim planti asua long holim.

Long namba faiv ining, Manalos i go pas wantaim skoa 8-4. Orait ol Brown Eagles i wok long painim taim long traिम winim dispela gem.

Waluta i kamapim gutpela pilai tru. Em i go long namba wan bes, na bihain em i stilim namba tu bes.

Manalos tu i kamapim gutpela pilaia taim yangpela Michael Kalas jnr i paitim wampela gutpela bal.

Win bilong Brown Eagles nau i stap long 16 poin, NGL 14, Aviatic 12, Karanas 11, Burma Raiders 9, Malanga 5, Island Hawks 5, YMCA 4, Taubar 2, na Bismarck 3.

NGL i winim Negiso Malangan 11-2, Karanas i wilwilim stret Bismarck 14-1, Hawks autim YMCA 6-5, Raiders winim Taubar 13-10.

Papua Niugini Futbol (Soka) Asosiesen

JENEREL ASEMBLI NOTIS



Olgeta Soka Asosiesen Presiden

Disemba 22, 1998

Dia Se/ Medem,

Dispela em toksave olsem Jenerel Asembli bai kamap long Februeri 27, 1999, long Goroka Nesenel Spots Institut (NSI), Goroka.

Dispela Jenerel Asembli i no bin kamap long Novemba olsem mipela i bin tok bikos konstitusen bilong PNGFA i no bin redi long olgeta wanwan asosiesen i ken kisim kopi.

Ol dispela senta husat bai vot insait long Asembli em ol lain husat i bin baim pinis 50 pesen afiliesen fi bilong ol pastaim long Jenueri 31, 1999. Ol senta husat i no baim afiliesen fi bihain long dispela de bai i no nap long vot.

Toksave: Yu no i nap long baim afiliesen fi long taim bilong jenerel asembli.

Olgeta senta husat i laik baim fi bilong ol i mas toktok wantaim tresara bilong PNGFA, Paul Pondo long namba 472 6254 sapos yu laikim moa infomesen. Long vot, hia em ol sampela samting ol asosiesen bilong 1999 i mas mekim;

1. Wanwan senta i mas gat wampela vot na i ken gat tupela deliget i makim asosiesen long ol toktok bai kamap;
2. Olgeta nem bilong ol deliget i kam long ol asosiesen i baim afiliesen i

mas kamap long jenerel sekretari tupela wiks pastaim long jenerel asembli. Asosiesen i mas givim nem bilong man husat bai vot. Sapos dispela man i no nap long kamap long jenerel asembli narapela deliget i ken vot long makim em.

3. Asosiesen i noken salim vot bilong ol i kam long pas;

4. Ol deliget husat bai kamap tasol i ken vot na askim long ol pasin bilong vot;

5. Ol deliget i kam long jenerel asembli i mas ol tru memba bilong asosiesen ol i kam long em;

6. Ol asosiesen i mas-raitim nem bilong kendidet bilong ol long ron long posisen bilong presiden long leta na salim i kam long jenerel sekretari bilong PNGFA one mun pastaim long de bilong Jeneral Asembli.;

7. Wanwan memba asosiesen i mas gat wampela kendidet bilong presiden;

8. Ol nem bilong ol narapela eksekutiv posisen, em long:

Sinia vais presiden

Junia vais presiden

i mas kamap long jenerel sekretari wan mun pastaim long jenerel asembli;

9. Wanwan asosiesen i mas givim nem bilong wampela nomini long posisen bilong sinia vais presiden na wampela nominee bilong posisen bilong junia vais presiden;

10. Olgeta vot long ilekson bai kamap long sikret balot;

11. Nogat wampela deliget bai makim moa long wampela asosiesen;

12. Long taim ol i holim opis, ol

membra husat stap olsem ol ekskutiv bilong PNGFA bai i no nap long makim ol asosiesen bilong ol olsem deliget;

13. Olgeta proposel na askim we bai kamap long jenerel asembli mas kamap long PNGFA jenerel sekretari long leta 21-pela de pastaim long jenerel asembli. Sapos proposel bilong yu i kamap bihain long dispela taim, em bai noken stap long agenda bilong jenerel asembli;

PNGFA bai baim ol balus tiket bilong olgeta presiden husat asosiesen i baim pinis olgeta afiliesen fi o 50 pesen afiliesen fi pastaim long Jenueri 31, 1999;

Olgeta presiden bilong olgeta asosiesen i mas salim ol kontek adres na telefon namba i go long jenerel sekretari long PNGFA adres; o i go long PNGFA jenerel sekretari CF/ - PNG Sports Federation Inc, Fax 325 1851; Phone 3251411

Ajenda bilong jenerel asembli tu i stap long hia.

Mipela bai amamas tasol long lukim yupela olgeta long miting

Tenk yu.

Peter Mommers (Mr)
 Presiden
 PAPER NIUGINI FUTBAL (SOKA)
 ASOSIASEN (PNGFA)

Papua Niugini Futbol (Soka) Asosiesen

PAPUA NIUGINI FUTBAL (SOKA) ASOSIASEN JENEREL ASEMBLI



DET: 27 FEBRUERI 1999
 PLES: NESENEL SPOTS INSTITUT. GOROKA
 TAIM: 9.30AM

AGENDA

1. MITING I STAT
2. MAKIM HUSAT I KAMAP NA HUSAT I NO KAMAP
3. PASIM OL MINITS BILONG NARAPELA JENEREL MITING
4. TOKTOK BILONG PRESIDEN
5. PRESENTESEN BILONG OL RIPOT
 - Fainens Komiti wantaim ripot bilong tresara na presentesen bilong ol oditet fainens komiti na PNGFA akauns.
 - Yut komiti
 - Komiti bilong ol refiri

- Teknikel Komiti
- 6. BUNG TOKTOK LONG OL PROPOSEL NA OL ASKIM I KAM LONG OL ASOSIASEN. (ol dispela proposel na askim i mas kamap long PNGFA jenerel sekretari 21-pela de pastaim long jenerel asembli olsem pastaim long Februeri 6, 1999).
- 7. TOK ORAIT LONG PASIM KONSTITUSEN WANTAIM OL SENIS.
- 8. ILEKSON BILONG PRESIDEN NA OL EKSEKYUTIV
- 9. OL NARAPELA BISNIS
- 10. MITING I PAS.

Peter Mommers
 PRESIDEN
 PNG FUTBAL (SOKA) ASOSIASEN



Wiken Spots Dro

OKAIHENS OFF SEASON DRAW

SUNDAY - 17 January, 1999

HOHOLA OVAL

Game 8

Negiti Bears vs Tapaya
Uriano vs Kesosa
KCR vs K Hawks
Gunagi vs Henz
Krikompa vs Kaki Brothers
Usu United vs Yamaso Raiders

MORATA OFF SEASON

SUNDAY - 17 January, 1999

Kone Tigers Oval

Game 5 - Round 2

Mumut vs Giburi Raiders
Morata Warriors vs K Hawks
East vs Megusa Brothers
Waigani Jets vs Community Tigers
Newtown Knights vs Talapia

* Games 2 and Games 3 were forfeited but the points were awarded to all the clubs.

**PORT MORESBY WOMENS
SOFTBALL ASSOCIATION
1998//1999 SEASON**

16 JANUARY 1999

ROUND TWO
DIAMOND TWO

1030 MAZDA VS ALL STARS
1200 AB BEARS VS CHEBU
1330 ROYALS VS ADMIRALTY
1500 MAZDA VS WANTOKS

DIAMOND THREE

0900 ADMIRAALTY VS CHEBU
1030 GAZELLE VS NORTHS
1200 SUNKIST VS WANTOKS
1330 GAXELLE VS NORTHS
1500 AB BEARS VS STARS

ROYALS - 'A' GRADE - BYE
MALANGAN - 'B' GRADE - BYE

**PRIVATE COMPANIES NETBALL DRAW
SUNDAY 17 JANUARY 1999**

DIVISION 1

1.00 POST COURIER 1 VS DALTRON
1.45 FAIRDEAL 1 VS POM T/LODGE 1
2.25 COURTS 1 VS SP HOLDINGS 1
3.10 STEAMSHIP 1 VS ELA MOTORS

DIVISION 2

1.00 WORD VS SHELL
1.45 POM T/LODGE 2 VS DELOITTES
2.25 CCA VS STEAMSHIPS 2
3.10 SP HOLDINGS 2 VS THEODISTS

DIVISION 3

1.00 ROTHMANS VS YELLOW PAGES
1.45 MBA 1 VS BRIAN BELL 1
2.25 CITY PHARMACY VS FAIRDEAL 2
3.10 RAYWHITE VS EFM

DIVISION 4

1.00 PNG STATIONERY VS P/C 2
1.45 MBA 2 VS PACOM
2.25 PRYDE 1 VS MOBIL
3.10 NATIONAL 1 VS KENMORE 1

DIVISION 5

1.00 COURTS 2 VS BRIAN BELL 2
1.45 PATERSON VS ARNOTTS
2.25 BSP VS TRUKAI
3.10 TRADWINDS VS PNG TRANSPORT

DIVISION 6

1.00 HITRON 1 VS NATIONAL 2
1.45 GOODDMAN 1 VS REMINGTON 1
2.25 IS. T/LODGE 1 VS CRAFTWORKS
3.10 PRYDE 1 VS EDA RANU 1

DIVISION 7

1.00 AEI VS REMINGTON 2
1.45 BISHOP 1 VS IS. TRAVELODGE 2
2.25 PNG FM VS LAMANA
3.10 GOODMAN 2 VS AIR NIUGINI

DIVISION 8

1.00 BHP 1 VS BISHOP 2
1.45 HITRON 2 VS EDA RANU
2.25 DHL 1 VS KENMORE 2
3.10 CENTURY VS ENERTEC 1

DIVISION 9

1.00 GOODMAN 3 VS DHL 2
1.45 AUST. HIGH COMM VS AVIS
2.25 BHP 2 VS ENERTEC 2
3.10 ANZ BANK VS KENMORE 3

**PRIVATE COMPANIES NETBALL
LADDER POINTS - 10/1/99**

DIVISION 1

POST 1 27
FAIRDEAL 1 19
SP HOLDINGSS 1 17
COURTS 1 12
ELA MOTORS 9
POM TRAVELODGE 1 8
DALTRON 7
STC 1 6

DIVISION 2

POM TRAVELODGE 27
WORD PUBLISHING 21
CCA 18
DELOITES 12
THEODIST* 9
STC 2* 9
SP HOLDINGSS 2* 9
SHELL 3

DIVISION 3

EFM 24
BRIAN BELL 1 21
RAYWHITE* 15
ROTHMANS* 15
FAIRDEAL 2* 12
MBA 1* 12
YELLOW PAGES 6
CITY PHARMACY 3

DIVISION 4

KENMORE 1 24
POST COURIER 2 21
PACOM 18
NATIONAL 1 15
PRYDE 1* 12
MOBIL* 12
MBA 2 9

PNG STATIONERY 0

DIVISION 4

BSP 27
PATERSON 18
ARNOTTS 15
TRUKAI 12
PNG TRANSPORT 12
TRADEWINDS* 9
BRIAN BELL 2* 9
COURTSS 2 6

DIVISION 6

GOODMAN 1 27
CRAFTWORKS 22
HITRON 1 17
ISLANDER T.1 15
NATIONAL 2* 9
EDA RANU 1* 9
PRYDE 2 7
PRYDE 2 7

DIVISION 7

AIR NIUGINI 24
LAMANA 18
PNG FM 16
AEI 15
BISHOP 1 13
GOODMAN 2* 6
ISLANDER T.2* 6
REMINGTON 2* 6

DIVISION 8

KENMORE 2 21
BHP STEEL 1 19
DHL 1 18
CENTURY GROUP 4
EDA RANU 2 15
ENERTEC 1 14
BISHOP 2 12
HITRON 2 3

DIVISION 9

AUST. HIGH COMM. 22
AVIS RENT-A-CAR 21
DHL 2 19
ANZ BANK 15
KENMMORE 3* 12
ENERTEC 2* 12
GOODMAN 3* 3
BHP STEELL 2* 3

*PS: LADDER POINTS RATED BY PERCENT-AGE.

**NCD PUBLIC SERVANTS SOCCER
DRAW**

SATURDAY 16 JANUARY 1999

BISINI 1
08.30 M2 COMMERCE VS HEALTH
09.50 W2 PMGH VS COMMERCE
10.50 M2 IRC VS TRANSPORT
12.10 W2 HEALTH VS POSF
13.10 M2 FISHERIES VS ELCOM
14.30 W2 ELCOM VS A/GEN
15.30 M2 POSF VS CELLNET

BISINI 2
08.30 M1 AIR NIUGINI VS UPNG
09.50 W1 UPNG VS DIWAI
10.50 M1 DCA VS PMGH
12.10 W1 WORKSS VS ANGI

13.10 M1 NCDC VS WORKS
14.30 W1 DEFENCE VS DAL
15.30 M1 DAL VS HARBOURS
BYES BPNG (M1), NCC (M2)

SUNDAY, 17 JANUARY 1999

BISINI 1
08.30M2 ICPNG VS DEFENCE
09.50 W2 NCC VS ICPNG
10.50 W2 FISHERIES VS BPNG
12.10 M2 PNGBC VSA/GE
13.10 W2 CELLNET VS NSO
14.30 W2 POLICE VS PNGBC
15.30 M2 DIWAI VS POLICE

BISINI 2
08.30 M1 TEACHERS VS NBC
09.50 W1 NCDC VS TEACHERS
10.50 W1 HARBOURS VS TRANS
12.10 M1 EDUCATION VS NPF
13.10 W1 NPF VS TELIKOM
14.30 W1 NBC VS EDUCATION
15.30 M1 TELIKOM VS NSO
BYES DCA (W1), IRC (W2)

PUBLIC SERVANTS NETBALL
GAME 9 - ROUND 2

DIVISION 1 - COURT 2
9.00AM SPORTS VS PTC 1
9.40AM ELECTORAL VS FISHERIES 1
10.30AM DPM1 VS WORKS
11.40AM HARBOURS VS UPNG1

DIVISION 2 - COURT 3
9.00AM JUDICIARY 1 VS DEFENCE
9.40AM PEA VS CENTRAL
10.30AM FOREST VS NBC
11.40AM REGISTRY VS NCDC

DIVISION 3 - COURT 4
9.00AM NPF VS FOREIGN AFFAIRS
9.40AM HEALTH VS DCA 1
10.30AM FISHERIES 2 VS PRO AFFAIRS
11.40AM REASSURY 1 VS PTC 2

DIVISION 4 - COURT1
9.00AM UPNG 2 VS TRANSPORT
9.40AM NCDC2 VS ATTORNEY 1
10.30AM MINING & PET VS TEACHERS 1
11.40AM TRADE & INDUSTRY VS NRI

DIVISION 5 - COURT 5
9.00AM PARLIAMENT VS F/AFFAIRS 2
9.40AM EDUC 1 VS JUDICIARY 2
10.30AM IRC 1 VS PMGH 1
11.40AM AUDITOR 1 VS DPM 2




DIVISION 6 - COURT 6
9.00AM IRC 2 VS HEALTH
9.40AM BPNG1 VS PNGBC 11
10.30AM EDUC 2 VS ATTORNEY 2
11.40AM ENVIRONMENT VS OCA 2

DIVISION 7 - COURT 7
9.00AM PMGH2 VS NBC 2
9.40AM RURAL BANK VS TREASURY 2
10.30AM PNGBC2 VS BPNG 2
11.40AM AUDITORS 2 VS WATERBOARD



ZENAG - Gutpela kiau

WANTOK SPOT



Boi kanaky winim Osenia awot

MIDFILDA bilong Nu Kaledonia husat i save pilai long France, Christian Karembu i winim Osenia Pilaia bilong Ya. Em i namba tu taim Karembu i winim dispela futbol awot long Osenia rijon.

Karembu i save pilaia wantaim wanpela profesenel klap Real Madrid long Spain, na em i bin stap long France tim husat i winim Wol Kap egens long Brazil 3-0. Em i winim 86 vot. Na Mark

Bosnich bilong Australia i kamap seken wantaim 66 vot na Harry Kewel 53. Karembu i bin kamap namba tri las yia bihain long Bosnich na Stan Lazaridis. Lazaridis na Bosnich i save resis long

husat tru bai winim wok bilong golkipa bilong Australia. Bosnich i save pilai wantaim Aston Villa, wanpela sempion tim long Inglan soka kompetisen.

Bos bilong OFC bai raun long PNG

PNGFA RIPOT

PRESIDEN bilong Osenia Futbol Konfederesen (OFC) Charles Dempsey bai kam raun long Papua Niugini long namba tu wik bilong mun Februari.

Wokabaut bilong Dempsey bai i no inap bihain plen long Februari 26, de bipo long anuel jenerl miting bilong PNGFA.

PNGFA i askim Dempsey long kam sindaun long miting long Februari 27, we i wankain de presiden bilong FIFA Seph Blatter bai kam long Nu Silan. Blatter bai opim nupela soka koles long Auckland, Nu Silan long dispela taim.

Presiden bilong PNGFA Peter Mommers i tokaut olsem em i min olsem Dempsey i mas kam na bungim ol eksekutiv bilong PNGFA bipo long jenerel miting bikos em yet bai i no inap stap.

Dempsey bai lukautim Blatter taim em i kam raun long Nu Silan na em bai i no inap stap long jenerel miting bilong PNGFA.

Taim Dempsey i kam long Pot Mosbi em bai mekim sampela toktok long wok bilong soka insait long kantri. I gat sampela gutpela ripot na ripot long we presiden bilong OFC bai toktok long ol eksekutiv bilong PNGFA.

Insait long arapela soka nius; eking vais presiden bilong PSSA Simon Koima i tok em i no amamas long tingting bilong PNGFA long baim tiket bilong ol presiden bilong wanwan asosiesen long stap long miting.

Koima i tok dispela pasin em i soim tru olsem PNGFA na ol eksekutiv bilong em i laik baim vot long givim balus tiket long ol presiden.

Em i toktok strong tu olsem pasin bilong kamapim A na B senta i no gutpela tumas. Em i soim olsem em i lukdaun long ol arapela senta.

Na em i askim ol senta long noken baim fi inap ol i kamap long namba wan de bilong miting long Goroka.

Tasol wanpela opisel bilong PNGFA long Pot Mosbi i tok olsem dispela toktok bilong baim balus tiket i bin kamap long PNGFA miting. Na dispela i no tingting bilong Peter Mommers.

Olgeta presiden i pasim tok olsem PNGFA nesene bodi, na em i mas baim balus tiket bilong ol presiden bilong wanwan asosiesen long kamap long miting. Dispela pasin bilong balus tiket i no gris pasin.

Opisa ya i tok kain toktok bilong Koima i no gutpela tumas. Dispela ol toktok i wok long bagarapim gutpela wok em ol olpela opisel bilong PNGFA i mekim ya.



• NPF soka tim husat save kik long Pablik Sevans soka resis long Pot Mosbi. Foto: Joe Ivaharia.

Cellnet i redi long winim PSSA taitel

PABLIK SEVANS SOKA RIPOT

HENRY MORABANG i raitim

WANPELA nupela klap long NCD Pablik Sevans Cellnet i kirapim paia stret long kompetisen long dispela sisen.

I tru nem i nupela tasol ol pilaia i gat nem long soka ya. Dispela wik Sarere, Cellnet bai bungim POSF long Bisini 2. Na long Bisini 1, DAL na Harbours bai skelim strong long painim aut husat bai win.

Gem namel long Cellnet na POSF em divisen tu na DAL na Harbours em bilong divisen wan.

Cellnet i sindaun long namba tu ples bihain long Police wantaim 12 poin. Police i bosim poin lata wantaim 13 poin. Birua bilong Cellnet long dispela wik Sarere, POSF, i sindaun long namba siks ples.

Kosa bilong Cellnet Joe Ganisi i gat bikpela bilip olsem ol pilaia bilong em bai putim strongpela gem egens POSF. Cellnet i bin stap long namba 9 ples tasol ol i surik i go long namba

tu ples hariap tru. Na long dispela kain stail na we ol yangpela boi long Pangtel i pilai, ating Cellnet i putim was tasol long taitel bilong PSSA ya.

Ganisi i bai strong long intanesenel pilaia Paulus Savo long go pas long lukautim gem ya. Savo bai kisim gutpela sapot pilai i kam long raithan man bilong em, Pomat Manoi, na Lamak Itjap long lukautim midfil.

Long beklain em stail mangi ya John Ngahan, Steven Guri, Popal Makis na Lance Teman bai bosim long stapim ol straika bilong POSF long noken sutim gol.

Gabriel Rooney bai straika long dispela gem. Sapos golkipa bilong POSF i no was gut, lukaut Rooney bai waraiim gol ya.

Kosa Ganisi i tok Cellnet i lusim tupela pilaia Charles Alfred na Francis Moiyp, tupela i holid. Tasol dispela i no daunim tim bikos ol yangpela pilaia i wok long kamapim gutpela pilai stret ya.

Na ol meri Cellnet i wankain olsem ol man bilong ol. Ol meri Cellnet bai bungim NSO. Wimens tim bilong Cellnet i surik i kam sindaun long namba foa ples.

Tim ya bai kisim strong long tupela biknem pilaia olsem Pheobe Rarabun na Frederica Siwin. Ol bai kisim helpim i kam long yangpela ya olsem Paula Poyep, June Broome, Yalango Matangiau, Muriel Hayes na Michelle Taumpson. Mary Fumo bai bosim umben long stapim ol gol.

Poin lata i sanap olsem:

Mens Pul 2: Police 13, Cellnet 12, Defence 10, A/General 10, Elcom 9, POSF 9, PNGBC 8, Fisheries 8, NCC 8, Diwai 8, Commerce 5, IRC 5, Transport 5, Health 2, ICPNG 0.

Wimens Pul 2: NSO 14, Police 13, Health 12, Cellnet 11, Elcom 10, A/General 10, POSF 9, BPNG 6, PMGH 6, NCC 6, Fisheries 3, IRC 3, Commerce 3, ICPNG 0, PNGBC 0.

Mens Pul 1: Works 13, BPNG 13, Air Niugini 12, NSO 11, NCDC 11, Telikom 10, PMGH 9, NPF 7, DAL 6, Education 6, NBC 6, Harbours 5, UPNG 5, DCA 5, Teachers 2.

Wimens Pul 1: Defence 15, Telikom 14, Air Niugini 13, NPF 10, NCDC 10, Education 8, NBC 8, Diwai 8, Works 7, UPNG 5, DAL 5, Transport 4, Teachers 3, Habours 1 na DCA 0.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.